


Hethadenee
waunauyaunee vadan
Luke Vanenāna



The Gospel According to Luke in the Arapaho Language of the
United States of America

Hethadenee waunauyaunee vadan Luke Vanenāna
The Gospel According to Luke in the Arapaho Language of the
United States of America

Public Domain

Language: Arapaho

Translation by: Michael White Hawk and John Roberts

2015-05-06

PDF generated using Haiola and XeLaTeX on 25 Aug 2024 from source files dated 31 Aug 2023
49903679-7190-57d9-b73a-1c2da4854577

Contents

Luke	1
----------------	---

Hethadenee waunauyaunee vadan Luke Vanenāna

¹ Hanau waunauthathee hadnedanuu hejadenenau hadjenanuu hauthase vavese hauthedau hena hayauhuhau nanāe hājavaānethauwuthajauthaunin,

² Hasevenānauau nanāa hehethee jasesee vasesā hāenuu nau nejaanuu hanadedaunau;

³ Hasethajaunau hethadee heee nananenau jea, vavesethaugudenau vāhee hayauhuhau hehetheejasesee hadnewauthaunauwunathane nedānee, javaānethadee Theauthenus,

⁴ Hadeaenauwu hethauwuu hena hayauhuhau nesechauhauthehane.

⁵ Hena hese Herod, naja Judea, jasaa vevethahehe Zacharias haseede, hadauchunanede Abia: nau henene hedaunāhene Aarauneau, nau hene-seedaunin Elisabeth.

⁶ Nau haenesauvāhēnauau hathaāhenith Hejavaneauthu, thaunaugude-thee vāhee nanavaavedaunau nau hauchuwudaunau Vahadāde dejau-thauwuvade.

⁷ Nau hehauwunesaunenauau, hanau henee hehauwunesaune Elisabeth; nau wauwu haenesauu vāehahenenauau.

⁸ Nau hethauwuu, henee daunsausvadanedaude hathaāhenith Hejavaneauthu hāenauauchaude,

⁹ Nesedaunethe vevethahehehau, nesedaude hadnejaāde yehauthe hevadannauauwunene Vahadāhenith.

¹⁰ Nau haunauude henanedanede haevethahedaune jathee nauauchuu jaa.

¹¹ Nau haenauhauva hautheaune Vahadāde haetheaugune hejavese jaanaa.

¹² Nau hāenauhauwaude Zacharias, haejanethajau, nau nāthajau de haedasaa.

¹³ Hau nuu hautheaune, jevanāthajau hathāhuk, Zacharias: havevethahede nanedauwuhuu; nau hadasea Elisabeth hadjaneseawaude hāau, nau Jaun hadeseau.

¹⁴ Nau nananin hadaunauwuthajau nau hadeneethajau; nau hadnewauthathee neethajauthee hāejanesee.

¹⁵ Hanau haudvasāthaa hathaāhenith Vahadāhenith, nau haudne-hauwuvane daudause dadajevenenaje, wauāthe neauthunaje; nau haudnechauchaunaude Hevadanauwauthauwunene Hejavaneauthu, haa hehethee hāejanesee.

¹⁶ Nau haudnewauthaa dāeyaunenede Israel hadjaechuwauyāaunaude hese Vahadāhenith Henesaunaunenau.

¹⁷ Nau haudnedauwaunaude nauguu Vadanauwauthauwu nau neese-naudāhenith Elias hadjaechuwauyāauau vadauhau henesaunaunenau hese dāeyaunauauau nau nejenedavathee gaugauuthajaudenau hadauethadee; hadnesaanude henanedanede hesanaa hese Vahadāhenith.

¹⁸ Nau Zacharias naudedusaene nuu? wauwu vānehahenenau nau nadasea wauwu vadavehahenede, hathauhuk hautheaune.

¹⁹ Nau hautheaune hanaāaachuhananadethāde, Nananenau Gabriel henee theaugudaunauau hathaāhede Hejavaneauthau; nau janeauthēavānau haudnēdauwunathana, nau hadnauhauthehathana nuu neethajau de wau-nauyauau.

20 Nau, naune, nananin haudnejanadene nau haudnehauwuneanade, haunaude hese nuu hayauhuhau nauauchaugu hethauwuu, hanau nananin daujethauwaudauwu nadanadede, nuu hadnethauwunauauchuu nauauchaugaune.

21 Nau henanedanede haedauyauhauvanauau Zacharias, nau haegau-gauanadauwu henee dauguthetheaugude vadannauuwuu.

22 Nau hāejenauāhede, haejeneanadetha: nau haeaeauwu daunauhau-thāde vadannauuwuu: haevathasauwuna nau haejanade.

23 Nau hethauwuu, henee, chauchaunu hese hāesevadanedaude haeyehau hese nehayau hedauuwuu.

24 Nau hee hena hese henene Elisabeth hanaāenesaunenith, nau haegauduse nehayau hayauthaunenethe hesese heee, hanaāenehede,

25 Hesau Vahadāde naasehānau hese hāedaugauhauvānau hadgudanauwunānau nāedayāhede henanedaa.

26 Nau nanedaudauchauwaude hesese hautheun Gabriel haejeauthewau hehethē Hejavaneauthu hese hedan Gananee hasenaugu Nazareth,

27 Hesāhedāeyaun haenenehauwaune henanin Joseph haenaneeseenith, hehethē hedauuwuu David; nau hesāhedāeyaun Mare haenaaseede.

28 Nau hautheun haedasaa, nau hanaāenehethāde, Haunauwuthajau, nananin vechauthane, Vahadāde hanedaudaunāne: hauwunaunane hesānaa.

29 Nau hāenauhauwaude, haejanethajau hēdanadedaunin, nau haegau-gauanade daun hadnesenaunenechuhude nuu hadnesauau.

30 Nau hautheun, Jevanāthajau, hathāhuk, Mare: hanau nananin vechauthāne Hejavaneauthau.

31 Nau, naune, nananin hadnesaunin, nau hadneahene, nau JESUS hadeseau.

32 Hadvasāthaa, nau Vāā Hejavaa hadethauva: nau Vahadāde Hejavaneauthau hadvenaude naja theaugudau henesaunaune David:

33 Nau hadnajawaudauu hededanin Jacob jethauujenee; nau henajanede hadnehauwuthauvadauaune.

34 Hanaāenehethaude Mare nuu hautheune, Haddusenesau nuu hanau nāhauwāenaunau henane?

35 Nau hautheun hanaāauchuhananadethāde, Hejavaneauthau Hevadanauwauthauwu hadnedasāne: nau naunauthauau Hejavaa haddugauyāaunāne; henaheee jea henee Naunaudāde hadnesaunewaude Heau Hejavaneauthau hadnethade.

36 Nau, naune, have Elisabeth, jea wauwu henesaunede hadneahede wauwu dauvadavehahenede: nau nuu nanedaudauchunethe hesese wauwu hehauwunesaune neethade.

37 Hanau Hejavaneauthau vahee nenedede hayauhuhau.

38 Nau naune, Vahadāde daununānau hahagu Mare, hadnaasauu nuu hasenehene, nau hautheun hanaāenauthāde.

39 Nau Mare hanaāethauwauthede hena hese, nau hanaāehaude jauaudane-nauuwuu nauhauhaunee hese hedan Juda;

40 Nau hanaejedāde hedauuwunene Zacharias, nau haenaunenechautha Elisabeth.

41 Nau hethauwuu, henee, Elisabeth hāenedauwauthaude daununenechuhunith Mare, dāeyaunaa haenauuwu hethauwaudauu; nau Elisabeth haechauchaunaude Vadanauwauthauwu:

42 Nau haevasanade, nau hanaāenehede, Hauwunaunane hesānaa, nau hauwunaunade dāeyaunaa hethauwaudauau.

43 Nau naudauhuthedasaa nuu, henee henaune Navahadāhewaunāde hadnedasānau?

44 Hanau, naune, chauchaunu hanadedaunau haunaunenechauhude hāenedauwaudauwau naunaudaunuu, dāeyaunaa naunauuwujahede nau-naudauau hee haunauwuthajaude.

45 Nau hauwunaunade hesā henee hethauwuthajaude: hanau hena hayauhuhau hadnethauwunaasauau neethāedauwunade hehethee Vahadāhenith.

46 Nau Mare hanaāenehede, Navadathuwu hauwaunehāde Vahadāhenith,

47 Nau navadathuwu neethajaudaunaude Hejavaneauthu Nānayauhāde.

48 Hanau nedaugauhauwaude hadavenuhuhau hedaununaunau: hanau, naune, hewaunehaa heejasese vahee henaededaunau hauwunaunade hadnethanau.

49 Hanau hena Naunaudāde vanasaunee hayauhuhau hasehānau; nau vadanaunee heneseede.

50 Nau nauwunaunaude henee headaunādaunau henajāthee henaedede nau nausunee henaedede.

51 Nenauhauthethāde hedāahede hejadena; neneāsauaunaude hesēthajauhuhau hedāhene.

52 Nejananaude naunaudāhenethe hehethee hetheaugudaunene, nau ne-jejananaude hadavenuhuhau.

53 Negaudauhaude hasenahehau nauuu hethadene; nau nethauyādahehehau negudanaude jessaa.

54 Nenedahewaude heau Israel, nedauyewuwude hedauwuyau;

55 Neesenehethaude havasevāene, Abraham nau hedāeyaunewau jethauu-jenee.

56 Nau Mare haenedauguva hanāenethe hesese hee, nau hanaāejaehaude nehayau hedauuwuu.

57 Wauhā Elisabeth hanaāevadauauadaude hadneejanēsāde; nau hanaāeahede.

58 Nau henedaudevādaunau nau henethesaunau haenedauwauthaa hasauwunaunāde Vahadāhenith haenauhauthehaa vanasaunee hauwunaunadede, nau haenetheneethajauvaa.

59 Nau hethauwuu, henee hāenasaudaunesee haejenauusanauau hadgaugusenith dāeyaunau; nau haedethanauau Zacharias, thauguu heneseedaunin henesaunaune.

60 Nau henaune hegau, hāheyaugaune, Jaun hadnethade,

61 Nau hathauhaugaunee hehauwuseenauau hādauānauau nuu neseede,

62 Nau haevathasaunauanauau henesaunaunin, haadeneseenethe.

63 Nau haenaudedede dasewauthaunauha, nau haewauthaunauhā, Jaun haseede, hahagu. Nau haunauude haegaugauuthajaude,

64 Nau haegaunadenanauau, nau henethaune haegaugaunauaune, nau hanaāanadede, nau haevaveenethedauna Hejavaneauthu.

65 Nau nāthajaude haedasā haunauude henee hathāeuchaunauthee: nau vahee nuu nehedaunau haegaugaunedaune jedauwuu hathāauau jauada-nenauuwuu Judea.

66 Nau yahee hathāenedauvade haejenanauwu hedahenauau, haudduthā naa dāeyaunaa, hahagaunee? Nau hejadenene Vahadānith haenedaudaunaa.

67 Nau henesaunaune Zacharias haeechauchaunaudene Vadanauwau-thauwu, nau haeeayānautheda,

68 Vaveenethedaunaa Vahadāde Hejavaneauthau Israel; hanau haenau-ujāda nau daujauaudaunaudauau hedenanedanede,

69 Nau thauwaudanaude henenese hadnenayauhānauau jedauwuu hedauauwunene hedaununaune David;

70 Dau nausunanadede hedenaa Hevadanaeayāhewau neenaedenethe hājeenaedenauau:

71 Henee hadnenanedanenauau hehethe haujauthavene, nau hehethee hejadena vahee hāthāasānavādaunene;

72 Hethauwuu hauwunaunadede nesayānēdauwunaude havasevāene, nau hadnedauyewuwude Hevadanenesedauwau;

73 Deneauwauhude yesee havasevāene Abraham,

74 Henee hadvenānauau, jenāthajau de hehethee hejadenene haujauthavene hadnenayauhānauau hadnevevethedaunaunauau.

75 Nauguu vadanaunee nau chuwuu hathaāhede, vahee hesee hade-naededaunene.

76 Nau nananin, dāeyaunaa, haeyāhe Hejavaa haudnethane: hanau nananin hadnedauwaudauwu Vahadāde hadnesaanudene hevaunaa;

77 Hadvāde haeyaude hadnenanedanedaunee hededane hadjaegudanauwunaude hewauchudaunenenu,

78 Hehethee havathee hauwunaunadede Hāsaunaunene; nanaa Naugusaje hehethee hejavaa hadnenaaujādaunānauau,

79 Hadvenaude hesee hathāetheaugunethe hadauveeyaunee nau hadaudugauyāsaa gaujauaudahede, hadnedauwaudauau hauauthene hesee hadaudādauyaunee.

80 Nau dāeyaunaa haeseau, nau hevadathuwu haedēaune, nau haenaadaude hadaunechaudanee haunaude hesee hadneenauhauthethāde Is-rael.

2

1 Nau hethauwuu hena hese hauchuwude haeneāsanau hehethee Caesar Augustus henee vahee henanedanede hadnayāadee.

2 (Nau nuu nayāadede haenedauwunesede deauchuwunanenede Cyrenius Syria.)

3 Nau vahee haeauāchaudene hadnayāadee haunauude hanesāde hesee nehayau hededan.

4 Nau Joseph jea haeyehau hehethee Gananee, hehethee hedan Nazareth, jedauwuu Jūdea, jedauwuu hededan David Bethlehem neseee, (hanau naadahagu hedauauwunene nau nedānee David,)

5 Hadnethenayāade naguu Mareheau heauthehewauthādaune hadnewaune wauwu haeehāthane heee henesaune.

6 Nau hethauwuu, henee hajesenausunanedauthee, hese haevaduaunau hadneejanēsāde.

7 Nau hanaāejanesāde henedauwusaune heau, nau haeejetha, nau haee-sevana hewauchuhauchave nedau vethehenethe; hanau haeneau vethe-hedaunauauwuu.

8 Nau hena vavade vedauauwuu haudānajauāhehauau haeaundenauau, haeaunaunehanaunau haeaunauyauhauvanauau hedajauanenau vegau.

9 Nau, wauhā, Vahadāde hedautheaune haedasā, nau havathee haese-nausāaunauau Vahadānith; nau haevasenāthajauunauau.

10 Nau hautheaun jevanāthajauau hathāhaugaanee: hanau, naune, nau-
 uchaudaunathana hethadee waunauyauau havathee neethajaude, nanaa
 hee vahee henanedanede.

11 Hee nananena janese nuu desenee hededan David Henayauthāhe,
 nananede Chris Vahadāde.

12 Nau nuu hadneenauwuna; Nananena hadveehauna dāeyaunaa hanaje-
 hede, saese hewauchuhauchave nedauvethethee.

13 Nau nauhauhaunee hena haewauthanauau hejavaa hautheaunauau
 nauuu naa hautheaun haevaveenethedaunanauau Hejavaneauthu, nau
 hasenehehaugaanee,

14 Havathee hauwaunede hese Hejavaneauthu hejavaa, nau dasee
 vedauauwuu nanethauaunee, hethadee hathanavana henanedanede.

15 Nau hethauwuu, hautheaunauau haejaenauthā hese hejavaa, Wauhā
 hadehaunau Bethlehem, hanathadagaunee nuu haudānjauāhehauau,
 nau nauhaudauwuu nuu hayewhu javeauu, nanaa Vahadāde
 hāādaunwunādaunene.

16 Nau haenauhanauusanauau, nau haevahanauau Mare nau Joseph,
 nau dāeyaunauau haesaeseene hewauchuhauchauwauwuu henee nedau-
 vethenenethe hewauchuhauchāve.

17 Nau hāenauhauwauthee, haeneānauthedanauau nuu hathau-
 thedaunāhethhee hee dāeyaunauau.

18 Nau vahee hathāenedauvade haegauguanadauwu henee hayauhuhau
 nuu hathauthedaunāthee haudānjauāhehau.

19 Nau Mare haeaunaunede vahee nuu hayauhuhau, nau haegaugua-
 nade hedahaa.

20 Nau haudānjauāhehauau haejaesanauau, haevaveenethedaunanauau
 nau haevaveenethedaunanauau Hejavaneauthu hee vahee hanathadau-
 vathee nau hathauhauthāthee, neethādaunwunāhethhee.

21 Nau hāenasaudaunese hadneegauguusede dāeyaunaa heneseede Je-
 sus, haseadagu nuu haseede haenaneeseāde hautheaunau haunauau de-
 jethāsee.

22 Nau hese hāewaudeauchaude hasaunee hedauchuwude Moses
 hāevadaunaunee, haeyehauthanauau hese Dadaunedan hadjenanauwu-
 nauthee Vahadāhenith;

23 (Hathauthaunauhunee hauchuwudaunaa Vahadāde, Dajee haunua-
 hee henee nedauwusau vadade hadnethade hese Vahadāhenith:)

24 Nau hadnausāyauunee neesenehedaunee hauchuwudaunaa Vahadāde,
 Hanesethee vedāenauau, wauāthe hanesethee neauthuvedāesaunauau.

25 Nau, naune, hena henane haenedau Dādaunedan, Simeon
 haenaneeseede; nau naa henane haechuvā nau haethauwuthajau,
 haejauwuwude hadneneethajauthee Israel: nau Vadanauwauthauwu
 haethāsade.

26 Nau haeeauthedaunaa Vadanauwauthauwu, henee hadjenauhau-
 dauau gaujauaudahede, haunaude hadnauhauwaude Vahadāhenith Chris.

27 Nau haejeheenausa Vadanauwauthauwu jedauwuu Vadan-
 nauauwuu: nau hāene henehā Hejavaenauthusau jedanāde hadnesehāde
 thauguu hasauau hauchuwude,

28 Hanaāejavethenaunaude hejadena, nau haevaveenethedauna Heja-
 vaneauthu nau hanaāenehede,

29 Vahadāhene, hewaunehaa nanehāejenanaude hauwauwaunave hadnau-
 dauau nanethauaunee, hasauau hadanade:

30 Hee nasesā nanauhauwauau havāde Henayauthāhe,

31 Naa nananin hadnesaanudene hathaāhedaunee vahee henanedanede;

³² Hesee hadneesenee Hathāauau henanedanede, nau havathee had-nanedanede Israel.

³³ Nau Joseph nau henaune haegaugauanadauwu hena hayauhuhau hanasenehethavathe.

³⁴ Nau Simeon haeevethasa, nau haeāedauwuna Mareheau henaune, Naune, Naa dāeyaunaa haneenjanade hadneaunenauaudenenee nau had-neejaegauhadenenee hauwuhuu Israel; nau hanau nauhauthethau had-nevathevade;

³⁵ (Haa, gaugauchu hadneegauchuguhune nehayau havadathuvaa jea;) henee gauguuthajaudenau hauwuhuu vadauhau hadneauthasuu.

³⁶ Nau hena haenesā Anna, haeyāhe, hedaunau Phanuel, hanaadāde Aser: haewauthanenau hejajenewau, nau haenethenaedeva hechu nesaudauchu jajene hehethee neesede;

³⁷ Nau haeevesāne heee nasaudausauau yānenee jajene, nananede haeejethaunau vadanauauwuu, hau haenesedauna Hejavaeauthu nauguu naugauyaude nau vevethahede dajāee nau hesee.

³⁸ Nau haejejedā heee haevaveene jea Vahadāhenith, nau haehauthedauna vahee nethāejauwuwudethee jauaudaunauthadede jedauwuu Dādaunedan.

³⁹ Nau hāesedauthee vahee hayauhuhau hasauau hauchuwude Vahadāde, haejaesanauau hesee Gananee, hadahethee hedan Nazareth.

⁴⁰ Nau dāeyaunaa haeseau, nau haedēaune hevadathuwu, haeechauchau-naude haeyaude: nau Hejavaneauthu vadaude haethāsade.

⁴¹ Nau wauhā henehā haehaunenau hesee Dādaunedan hadauchuvejane-nee vasevadanesee Hadavechauthadede.

⁴² Nau denesenenee hejajenewau, haeehaunauau hesee Dādaunedan hanau nesedaunenee vasevadanesee.

⁴³ Nau hese hāevadaunee, hāejāesathee, dāeyaunaa Hejavaneauthusau haenasedauna Dādaunedan; nau Joseph nau henaune haejaenauwu.

⁴⁴ Hau henanedaa haenehauvā hathanauwauhaugaunee, nau haejanau-gudaunee; hanaāenaudehauthee henedauānene nau henedaehāhene.

⁴⁵ Nau hāejeveehauthee, haejaesanauau hesee Dādaunedan, daunaudehau-
thee.

⁴⁶ Nau hethauwuu hāenasese hanaāeveehauthee jedauwuu vadan-
nauauwuu, haetheaugune nahethāe hauthedahehau, haejaatheha, nau haenaunaudedauna.

⁴⁷ Nau vahee hathāenedauwauthāthee haegaugauanadauwu hedaeyaunene nau hedauchuhanehedaunene.

⁴⁸ Nau hāenauhawauthee, haegaugauanavanauau: nau henaune, Nā, nauduhanehāne? hathāhuk, naune hāsaunau nau nananenau nenaude-hane nejeeneethaunee.

⁴⁹ Nau hathauhuk, nauduhanehena? gauhajaene nachāe wauwu hanedaudauwau Nāsaunau henesethaude?

⁵⁰ Nau haejaenauwu hasenehethāthee.

⁵¹ Nau hanaāenethaunau, nau haenauusanauau Nazareth, nau haethauwaudaunā: hau henaune haeanaunedene vahee nuu nehedaunau hedahaa.

⁵² Nau Hejavaneauthusau haeneenaneane hedaeyau nau hajedāde nau vechauthaude Hejavaneauthu nau henanedanede.

3

¹ Wauhā yauthaunenee jajene wauwu neeenajanede Tiberius Caesar, Pontius Pinade nausunajawaudauau Judea, nau Herod nanajawau-

dauau Gananee, nau henauhauwauau Theneb nanajawaudauau Iturea nau vedauauwuu Trachonitis, nau Lysanias naja Abilene,

² Annas nau Caiaphas vevethenajanauau, Hejavaneauthu nanadede haeedasaa Jaun heau Zacharias nauaunee.

³ Nau haeadede vahee vedauauwuu hanathaudanee Jordan, haeauthedaude dusaahede hadneaugauthuu gaugauthajaudenau hadneegudanee wauchudaudenau;

⁴ Naathauthaunauhuu wauthaunauhanaa hedanadede Esaias haeyāhe, Jasaye haevasehe nauaunee, Hesaanuu hathaāhede Vahadāhede, nesedee hevau chwuwuu.

⁵ Hadauchugauaudayauau hadnechauchauanaa, nau hadauchāe hauane nau jauaudane hadjananee, nau jajāvāe hadchuvanee, nau hadauhauayauau bau* hadneyauthauau;

⁶ Nau vahee henanedanede hadnauhaudauau Hejavaneauthu hedenayauthaunene.

⁷ Haenaāenehethaude waunauthanee henanedanede henee hedaśadaunau haddusaanaude, Hau hedenaededaunenau sesityānauau, hanaa hāedauwunādaunenau haddaugauhudauwuna nauthee hasenaunaude hadnausanauau?

⁸ Hethadee nesedee hadeheaenaunee hadnaugauthuu haugaugauthajaudenenau jevaauthenehee hadahenauau, hāsaunaunene Abraham: hanau nāedauwunathana, Hejavaneauthau neene nesehaude nuu hauunaugānau Abraham hedāeyaunewau.

⁹ Nau wauhā jea hauunauchu janenanee hethājee hauhaudee: vahee hauhaudee jeneeaudehuk vevenaundenau haddauwauhude, nau hadnee-waudeadaunee.

¹⁰ Nau henanedanau haenaudeadaunaa, hauddusedaune? hathāhuk.

¹¹ Hanaāaedauwunaude, Daun nanesevechudaunade, jevena daun jan-
evchudaunenith; nau daun hevethenede jenaasedaude, hahagu.

¹² Wauhā haenaāenuusathee hauāyāhehauau haddusaahethee, Hechauhauthethāhe hauddusedaune, hathāhuk,

¹³ Nau hathāhaugaunee, javaauthaunaudaunāthe henee nethautheavane.

¹⁴ Nau vanenanenu hanaasedaunethe, hanaasenehethāde, Nau had-
dusedaune, hathāhuk? Nau javaauthasenehaa henaneda, hathāhaugaunee, javaauthenanedauneevāa henaneda, nau hadnanethauaunahedava haunaudanadenenu.

¹⁵ Nau henanedanau hathanavāhuk, nau vahee henanedanede haegau-
gauanavaa hedāhenenu Jaun wauau Chris haenane, nau wauāthe hajee;

¹⁶ Jaun hanaāauchuhanehethaude, hathauhuk vahee, Hadneedusaanathana
heee naje; hau hanesāde javaānaudāde javaāhenau jaunaude hewauhugu
hewauaunaa nāhauwuneaugunavane, hadneedusaanāna heee Hejavaneauthu
Vadanauwauthauwu heee heseda.

¹⁷ Henaunasāhau nanewauunauau, nau hadgaunauhauau heyauthee
nedauthauayāde, nau hadnauānauau wauchuunethauauhanau
nedauthānauau jenayaunau; hau jenethauayaunau hadvadauchauauau
hesedaa nedaujesaundaunee.

¹⁸ Nau waunauthanee hanasejāesaunee hayauhuhau hanathauthedaun-
naude henanedanau.

¹⁹ Hau Herod naja haeauaunewau heee Herodias henauhauwauau
Thebeau henenene, nau vahee hathāewausaunee hanasedaude Herod,

* ³⁵ "Bau" probably should be "vau" (meaning "way" or "road"), in line with the rest of the text, since the letter "b" appears nowhere else except in foreign names.

20 Haewauhaunene nuu vahee henee dauaugauhude Jauneau duguhunauauwu.

21 Wauhā hāevahesedusaahedaunee henanedanede, hethauwu henee Hejavaneauthusau haenethedusā, nau haevevetha, hejavaa hanaāegaunanenee,

22 Nau Hejavaneauthuvadanauwauthauwu haejejanauhusane hedanayaunaa hedanayau haenaasaunee waude vedāene nau hanadede haejenauusa hehethēe hejavaa, hasenehehuk, Nananene vechauthauau Nāa, nananene vaveenethedaunathane.

23 Nau Hejavaneauthusau nehayau wauwu wauau hanasauau jajeneva, hanane (hathanavade) heau Joseph, nananenith heau Heli,

24 Nananenith heau Matthat, nananenith heau Levi, nananenith heau Melchi, nananenith heau Janna, nananenith heau Joseph,

25 Nananenith heau Mattathias, nananenith heau Amos, nananenith heau Naum, nananenith heau Esli, nananenith heau Nagge,

26 Nananenith heau Maath, nananenith heau Mattathias, nananenith heau Semei, nananenith heau Joseph, nananenith heau Juda,

27 Nananenith heau Jonanna, nananenith heau Rhesa, nananenith heau Zorobabel, nananenith heau Salathiel, nananenith heau Neri,

28 Nananenith heau Melchi, nananenith heau Addi, nananenith heau Cosam, nananenith heau Elmodam, nananenith heau Er,

29 Nananenith heau Jose, nananenith heau Eliezer, nananenith heau Jorim, nananenith heau Matthat, nananenith heau Levi,

30 Nananenith heau Simeon, nananenith heau Juda, nananenith heau Joseph, nananenith heau Jonan, nananenith heau Eliakim,

31 Nananenith heau Melea, nananenith heau Menan, nananenith heau Matthatha, nananenith heau Nathan, nananenith heau David,

32 Nananenith heau Jesse, nananenith heau Obed, nananenith heau Booz, nananenith heau Salmon, nananenith heau Naason,

33 Nananenith heau Aminadab, nananenith heau Aram, nananenith heau Esrom, nananenith heau Phares, nananenith heau Juda,

34 Nananenith heau Jacob, nananenith heau Isaac, nananenith heau Abraham, nananenith heau Thara, nananenith heau Nachor,

35 Nananenith heau Saruch, nananenith heau Ragau, nananenith heau Phalec, nananenith heau Heber, nananenith heau Sala,

36 Nananenith heau Cainan, nananenith heau Arphaxad, nananenith heau Sem, nananenith heau Noe, nananenith heau Lamech,

37 Nananenith heau Mathusala, nananenith heau Enoch, nananenith heau Jared, nananenith heau Maleleel, nananenith heau Cainan,

38 Nananenith heau Enos, nananenith heau Seth, nananenith heau Adam, nananenith heau Hejavaneauthau.

4

1 Nau Hejavaneauthusau wauwu haechauchaunauade Vadanauwauthauwu haejeehedesa hehethēe Jordan, nau haeyehauthaa Vadanauwauthauwu nauaunee,

2 Yāyauau hese hananeedauchunese haenayāthehaa Haujaune, nau hena hese haeheejevethē: nau hāevathenese, haenaāasenade waunee.

3 Nau Haujaune hathāhuk, hith nananene Haāthauwūāvaa Hejavaneauthau hāedauwunene naa hauunauga hadejauaujaunenede.

4 Nau Hejavaneauthusau haeachuhanehe hathauhuk, Wauthaunauhuu henane hehauwunaede jauaujaunau jasaa, hau hee haunauade hedanadedauunene Hejavaneauthau.

5 Nau Haujaune haenauauhuchauhaa hauanee hadaujauudanenee, nau haenauhauthehaa vahee najanede hathāauauvaa henanedanede chauchaunu.

6 Nau vahee nuu najawaude hadvenathane, nau hauwaunede, hathāhuk Haujaun: hanau henee nananenau devenanau; nau daun navadauvenau hadevenauau.

7 Hith nananene henaheee hevevethedaunenagu, vahee hadnehanāhene.

8 Nau Hejavaneauthusaun hanaāauchuhananadethāde nau hathāhuk, Hede-hau naugauvaa, Haujau haugau hathauthaunauhuu, Nananene hade-vevethedaunaude Vahadāde Hāsaunau, nau hanesāde haudnevevethedaunaude.

9 Nau hanaāehauthāde Dādaunedan, nau haejenanaa naunauchuu vadanauauwuu, nau hith Haāthauwuāvaa Hejavaneauthau hauwujanauau hede hehethee, hathāhuk:

10 Haugau hathauthaunauhuu, Hadāedauwunaude hedauthaunau had-nūnānaune:

11 Nau hejadenenau hadejedunānaune, havaaugugausene headaa dasee hauunaugāe.

12 Nau Hejavaneauthusaun hanaāauchuhananadethāde nau hathāhuk, Hasenehee, Nananene jevanayāthehene Vahadāde Hāsaunau.

13 Nau hāevathenayāthedaude vahee, hanaāejathāde haujau najee,

14 Nau Hejavaneauthusaun hanaāejaenaudāhede Vadanauwauthauwu haduu Gananee: nau hanaāauthedaunenede hanaāeneāsanaunee vahee hathāauau Gananee nauanee.

15 Nau haechauhautheha vevethahenauauwuu, nau vahee haevaeneha.

16 Nau haenauusa Nazareth, needaunauuchauhade: nau dajauaunee nesedaude haeyehau vevethahenauauwuu vadanesee, nau haetheaugu dasauhauauau wauthaunauha.

17 Nau haevenau hewauthaunauhanene haeyāhew Esaias. Nau hāegaunauau wauthaunauha, haeveede hadauwauthaunauhune,

18 Vahadāde Hedaunauthauwu nanadeaunānau, hanau dehedusaanānau javeda hadnauthedaunu hethadenee waunauyaunee hadavenuhunethee: hanejevāde haudnenayauhu naudauwuthajauthee, hadnauthedanau haud-jaejenanathee wauwaunauau, nau hadnejanauhauthāthee nanenauguthee, haud-jaejenanathee* hasenethaunauau,

19 Haudnauthedaudauwau hethadee jaunauauau jaje Vahadāde.

20 Nau haeauauvane wauthaunauha nau haejaevana vevethahehew, nau hanaāejanaugude. Nau vasesā vahee hathāanedauthee vevethahenauauwuu haenāuhauvanauau.

21 Nau hanaāejasenehethaude, nuu desenee nuu hathauthaunauhuu het-hauvaa haunaudaununenau.

22 Nau vahee haesegaugauudedanene, nau haegaugauanadauwu het-hadenee hedanadedanene hethāenehethaunene. Nau gaunuu jee heau Joseph? hahagaunee,

23 Nau hanaāenehethaude, Nananena hadethauwunehesena nuu heeejegausudede, Naudaunehāhe, nehanenayauhade: henee nanāthadauwaunee nanāsedanee Capernaum nanehasedaunee nechau hede nehayau havedauauwuvaa.

* 4:18 There is a midline hyphen in "haud-jaejenanathee" which doesn't appear in same word earlier in the verse. There are no other midline hyphens in this text at all, and this hyphen is probably without significance.

24 Nau hathauhuk hethauwuu nehethathana, Hegau haeyāhe hehauwuechauthau nehayau hevedauauwuvaa.

25 Hau hadauthedaunathava hethauwuu, waunauthathee henevesānauau neanedauthee Israel, heseē deanedaude Elīas, hejavāa denausunaugauhuu nasau jajene nau nedaudauchu hesese, devasauau hasenaude denanadesanauau vedauauwuu;

26 Hau hehauwunesāhene hejevādaunene Elīas, vavade Sarepta, hedan Sidon, hesā nananede henevesā.

27 Nau newauthathee naugaugauwuhuhauau neanedauthee Israel deanedaude Elīseus haeyāhe; nau hehauwunesā henayauhade vavade Naaman Syrian.

28 Nau vahee hathāetheauguthee vevethahenauauwuu, hāenedauwauuu nuu hayauhuhau, haeēchauchaunaudenenu hasenaunaude,

29 Nau haegauhānauau, nau haenunatheguthanauau hedan, nau hae-hauthanauau hauchauguu jauaudanee haduinee hededanenu needaunesehene neaudnedauauwuguthauthee hauthedaunaānee.

30 Hau haejavechautha hehethee nahethāe, haejathāau,

31 Nau haenauusa Capernaum, hedan Gananee, nau haeauthedauna vadanesenenee,

32 Nau haegaugauanadauwunenau hasechauhauthehaude hedanadedau-nau, hanau hedanadedauau haenauthaunenau.

33 Nau vevethahenauauwuu henane haenedau hevadathuwu hae-wauchāhene haujaun, nau haevasanade,

34 Jenehāaa; hathāhuk, haudduseha nananene Jesus Nazareth? gauhāejau haudnauauhāane? Haenaunathane hadāhene; Vadanauau Hejavaneauthau.

35 Nau Hejavaneauthausau haeneuva, dādaunauguu, hathauhuk, nau je-nauchune. Nau haujau hāegaussewaude nahethāe hanaāejenauthaude nau haejaseneha.

36 Nau vahee haegaugauanavāa, nau haenanadethadenenu jaeē, nuu hayew hanade; hathāhuk, hethauwuu nauuu haenauthenehetha haenesedaawauna wauchāhenethe haujaunau, nau hanaāejenauāhethee.

37 Hanaāauthedaunenede nanadeē jaseēē gauānee vedauauwuu,

38 Nau haegauhā haenauā vevethahenauauwuu, nau haejedā Simon hedauauwuu. Nau Simon henene henaunene haenaudauwauvāhene; nau haeauthewaunauthasanauau.

39 Nau haetheaugudauna, nau haeneude hasauwauvahede; nau haenau-thaa: nau nauhauhaunee haegauhā nau haedauyauhauvanauau.

40 Wauhā hesese hāenaesade vahee hathāenethenauthee hasauwauva-hehehau hanasejaechauwauvāhenethe haenauchaudaunau; nau haeda-jevasana nau haenayauha.

41 Nau haujaunauau nauuu haevanausanauau haewauthanauau, haeneānadenauau, nau haenehenauau, Nananene Chris Heau Hejavaneauthau. Nau haeneneuva haejechuwauanadeha: dauhaenauwunethe dau Chris denede.

42 Nau hāesenenee, hanaāejathāaude heseē hadaunechaudanee, nau henanedanau haenaudehaa, nau haedasaa, nau haedauduvāa, haudjenauthaude.

43 Nau hanaāēdauwunaude, haudnauthedaudauwau najanede Heja-vaneauthau gauchuhunee hedanau nauuu: haugaunaasejejenananau.

44 Nau haeautheda vevethahenauauwuu Gananee.

5

¹ Nau hethauwuu, henanedanede haeneenavadaunedauwaudauwu hedanadedauunene Hejavaneauthu, haetheaugu sasethauwu neajee Gennesaret,

² Nau haenauhaude hanesanenee thewaunau haetheaugunenau sasethauwu neajee: hau naunauyāhehauau haeeauhaudesanauau, nau haeanahesadenauau henauyaudenenau.

³ Nau haejedā jasaa hethewaunene, Simon, nau haenehetha hadwauauwuhude vanehaa hehethee vachuwauauwuu vedauauwuu. Nau haejanaugu, nau haechauhautheha henanedanau hehethee thewaunaa.

⁴ Wauhā hāevadauthedade, hanaānehethaude Simon, wauauwuhude hadaudavee, nau henauwunau haunauyade hadjathāne.

⁵ Nau Simon hanaāauchuhananadethaude, Hechauhauthethāhe, naunau-gaunenesethānauau, nau nāhauwuthauujathāva: hau hegaugaunauau had-naenauwaudenau nauyade haugau hasenehene.

⁶ Nau hāesedauthee nuu haewauthanenu hejathaunenau, nau haethauwunauaune henauyaudenenau.

⁷ Nau haeadethanauau henedaehahenu danachaugunethe jasaa the-waunaa, haudjaunethe, nau haudnedāhevāthee. Nau haenauusanenu, nau haechauchaunaudenauau hanesanenee thewaunau hanaāenauwuu.

⁸ Hāenauhaudauau Simon Peda, haechauāgujanaugu hejaedayānene Hejavaneauthusaun, nauchu, hathāhuk; haugauhauhauganenau, Hau Vahadāhene.

⁹ Haejenaunethajau, nau vahee hethāenethaunādaunau daunauanauthee nauwu hejathaunenau.

¹⁰ Nau nauugu James, nau Jaun, heauhau Zebedee, henedaehauhau Simon. Nau Hejavaneauthusau hanaāēdauwunaude Simon, Jevanāthajau, hewaunehaa hee nananene haudnesedanaude henanenauau.

¹¹ Nau hāenauuchaudethee hethewaunenau vedauauwuu, hanaāenauduu vahee, nau hanaāenethauguhauthee.

¹² Nau hethauwuu, hāanedaude jasaa hedan, naune henane haechauchau-naude naunaujaunee haugauwude; hāenauhauwaude Hejavaneauthusaun haeuāneseve, nau haeautheava, Vahadāhene, vathehānenagu hadeneeyau-danene hathauhuk.

¹³ Nau haeyethauha, nau haevasana, vanatethānu: heyaudāhe, hathaukuk. Nau nauhauhaunee naunaujaunee haugauwude haenauthaa.

¹⁴ Nau haenesedaunaunā haudjāedauwunaunith henanedane: hau najesa hadnauhauthehau hadanayau vevethahevāhe, nau hadvā dauhenayauhane, Mosase neesedaudevade, haudneāenuu.

¹⁵ Hau haeneenanauthedaunene neānee: nau havathee haewautha henanedanede haeauānauuchaudene daujewaunejaathededaunee, nau haudnenayauhāthee hedaauwauvahadaunenau.

¹⁶ Nau haejathāau hese nauaunee, nau haeevetha.

¹⁷ Nau hethauwuu jasaa hese, hajesechauhauthethāde, Nesetha-jauhuhauau nau hechauhauwauwuhauau nanavaavede haetheau-gunauau hejava, haejeehedesanauau hadauchāe hauwauhauwudan Gananee, nau Judea, nau Dādaunedan: nau naunaudāde Vahadāde haetheaugu hadnenayauhaude.

¹⁸ Nau, naune, henanenauau haenauuchauhanauau henanene hee hedauwune haesevāhene nau haenayāthejedananauau, nau hadjenanauwu-nauthee hathaājēnith,

19 Nau hāejevedethee haudnethejedanathee hanau dauwauthaa henanedanede, hanaāenauuhusathee dasee hauauwuu, nau haejanauhaujānanauau, hehethēe dasee hejavaa hauauwuu nauguu hedauwune nahethāe hathājenith Hejavaneauthusaun.

20 Nau hāenauhaudauwunith hedethauwuthajaudenenau, hanaāēdauwunaude, Henane, hauwauchudaude gaunudanauwunane.

21 Nau wauthaunauhāhehauau Nau Nesethajauhuhauau hanaāejasesegaugauuthajauthee, Hanaa naa hananadede nehedaduhude Hejavaneauthu? hathāhuk. Hanaa haudgudanauau wauchudaude, vavade Hejavaneauthau, naanesāde?

22 Hau hāenauwunith Hejavaneauthusaun hegaugauuthajaudenenau, Haudusethajauva hadahenauau? hathāhaugaanee,

23 Hayew gauchaua, nehehāgu, Hauwauchudaude gaunudanauwunana; nau wauāthe gauhā nau javesa heheagu?

24 Hau hadaenauwu henee Heau henane naunaudāde dasee hathāauavadee negudanauau wauchudaude, (naasenehethauhaugu neasauwauvahedauwunith hesevahede) Hāedauwunathane, Gauhā, nau hedanau hauddau nau najesa nananene haudauwuu.

25 Nau nauhauhaunee haethauwauthe hathājenithe nau haedane heaugusenadenau nau hanaāejathāude hedauauwuu haevaveenethedauna Hejavaneauthu.

26 Nau vahee haegaugauuthajaudene nau haevaveenethedaunanauau Hejavaneauthu, nau haeechauchaunaudenauau nāthajau, Naunaudauhauthānauau nuu desene, hāheagu.

27 Nau hāevathedaude haejathāau nau haenauhauva hauāyāhe Levi hanaaseenith, haetheagune nedauudanauau hauāyaunau, nau jethauguhu hathauhuk.

28 Nau haevanauthā, haegauhā, nau haethauguha.

29 Nau Levi haevasevethēheha nehayau hedauauwuu, nau haewauthanauau hauāyāhehauau nau hauthauau haenedauguvā.

30 Hau wauthaunauhāhehau nau Nesethajauhuhauau haeaunevā hethauguhādaunau, naudū haenethevethehewauna nau haenedaveyāwauna hauāyāhehauau nau wauchudauhuhauau, hathāhaugaanee?

31 Nau Hejavaneauthusaun hanaāauchuhananadethāthee, hathāedāenaedethee hehauwuvathehā naudaunehāhew; hau hathāasauwauvahethee.

32 Nāhauwujenauusa haudnadethu hethahethee hau wauchudauhuhauau hadnaugaudanenee hegaugauuthajaudenenau.

33 Nau hathāhuk naudū hethauguhādaunau Jaun denauaunenau-gauyānethe, nau devevethahethee, nau naasedauthēe hethauguhādaunenau Nesethajauhuhauau; hau hanethenaunauau havethehethēe nau havaveyāthee?

34 Nau hathāhaugaanee, Gauhājeneenesehauva dāeyaunauauau nedauenenedaunee hauauwuu naugauyaude hajesanedaundaunāthee waunenenehew?

35 Hau hese haudnauauchuu, haudneedanauwunana waunenenehe, nau hee hadnaāenaugauyāthee hena hese.

36 Nau hanaāanadethaude jea jegausauhānee; Henane hehauwu jenane waunauyaunee neauthayew hadaugauthāyaunee, hith hesedauhuk, nau hadauwayaunee needaudenauuu, nau jasia needanee hadau wayaunee hehauwunauchauna gauhāyaunee.

³⁷ Nau hegau henane hehauwujenane waunauyaunee vasevenenaje gauthānevevajaunaa; nau wauāthe wauyaugu vasevenenaje haddaudeauau nevajaunau, nau hadgusenauauau, nau nevajaunau haddenanaunauuu.

³⁸ Hau waunauyaunee vasevenenaje hadedaunee hadauwauyaunee nevajaunau, nau nanesauuthadee.

³⁹ Nau hegau henane hesevanaagu gauthānevevasevenenaje nauhauhaunee haevathehaa waunauyaunee; hanau gauthāyaunee hethadee, hathauhuk.

6

¹ Nau hethauwuu naneseauwauau vadanese, haehedesa jenayaunaa; nau hethauguhādaunau haegaugauunauwuu wauchunethauauhanau, nau haevethenauau, haegaunee gudenauau hejadenenau.

² Nau hauthauauau Nesethajauhuhau, Naudu hanesedauna waujaa nanavanau nesedaude vadanese hathauhaugane?

³ Nau Hejavaneauthusau hanaāaachuhananadethaude, Gauhājethaunauhaude nuu hasauau David neesedaude, nehayau deasenade, nau neethāenethaunāde.

⁴ Neesejedāde Hejavaneauthu hedauauwunene, nau needanauau nau nevethee nauhauthethājauaujau, nau haevana heethāenethaunau; waujaa nanavanau veyāgu hau jāsaa vevethahevehauehau?

⁵ Nau hanaāāedauwunāthee, Heau henane nanethadāde vadanese.

⁶ Nau hethauwuu jea jāsaa vadanese haejedā vevethahenauauwuu nau haeautheda: nau henane haenedau hejavese hejadenaa haeseevane,

⁷ Nau wauthanauhāhehau nau Nesethajauhuhau haeauauyauhauvaa, wauau haadenayauthā vadanese; hadnejauaudaunauthee dauhanājauwauaunauthee.

⁸ Hau haeanauwuu hegaugauuthajaudenenau nau hanaāanadethaude henanene hesevenasanith, Gauhā nau yethaagu nahethāe. Nau haegauhā nau haeyethaagu.

⁹ Hejavaneauthusau hanaāāedauwunaude, haudnaudedauauthana nananena hanesadee; Gaujenanavanau vadanese hethadāgu hasedaunee, nau wauāthe wauchudauneagu? henayauhāgu henaedede, nau wauāthe nanaunehāgu?

¹⁰ Nau hanaāenaunauānede vahee, hanaāāedauwunaude henanene, Segauha hajade. Nau hanaasedaude: nau hejade haenayauhune jāsaa hasaunee.

¹¹ Nau haechauchaunaudenauau hasenaunade: nau hanaāaunauchuwuhadethee daun haudnesehauthee Hejavaneauthusaun.

¹² Hethauwuu hena hese, haehau hauanee haudnevevethahede, nau haunaude naugaunee haevethedauna Hejavaneauthu.

¹³ Nau hāesenee, hanaāadethaude hethauguhādaunau; nau haedana vadadauchenesenee, hanaāeneseaude vadauhanauau.

¹⁴ Simoneau (jea haeaugauthea Peda haseauhuk), nau Andwheau henauhauwauau, James nau Jaun, Thenib, nau Bathaunaumew,

¹⁵ Matthew, nau Taumis, James heau Atheas, nau Simon Zenautes haseadagu,

¹⁶ Nau Judas James henauhauwauau, nau Judas Iskariot,* hanane jea neheaudaunade Hejavaneauthusaun.

¹⁷ Nau haejenauunethauna nau haetheaugunauau hethauauwuu, nau hadauchunanenethe hethauguhādaunau, nau haevasenauthenanadau

* **6:16** "Iskariot" is spelt with a "k" here but in 22:3 with a "c". Biblical names in this text generally but not always follow the spelling of the King James Version (KJV).

henanedanede hehethee vahee Judea nau Dādaunedan, nau hehethee sasethauwu hadajee Tyre nau Sidon hethāejenuujaarhēhādaunau, nau haudnenayauhāthee hedsauwauvahedaunenau;

18 Nau hathāenaunauthauwauvahethee wauchāhenethe haujaunau: nau haenayauhaunauau,

19 Nau haunauude hadaucha haevadauvasanau hanau daunude-sanaunee hevadaude nau haevahenayauha.

20 Nau hanaāenāuhauwaude hethauguhādaunau, Hauwunaunana nananena hadavenuhunena; hanau nananena najanede Hejavaneauthau, hathauhuk.

21 Hauwunaunana nananena hathāasenana hewaunehaa: hanau nananena hadnegaudana. Hauwunaunana nananena hathāevewauhuna hewaunehaa, hanau nananena hadnauchaunena.

22 Hauwunaunana nananena, henaneda hasānavānā, nau jaasauaunānā, nau naunaunauthevānā, nau hausāgudenauthē haneseedaunenau hadauwusaunee, haugau Henane Heāhene heee.

23 Haunauwuthajauau henee hesee heee, nau jajanauauau heee hau-nauwuthajau: hanau, naune, hanavanasauau hadaugauthēavadenenau hejavaa: hanau naneesedaulyaugaune henesaunaunenau naneesehauhau-gaunee haeyāhehau.

24 Hau naunauthauau hadnauauchaudaune hathāeveaunauaune; haugau hanesedanauwuna hauwauthenaedede.

25 Naunauthauau hadnauauchaudauna hathāegaudana; haudnasenana. Naunauthauau hadnauauchaudauna hathāechaunena hewaunehaa, had-naudauwuthajaua nau hadvewauhuna.

26 Naunauthauau hadnauauchaudauna, daunhāene vahee henaneda hāethadenee hasenehethānā, hanau henesaunaunenau naneesehauyau-gaune jayaudauwaeyāhehau.

27 Hau hadāedauwunathava nananena hathāenedauvana, Vechauthaa nana-nena haujauthavenau, heneehaa hasānavādaunenau,

28 Hauwunaunaa hāwauwauchuvādaunenau, nau hevevethasaa hāwauwauchuhādaunenau nananena.

29 Nau henee haudauuvāde hajāeaunaa nau naugautha venene; nau hedanaugaunau nananene hauddu jevaedanau jea naudauguvechude je-vaethaa.

30 Hevenaa daun henaneda hānedauwunādaunenau nananene; nau jeva jaenedauwunaa hedanauwunānagu daun hanetheyaunenau.

31 Daun hasevathehānaune henaneda hesehānenagu, nechau jenaase-haude.

32 Hith nananena vechauthaunagu daun havechauthādaunenau nananena, haddusevaveeneva nananena? haugau wauwauchudauhuhauau nechau nevechauthauthē hethāevechauthādaunenau.

33 Nau hith nananena hethadāgu hasehaunā daun hāneneehādaunenau, haddusevaveeneva nananena? hanau naneesedaulyaugaunee wauwauchu-dauhuhauau.

34 Nau hith nananena hehaunagu daun hāneejaunaundaunādaunenau, had-dusevaveeneva? hanau wauwauchudauhuhauau nechau neehauhau-gaunee wauwauchudauhuhau, hadnejanaasesedanuu.

35 Hau vechauthaa nananena haujauthavenau, nau hethadeha hasedauna, nau hehānagu, jevajvathehāe; nau nananena haudau-gauthēavadenenau hadvasauau, nau nananena hadnaēdēyaunenena Javaājauthee: nau nenenehaude nethāejevaveenenethe nau hauhaugana.

36 Hedauwuyaunee nananena, nananena Hāsaunaunenau jea hasedauwuyaunede.

37 Jevaauchwuu, nau nananene hadnaajauchwuhane: nau jevaduguthāe nau nananena hadnehauwuduguhuva: hejaegudanauwuyāe nau hadnejaegudanauwunane nananene:

38 Vāe, nau hadnevenana nananene, vavesethajauauthāe, dāyāe, nau dāesathāe, nau haunauwauauthāe, hauchauva, henane hadvenāna. Nechau hadnaasethajauaudaunāna hasethajauauthāna hadnanesethajauaudaunana.

39 Nau hanaāanadethaude haejejegausuhu, Gaunanenauguhu jenenaūjetha nanenauguhu? Gauhaudjenesauujanesenaūu gauuhanaa?

40 Thauguthāhe hehauwujavaāhe hechauhauthehādaune: hau haunauude hanesāde daun haunauudaunāde hathāhenith hechauhauthehādaune.

41 Nau naudu hanauhaudauwu nananene hahavaa hejaheede hesesāe, hau haājevesehau havadauhaude hathāsewau hasesāe?

42 Wauāthe hauddusenehethau nananene hahavaa, Jāedaā, hadaugauhawunathe hajaheede hasesāe, hau daujenauhauwaude havadauhaude hathāsewau nehayau hasesāe? Nananene jayaudauwunaedehe, nedauau haugauhune havadauhaude hathāsewau nehayau hasesāe, nau hadenaāeneauvane hadenaāeneaugauhauwu jaheede hethāsathau hahavaa hesesāe.

43 Hanau hauhaude hethahagu hehauwuseaude wausaunee venenaudenau; nau wauāthe wauchahagu hauhaude hehauwuseaude hethadenee venenaudenau.

44 Hanau hadauchude hauhaude neaenaunede hanasaunee hevenenaudenau. Hanau hauchahevesee henanenauau hehauwunaadauhauānuu hauuyauchuwunau nau dauchuwusee hehauwunaadauguunee dadajevana.

45 Henane hethāde hehethee hethadenee heda nenauchaudede hethadenee; hau wauchāhede henane wausaunee heda nenauchaudede wausaunee: hanau waunauthaa hehethee hedahaa hede nanadenaunee.

46 Nau naudu, Vahadāhene, Vahadāhene, haesena, hau nejesedauna hayauhuhau hasenehethathana?

47 Daun nādasāde nau nedaunānaugu hasenehenaunauau, nau hesedauhuk, haudnauhauthehathana haudnethāde:

48 Henanene henee nenesedenethe hauauwu naathāde, nau henee nejayauchauhuu, nau naneejenanaūu hauauwuu dasee hauunaugāe: nau nauanaūu naje neje naunauthuu jaathāsāe henee hauauwuu, nau hehauwunaauvathāau: hanau daunāaudaa hauunaugāe.

49 Hau jaathedehe, nau janenaasedauthe, naathāde henanenau henee nedasauavānethe vedauauwuu; nau neje jaathāsāe naunauthuu, nau nauhauhaunee naunenauauau; nau thauwusāe henee hauauwuu nevasauau.

7

1 Wauhā hāevathanadede vahee hanasenehede daujjaathehade henanedanede, haejedā Capernaum.

2 Nau jasia vanenenaja hewauwaune haevechautha haeaugauwune, nau haeyānajane.

3 Nau hāenedauwauthaude Hejavaneauthusaun, haeautheava vachaugananaunau Jews, haadetha hadjaunith nau hadnenayauhaunith hewauwaune.

4 Nau hāedauchauthee Hejavaneauthusaun, haeautheauwau-nauthasanauau haugaunaanee, hanau hethāde naa henane naa haudneenesedaude, hathauhaugaanee:

5 Hanau vechaudauau nadedanenau, nau nenesedaunānauau vevetha-henauauwuu.

6 Heee Hejavaneauthusau hanaāejasesenethaunāde. Nau hāeauchauau hauauwu, vanenenaja haejajedauaunanenau henedaehauhau, Vahadāhene, jevawauchuthajau Nananene: haugau wauchāhenau hadjedāne naudauauwuu, hathauhuk:

7 Nanaa nāejewauchanavade daudasathane: hau vavade nehedau hanadede, nau naudautheau hadeenanedanede.

8 Hanau nananenau nanethenanenenau naunaudāhenau, nanethenu vanenanenauau, nau naāēdauwunauau hanesāde yehau nau naējathāude; nau jasaa, Nahāje, hathauau nau jaunaude; nau naudautheau, Nesede, hathauau, nau nanesedaude.

9 Hejavaneauthusau hāenedauwaudauau nuu hayauhuhau, haegaugaua-nava, nau haenauthegauthaagu, nau hanaāēdauwunaude henanedanau hethāethauguhādaunau, Hadāedauwunathava, Haunauau nāhauwuveehau vasee hethauwuthajuhu (naa hathāde henane), hegau, hehauwu haduu Israel.

10 Nau henee hathāauthavathee, hāejaenuusathee hauauwuu, haevve-hanauau wauwaune haenanedanene henee neasauwauvāhenith.

11 Nau hethauwuu jasaa hesee, hanaāehaude hedan Nain haseenauiyāgu; nau haewauthanenau hethauguhādaunau henethaunādaunau, nau hauwuhuu henanedanede.

12 Wauhā hāayānauusade hejavaaa dajanaunaa hedan, naune, naa najaa henane naunudanade, jasāsau henaune, nau haenevesānene: nau haewauthane henanedanede hehethēe hedan haenethaunaa.

13 Nau hāenauhauwaude Vahadāde haeauwunauna, Najenaudāve, hathauhuk.

14 Nau haedasa nau haevasane nauaunechauthau: nau hethāenauaunechauhādaunau haedādauiyagunenau. Haunaua, hāedauwunathane, Thauwauthe, hathauhuk.

15 Nau henee nenajaa haethauwaudaugu, nau haenaāejasesanadede, nau hanaāevenaude henaunene.

16 Nau nāthajaude haedasā vahee: nau haevaveenethedaunanauau Hejavaneauthu, Havathee haeyāhe hanejauaude hadedanene; nau, Hejavaneauthu haenauujādauna henesaunau, hahagaanee.

17 Nau nuu dauauthedaunenede haenadesanaune vahee Judea, nau nanadee gauānee vedauauwuu.

18 Nau hethauguhādaunau Jaun haeauthedaunaa vahee nuu hayauhuhau.

19 Nau Jaun haedetha hanesenethe hethauguhādaunau haeyethautheava Hejavaneauthusaun, Gauhanane henee waudaudjaude? nau wauāthe gauhadnaudenauhauwau jasaa?

20 Hāedauchauthee henanenauau, Jaun Dusaayāhe janādauthēavānauau Nananene, hathauhaugaanee, hanaāenaudeaunauthee, Gauhanane henee waudaudjaude? nau wauāthe gauhadnaudenauhauwau jasaa.

21 Nau vavade hāauchauau haenayauha haewauthanenau vavavāuhuhau nau havathee haugauwude, nau wauchāhenith haujaun; nau haewauthane-nau nanenaughuhau haevna nauhauthau.

22 Hejavaneauthusaun hanaāēdauwunāthee, Najajathāauau, nau hadāedauwunauva Jaun hathāhaugaanee, hayewhu hanathauhauthāna nau hathadauvana; hasejaenauhauthāde nanenaughu, jeneejavesāhe

daujavesade, naunaujaunee hedaugauwudaunenau dauuyaudahethee, hayājādāhe daunedauvade, gaujauaudahehe daujaethauwauthede, hadavenuhu hethadenee waunauyaunee dauauthedaunade.

²³ Nau hauwunaunade daun najewauchuthajaudaunāde.

²⁴ Nau hāejathāaunethe Jaun hedautheauenau, hanaāejasesanadedauau henanedanede hasenaedenethe Jauneau, Hayew nananena haewaunenauhauthaunenau nauaunee? gaugauguyāse daunauauvasee?

²⁵ Hau hayew nananena hāewaunenauhauthaunenau? Gauhenane hedāchaunau hejajehaunenau hedāchaunau? Naune, nethāeneenuhuthee, nau neneenaedethee thanāsee nenauchuwunethe hedauauwunenenu.

²⁶ Hau hayew hāewaunenauhauthaunenau? Gauhaeyāhe? Haa, hadāedauwunathava nananena, nau javaāsee haeyāhehau.

²⁷ Naa nananene, wauthaunese, Naune, hadjejenanauau Naudautheau hathaaguna, hadnesedaunāna hauvaunenau sayānee Nananena.

²⁸ Hanau nāedauwunathana, hadedanenu nethāenesaunavāna hesānauau hehauwujavaāse haeyāhe hathāde Jaun Dusaayāhe: hau hena haugajehede hanedauhuk henajanedauene Hejavaneauthū javaāhehuk.

²⁹ Nau vahee henanedanede hathāenedaunāde, nau hauāyāhehauau, hanaāechuwauthethajaudaunauthee Hejavaneauthū, haenethedusaanā dusaayāhew Jauneau.

³⁰ Hau Nesethajauhuhauau nau nanavaavehehau yese nehayau haeausagudenauau hevathēhādaunene Hejavaneauthū, haejenethedusaanā (Jauneau).

³¹ Nau Vahadāde hahagu, Hayew naudneedajenehethau henanedanede nuu henaedede? nau haethahenauthe?

³² Waude dāeyaunauauau hathahethee theaugunauthe haudau-nanauauwuu, nau danadethadethee, nau nanāhethee, Nevadauhana, hau nananena nejavadana; naudauwuthajaudauwunana nananena, hau nejewauhuna.

³³ Hanau denausade Jaun Dusaayāhe dejevethee jauaujaunau nau deejevanaa vasevenenaje; nau nananena nanethenaude haujaun, nethauna.

³⁴ Heau henane daunausade dauvethede nau dauvanaa; Nauhauvaa naa henane naudaudāhe, nau vasevenenajevanehe, henedaehauhau hauāyāhehau nau wauwauchudauhuhau, nethauna.

³⁵ Hau haeyaude chaunuwuthajaudaunaude vahee hedāeyaunewau.

³⁶ Nau hanesāde Nesethajuhu haeadetha haudjewaunenethevethehevāde, nau haeyehau haejedā Nesethajuhu hedauauwunene, nau haejanaugu hadvethede.

³⁷ Nau, naune, hesā hedan, haeauhaugane, hāaenaunaude Hejavaneau- thusaun daujanaugunith hadvethenith Nesethajuhu hedauauwunene, haejāchaude jāavasaa chauayau,

³⁸ Nau haetheaugu hegauwune heauthene haevewau, nau hanaāejasesahesadede heauthene hee hedejee nau haehaenauwu hee hethaenene, nau haenedane heauthene, nau haechauane hee chauayau.

³⁹ Wauhā Nesethajuhu hāadethaude hāenauhauwaude, haejaevenanadethade, Naa Henane, haeyāheyaugu, hanaenaunaude daunhadāhenith nau daunhathāhenith nuu hesāne hevasanādaune: hanau wauwauchuduhu, hahagu.

⁴⁰ Nau Hejavaneauthusau hanaāēdauwunaude, Simon, haudnāedauwunathane nananene. Nau hanaāenehethaude, Hechauhauthethāhe, nanehe.

41 Hena jasaa sayānedanauwuyau haenesenenau hesayānedanauwunādaunau: hanesāhenith yauthaunevadadausauau vāejethā, nau jasaa yauthauyauau.

42 Nau hāeyauhuunee haunaudauhudaunene, haenanethauaunegu-danauwuna nesauuu Jeāedauwune, hanaane hevechauthādaune javaānee?

43 Simon hanaājeāedauwunaude, Nauchāe nananenith heneehe-javaāgudanauwunaune. Nau hanaāēdauwunaude, Nananene neaenauwu.

44 Nau hanaāeyethaagude hesāne, nau hanaāēdauwunaude Simoneau, Gauhaunauhauwau nananene naa hesā? Nananenau nejedānau haudauuwuu, nananene hāehauwuvene naje heee nauaudau: hau neheahesad-e nauaudau heee hedejee, nau neheahenauau henethaa.

45 Nananene hāehauwunedane hau naa hesā hāenausanaunauau hehauwuthauujenedane nauaudau.

46 Naudauguhua nauugu javeda nananene hajechausānene hau naa hesā nechauanauau nauaudau heee chauayau.

47 Naa hāedauwunathane nananene hewauchudaudenau waunauthanee gaunudanauwunade; hanau dauvechauthāde javaānee hau daun vanehaa gaunudanauwunade vavade hasevechauthāde vanehaa.

48 Nau hanaāēdauwunaude hesāne, nananene hauwauchudaudenau jaegudanauwunane.

49 Nau hethāenedauguvādaunau dauvethethee hanaāejasesanadethee hegaugauuthajaudenenauau hanaa naa negudanauau wauchudaudenau jea?

50 Nau hanaāēdauwunaude hesāne, Nananene hadethauwaudaude henayauhāne nananene; najesa hadnauwauthenesane.

8

1 Nau hethauwuu waunee haejathāau nanadee hadauchanenee hedan nau hajasehedan, dauaunauthedade nau daunaunauhauthethāde neetha-jaude waunauyaunee hasaunee henajanedanene Hejavaneauthu: nau vadadauchunesenee haenethaunaa,

2 Nau jasaa hesānauau, haenayauhau dewauchāhenethe haujaunau nau vavavāauhuhauau, Mare haseadagu Magdalene, naunudanavathe ne-saudauchu wauchāhenethe haujaunau,

3 Nau Joanna henene Chuza Herod hadāhevāhe, nau Susanna, nau hae-wauthanauau hauthauauau, hevenādaunau hethāenetheyaunenenu.

4 Nau hāeneenawauthaa henanedanede dauuāchaudenee, nau haedasaa hehethee nanadee hedane, hanaāeanadede jegausauhānee:

5 Jenayāhe haewauneneāgude hejenayaunau: hauthauau haejajanesanau vaunaa; nau haeauguhudaunene, nau neahehauau hejavaa haeaudau-vanauau.

6 Nau hauthauau haedasegaugausanau hauunagāe; nau chauchaunu hāeveseuu, haenadadanau, hanau daujenajenee.

7 Nau hauthauau haejajanesanau hegauau dauchuuwusee; nau dauchu-uwuse haenauguveseaunau, nau haeajedaunanā.

8 Nau hauthauau haegaugausanau dasee hadauuthadee vedauuwuu, nau haeveseaunau, nau haeneeaunau vadadausauau jenayaude. Nau hāenehedauau nuu hayauhuhau, haevasenehe, Daun henaudaunenede, nanehanedauvade.

9 Nau hethauguhādaunau haenaudedanua, duthanau nuu jegausudede, hathāhuk?

10 Nau hahagu, Nananena vanenana haudnaenauwuna jaeyaunau hena-janede Hejavaneauthau: hau hauthauauau janegausauhuthee; hadne-nauhauthathee havajenauhaudauwu, nedauvahehauau havajaenauwu.

11 Wauhā, heyew hasauau jegausudede: Jenayaunau hedenehede Hejavaneauthau.

12 Henee vaunaa nanathee nenedauvathee; hanaāenauusade haujau, nau nedanauwunāthee hanadede hedahenauau, naseduhuu hethauwuthajauau, nau hadenanedanena.

13 Henee hauunaugāe nanathee, nanedauvanauthe nesedanuu hanadedaunau nauguu haunauwuthajau; nau nuu hehauwuthājenenauau, vanehaa nethauwauduu, nau nauauchaudaunauthe vasehadede naneenaunegauhuthee.

14 Nau henee nejajanesāe thauhauthauchauyauau dauchuuwusee nanathee, hanesenedaunauthe, naneejathāuthee, nau neenadejethathee hee haunaunethaude nau nethauyādahede nau haunauwudaude, hee nuu henaedede, nau hehauwunauuchaudenauau vevenaundenau hadauyauthaunee.

15 Hau henee hadauuthadenee vedauauwuu nanathee, hethauvahethee nau hethadenee hedahenau nenedauwauduu hanadedaunau, naunaunedethee, nau nenauchaudethee vevenaundenau hee jenauwauaunee.

16 Hegau henane, hāesedeauchauuu nauauuthayau, hehauwaugau hee vasenau, nau wauāthe hehauwujenane thānee hauvaa; hau nethānauau nauauuthayau neetheaugunee daun janedāde hadenauhaudauau nauauuthayāgu.

17 Hayewhu hehauwuyauthesa, haudjauthasenesee; wauāthe hayewhu hehauwuyau hadjaenaunee nau hadnejaunauau hauthasauau.

18 Haunauyauhaudauwuu hanathadaunā: daun nanethenaude, nananede haudnevenade; nau daunjanenethenaude, nananede haudnedanauwunade daun henetheyaunau.

19 Hanaāedasāde henaune nau henethesaunau, nau haejenedasaa hee dauneethenedaunenee.

20 Nau haeāedauwunaa jachau hathāhuk, Hānau nau hāthesaunauau theauguthee jathee, vanadaunauhauvānaune.

21 Nau hanaāauchuhananadede nau hanaāāedauwunaude, Nānau nau nāthesaunauau nuu nanathee nanedauwauduu hedanadedaunene Hejavaneauthu, nau naasedauthee.

22 Wauhā hethauwuu jasaa hese, haejedā thewaunaa nauguu hethau-guhādaunau: nau hanaāāedauwunaude, hadeyhaunau hauchaunau neajee: nau hanaāejathethuauthee.

23 Hau hajechuauthee haenaugau: nau hanaāenauasaa neajee haenaudasa; nau haechauchaunane naje, nau haeanedaudauwugaujauaudahede.

24 Nau hanaāedauchuthee, nau haeauwadananauau, Hechauhauthethāhe, Hechauhauthethāe,* gaujauaudāhenauau, hathauhaugaunee Hanaāethauwauthede, nau hanaāēneudauau hasāse nau dasenaunanaunee naje: nau hanaāedauunauuu, nau hanaāedādauyauau.

25 Nau hanaāenehethaude, daude hadethauwaudadenenau? Nau haenāthajaunauau haejenaunethajaunauau, Dauhuthenane naa, hanathada-gaunee; haachuwwude hasāse nau naje, nau hanaāethauwaudaunāde.

26 Nau hanaāenuusathee vedauauwuu Gadarenes, hauchaunau Gananee.

* 8:24 Possible missing "h" in "Hechauhauthethā(h)e" ("Master").

27 Nau häeyehaude vedauauwu, hena haenuchaunaa jathee hedan jachau henanene, haenethena haujaun dajechauau, nau haevedauauchauna, haenaede hauauwu, hau nedauthānavathe gaujauaudahehehau.

28 Hāenauhauwaude Hejavaneauthusaun haevasanade, nau haechaagujanaugudauna, nau hanaāevasanadethaude, Hauddusehathe, Hejavaneauthusaun, Nananene Heau Hejavaneauthau javaājauuthee? Nenedauwunathane Nananene jevanaunauchauthehe.

29 (Hanau haenesedauwauna wauchāhenith haujaun hadjenauhenith hehethee henanene. Hanau nauaunee dauhusedanāde: nau naunaunehade neduguhude heee vāejethāduguthaunau nau nesaunajethaunau; nau haegaugachauagude heeduguhudaunau, nau haejathethasauaunaa haujaun hese nauaunee.)

30 Nau Hejavaneauthusaun haenaudedanaa, Haudusee? hathāhuk, Nau hanaāēdauwunaude, Waunauthade: hanau dewauthanethe haujaunau hethāchadaunādaunau.

31 Nau haenedauwunanaunau hadjenesedauwaunathee hadjeyehauthee hethauvaa.

32 Nau hena haewauthanaunau neauthuwauchu nevethethee hauanee: nau haenedauwunanaunau hadjenanāthee wauhaunee. Nau haejenana.

33 Hanaāenauahethee haujaunauau hehethee henanene, nau haewauhaunesanaunau neauthuwauchuu: nau vahee neauthuwauchu haejathegauhunauau neenane janahuu yese neajee, nau haevanadeavenauau.

34 Hāene henee nachauwauthee daunauhauuu hasedaudenene, haedaugauhunauau, nau haejathāaunauau nau haeauthedanauau hedan nau vedauauwu.

35 Hanaāeyehaudenee hadnauhauwu daun hasedaudenee; nau haedauchau Hejavaneauthusaun, nau haevauhau henane, heneenauthāde haujaunau, haetheagu heauthene Hejavaneauthusaun, haedāchaunene, nau haechuwuthajaune: nau haenāthajaudene.

36 Henee nenauhauwauthee haeauthedanauau neesenayauhade nenethenau haujaunau.

37 Hadauchaa hathāauavaa Gadarenes gauānee haejathethajenāhenauau; hanau dauusāhede: nau hanaāeyehaude nauauhuu jethee thewaunaa, nau hanaāejaesade.

38 Wauhā henane nenthāde haujaunau haenethaa hadnenethaunāde: hau Hejavaneauthusaun haejathethajenāhe, hathauhuk,

39 Jaeyehau haudauauwu, nau hadnauhauthethā hathāenavasauau hayewhu Hejavaneauthau hasehāne nananene. Nau hanaāejathāaude, nau haeautheda nanadee hathāaunee hedan hathāenavasauunee hayewhu Hejavaneauthusaun hasehāde.

40 Nau hethauwu hāejaenauusade Hejavaneauthusaun, henanedanede haenethajaudanaa: hanau haevadauyauhauwau.

41 Nau, naune, haejenauusa henane Jairus haseagu, nau hadāhevāhe vevethahenauauwu: nau haeuāneseve Hejavaneauthusaun heauthene, nau haedetha hadjewaunejedānith hedauauwu:

42 Hanau haenesāhene hedaunau wauau hanesenee jajenevāhe, nau haeyānājane. Hau hajesesade henanedanede haevauhaunaa.

43 Nau hesā haevathaude nesenee jajene heee, haevathede haunauude hevāejethāwau heee naudaunehāhehau, hau haejenayauhau,

44 Haedasa hegauwune, nau haevasane naunauchuu heduwune: nau chauchaunau haejenevathaude.

45 Nau Hejavaneauthusau hanaa navasanāde hahagu? Hāevahethedauwaudenee, Peda, nau hathāenethaunāde, Hechauhauthethāhe, henanedanede vauhaunane nau naneethenane, nau hanaa navasanāde, nesehene? hathauhaugane.

46 Nau Hejavaneauthusau, hanaadee vasanānu, hahagu: haenauwau daujasesenauau vadaude hehethee nananenau, hahagu.

47 Nau hāenauhaudauau naa hesā daujeyauthesee haejeyehau haeahenauau, nau hanaāechauāgujanau gudaunade, haeauthedauna hauthasee vahee henanedanede hathavasanaude, nau hasenayauhāde chauchaunu.

48 Nau hanaāēdauwunaude, Nauddau, nanehāuwauthenaedene: nananene hadethauwuthajau hēnauauhāne nananene; najesa haunauwuthajau.

49 Hajesanadede, hena haejau hanesāde hehethee hadāhevahew vevethahenauauwu, haeēdauwuna, Haudauna najaa; jevajenaunevene Hechauhauthethāhe.

50 Hau hāenedaunāde Hejavaneauthusaun, haenaāēdauwunāde, jevanāthajau: hethauwuthajau vavade, nau haudnenayauhade, hathāhuk.

51 Nau hāejedāde hauauwu, henanedane haejevadaujedāne, vavade Peda, nau James, nau Jaun, nau henesaunaune nau henaune hesāhedāeyaune.

52 Nau vahee haeviewahudaune, nau haeaudauwuthajauhā: hau hanaāenehede, Jevavewauhuu; hehauwunaja, nauthe naugauhude.

53 Nau haeauthanauau haevachunaunanauau, dauaenaunauthee daunajanethe.

54 Nau haevanudana, nau hanaāedanau hējadenene, nau hanaāanadethaude, Hesāhee, thauwauthe, hathauhuk.

55 Nau hevadathuwu haejaedasaa, nau haethauwauthe chauchaunu nau hanaāenehede hadnauchauvavathe.

56 Nau henehā haegaudauwuthajauenau: hau haeēdauwuna hadjāedauvanethe henanedaa hasedaude.

9

1 Hanaāadethaude vadadauchu nesenee hethauguhādaunau hauānee, nau haejaanauwuna naudahede nau hadvaheneedauthee nanadee vahee haujauna, nau hadnenayaudethee haugauwude.

2 Nau haejenana hadnauthedaudauwunethe henajanedauene Hejavaneauthu, nau hadnenayauhaunethe hasauwauvahehehau.

3 Nau hanaāēdauwunaude, Jevaedanauwu hayewhu heee hajavechaudenau, daudause haugaudauhunau, daudause newaugusajaānauthau, daudause jauajau, daudause vāejethā; daudause jevanagusuechudaunaa.

4 Nau daun hauauwu hadaujedānā jenaadauna, nau jenaatjethāauna.

5 Nau daun hajethauhauvādaunenau, hāenauahenā hena hedane, hade-gauyāējaheva naudauyāgu hadneaenaunathee.

6 Nau hanaāejathāuthee, nau haehedesanauau hauauwudan, haeauthedaudauwu hethadenee waunauyaune, nau haevahenayauthānau nanadee.

7 Wauhā Herod naja haenedauva vahee hanasedaudenenee heee: nau haejaene, hanau haenaasenehedaunee gauuu, henee Jaun jaegauhāde hehethee denajaa;

8 Nau gauuu, henee Elias naunauhauthethāde hedanayau: nau hau-thauauau, hanesāde dajechauau haeyāhehauau jaegauhāde.

9 Nau Herod haenehe, Jaun nedavaāsauau: hau hanaa naa, nanedauwauthau? Nau haevadaunauhauva.

10 Nau vadauhanauau, hāejaenuusathee, haevahauthedaunaa hanasedaunethe. Nau hanaāedanaude, nau hanaāejathāauthee hevenanee hese hadaunechaudanee hathauau hedan Bethsaida haseāgu.

11 Nau henanedanede hāenuu, hanaāethauguhauthee: nau haeesedana, nau haeauthedauna hasaunee henajanedanene Hejavaneauthu, nau haenayauha hathāevadaunayauhathee.

12 Nau hāyānaesade, hanaāejenuusathee nesenee, nau hanaāenehethāde, Nanehāejathāaudenee henanedanede, hadeehaudenee hauauwudan nau vedauauwuu nauanee, nau hadenethee, nau hadejasedauthee vethewau: daunechaudaa hadaunauau.

13 Hau, Venaa nananena hadevethedeaunee, hathauhuk. Nau hanaāēdauwunauthee, Hau nanethenauwunauau hehauwujavaānee hayauthaunāe jauaujaunau nau hanesethee nauwu; hanāyehaunee nau haunadaunauhuu vethewau hee vahee nuu henanedanede.

14 Hanau wauau haeyauthaune vasevadadausauau henanenauau hanaadauchuthee. Nau hanaāēdauwunaude hethauguhādaunau, Janauguhā yauyauthauyauaugunauha.

15 Nau hanaasedauthee, nau haevajanauguhanauau.

16 Hanaāedanauau hayauthaunanenee jauaujaunau nau hansenethe nauwu, nau hanaāejenāaugauade hejavaa, haevethasa, nau haenaāejeanauu, nau hanaāevenaude thauguthāhehau haudjenanauwunethe hathaājedaunenee henanedanede.

17 Nau haevethedeaune, nau haevahegaudaudene; nau haeauānenau jeyauwaunau hathāenathaudāe nesenee hanaadauchāe hanechauchaunāe nethaudanee.

18 Nau hethauwuu, haenesenane, dauvethahede, Hethauguhādaunau haenethaunaa: nau hanaāenaudedanaude, Hanaa nenehede henaneda daunanenu? hathauhuk;

19 Hanaāauchuhananadethauthee, Dusaayā Jaun; hauhauthauauau nethee Elias; nau jasae nethee hanesāde dajechauau haeyāhehauau jaegauhāde.

20 Hanaāenehethaude, hau hanaa nenehede nananena daunanenu? Peda hanaāauchuhanāedauwunaude, Chris Hejavaneauthu.

21 Nau haeneenadauduvā, nau haenesedauwaunā hadjāedauwunaunethe henanedanau henee;

22 Heau henane hadnasenede wauthanee hee hayewhu, nau hadnausāguthāde vachaugānanenu nau naja vevethahevahehauau nau wauthaunauhāhehauau, nau hadnaade, nau hadjaegauhāsanade nasese, hanathauhuk.

23 Nau hanaāevahāedauwunaude, Hith henaneda jethauguhānaugu nanehanaūchauthehadade, nau jeedane henaugauchu hayauwusenenee, nau najeethauguhā.

24 Daun haunaugaunayaudedede hedenaedede hadnanadede: hau daun hanadede hedenaedede hee nadanayau, nananede hadnenayauhadede.

25 Hauddusedau henane, vahesedanauaugu hathāauauvadenee, nau hana-hadagu, nauwauāthe hausāguthadagu?

26 Daun naudauthedaunāde nau nadanadedanau, nananenu Heau Henane haudnaudauthedaunenu, hāenuusathee nehayau hadauvasāthanith, nau Henesaunaune hadauvasāthanith, nau vadane hauthaunauau hadauvasāthanethe.

27 Hau hadethauwuthedaunathava hauthauauau theauguthee hede, haudnehauwuvajadawuu gaujauaudahede, haunaude haudnauhauduu henajanedanene Hejavaneauthu.

28 Nau hethauwuu wauau hanasaudauchuse hāesenehede, Hanaāedanaude Peda nau Jauneau nau Jameseau, nau hanaāenauauhusathee hauanee hadn-
evevethahethee.

29 Nau hajesevethahede haenausāaune hedauchaveau haeanathadene, nau hedāchaunau haenaujaunenau nau haenaunauaugausauunenau.

30 Nau naune haenadethaa hanesenethe henanenau, haenanenenau Mosaseau nau Eliaseau;

31 Daunauhauthethāde hedanayau haenausāaune, nau haeauthedaude haidgaujauaudāde hadvathechauchaunaude hehethee Dādaunedan.

32 Hau Peda nau hethāenethaunādaunau haenauwaunanenu: nau hāauwaudauaunethe, haenauhaudauwunenau henausāaude, nau hanesenethe henanenau haenethauguvaa.

33 Nau hethauwuu, hāenauthāde, Peda hanaāanadethaude Hejavaneauthusaun, Hechauhauthethāhe, hethadee hasanedaunee hede: nau hadesenedauna hanasāe nenaunau; hanesadee Nananene, nau hanesadenee Mosese, nau hanesadenee Elias; haejaene daunhasenehede.

34 Hajesanadede, haejenausanau henaunauade, nau haeduguaunā: nau haenāthajaunau nau daujedāthee henaunauadee.

35 Nau haejeanadedaune hehethee henaunauadee, Naa nananede Navechauthau Nāa: nedaunaa, hāheagu.

36 Nau hāesanededaunee, Hejavaneauthusau haenesenane. Nau haeyaude-
nauau, nau haejāedauwunanaunau henanedane hena hesee neanāthauhaudu.

37 Nau hethauwuu, dauauthesenenee, hāejejanauhusathee hehethee jauau-
dane, haegauāhenenau henanedanau hejajedauaunādaunenau.

38 Nau, naune, henane hehethee henanedaa haevasanade, Hechauhauthethāhe, nenedauwunathane Nananene, daugauhauwune nāa: vavade-
naanesāde nadāeyauneve, hathauhuk.

39 Nau, naune, haujaun hedanāde, nau chauchaunu haedauyānade; nau haethauwuguthaa haevevechauchaunaude jeda, nau haeasenehaa hae-
jechuwauthenauthaa.

40 Nau nananenau neauthewu hāthaughādaunau hadnausāguthauthee; nau nejeenedauthee.

41 Nau Hejavaneauthusau hanaāauchuhanadethaude, Hau hāhauwuthauwuthajau nau daujechuwauthenaedene, haudedauhjes-
enedauguvathe, nau haddauhjesenethauguvathe? Jāsene nananene hāa hede.

42 Nau hajesejaude, haujaun haeuneguthaa, nau haethauwuguthaa. Nau Hejavaneauthusau haeneneuva wauchāhenith haujaun, nau haeenayauha dāeyaunauau, nau haejaevana henesaunane.

43 Nau haevagaugauanadauwu hasevasenaudāhenith Hejavaneauthu, Hau hajeseгаugauanadu haunauade vahee hayauhuhau Hejavaneauthusaun hanasedaunith, Haeāedauwuna hethauguhādaunau,

44 Chuwauthee nuu hanadedaunau jedānauha haunadaununenau; hanau heau henane hadvenvathe hejadenene henanenau.

45 Hau haejaenauwu nuu hasenehenith, nau haeyaunaunauau, hae-
janauwu: nau haeedaunaudeaunanaunau hasenehenith.

46 Hanaāegaugaunededaunee, hanaadee haudvasāthaa.

47 Nau Hejavaneauthusaun, haeanauwu hanasethajauthee hedahenauau, haeedana dāeyaunauau, nau haeauyejanauguna,

48 Nau hanaāēdauwunaude daun hanesedanaude nuu dāeyaunauau nane-
seedaunaa hadnesedanānau: nau daun nāsedanāde haudnesedanaude

nājejenanādaune; daun javaānadavenuhunede haunauude nananena vahee nananede hadnaasevasāthaa.

⁴⁹ Nau Jaun hanaāauchuhanāedauwunaude, Hechauhauthethāhe, neenauhauwaunauau hanesāde nenuguthaude haujaunau heee haneseede; nau nedauduwaunauau, hanau dauhujenethaunānauau.

⁵⁰ Nau Hejavaneauthusaun hanaāāedauwunāde, Jevadauduvaa hāhauwasānavāne nanesevānauau.

⁵¹ Nau hethauwuu, hāenauauchaunee hadneejejanauhudanāde, haechuwuyethaāne hadnehaude Dādaunedan,

⁵² Nau haeautheava sayānee: nau hanaāejathāaunethe, nau hāejedāthee hajasee hauauwudan Samaritans, hadnesaanudaunāde.

⁵³ Nau haejesedanaa, hanau dauyethaāsade Dādaunedan.

⁵⁴ Nau hāene hethauguhādaunau James nau Jaun daunauhauwunethe nuu, hanaāenehenethe, Vahadāhene, gaujevadaunedauwaune heseda hadjejanauhusanauau hehethēe hejavaa, nau hadnevadauchauthee, neesedaude Elias?

⁵⁵ Hau hanaāeyethaādausade, nau haeneneuva, Nananena hāhauwaenava daun vadathau nananena hadahena, hathauhuk.

⁵⁶ Hanau Heau henane hehauwuujau hadnenauadede henanedanau hedenaededaunenenu, hau hadnenayauhaude. Nau hanaāeyehauthēe jasaa hajasee hauauwudan.

⁵⁷ Nau hethauwuu, hajesethaugudethee vau, jachau henanene hathāhuk, Vahadāhene, nananenau hadnethauguhathane nananene daun nananene hanasesanaune.

⁵⁸ Nau Hejavaneauthusaun hathauhuk, Gauauwuauau neyāethee, nau neaheauau hejavaa nenauhuchaunethee; hau Heau henane heyauhuunee nedauusevaānade.

⁵⁹ Nau hanaāenehethaude jachau, Jethauguhu, hau hathāhuk, Vahadāhene, nedauau nawaunejenanau nāsaunau.

⁶⁰ Hejavaneauthusaun hanaāāedauwunāde, Nanehajananauthee gaujauaudahehehauau negaujauaudāhenethee; hau jathāau nananene nau haddauthedaude henajanede Hejavaneauthau.

⁶¹ Nau jachau jee, hathāhuk, Vahadāhene, hadnethauguhathane nananene; hau jechuwauthēe nedauau nawaunenauenechauthaunauau, hanedauthēe nayāenau naudauuwuu.

⁶² Nau Hejavaneauthusaun hanaāāedauwunāde, Hegau henane, dunauaugu thauauauwujethau, nau jaaāyangu, hehauwunaathā henajanedaunene Hejavaneauthu.

10

¹ Nuu heee Vahadāde haeautheava hauthauau nesaudausauau jee, nau haeyeyethautheava hanenesenethe sayānee haunauude hedan nau vedauauwuu, haudnanādaunauusade.

² Henāheee hanaāenehethaude, Jenayaunau hethauwuwauthāe haneseuu, hau nesethāhehauau hajewauthathee: vevethahee nananena heee Vahadāde deseujenayaunau, hadejejenanaude nesethāhehau hejenayaunaa.

³ Jathāauau nananena hathaāsana; naune nananenau janenanathana neānee waude haudāsaunauau hejee hauchāhee.

⁴ Jevanewuunauwuu nesevāejethāwaunau, newaugusajaānauthau, nau wauaunau: nau jevanaunenāthedaunaa henane hauvaunenau.

⁵ Nau daun hauauwuu nananena hadaujedānā, Dādayauha nuu hauauwuu, nedauau hadeva.

6 Nau hith heau dādaunee hanedaulyaugaune, nananena hadādaunahedaunenau hadnaadaudauyānusaa: hau jene hadjaegau-
usedaunāna.

7 Nau vavade hauauwuu hadanedauva, hadevetheva nau hadevanava
daun hayauhuhau hauchauvadenenau: hanau nesethāhe naunaudaunade.
Jevaenejedāe hauauwuu.

8 Nau daun hedan nananena hadaujedānā, nau hesedanānagu, hade-
vetheva daun hayauhuhau hajenanauwunādaunenau:

9 Nau hadenayauhauva hasauwauvahehe daun hanedaude, nau hesau
jeenanethāedauwunauna, Henajanede Hejavaneauthau hayāedasāna.

10 Nau daun hedan nananena hadaujedānā, nau jesedanānagu hadja-
jathāauva hasesana hehethee hadaugauchaudāe hauauwudan, nau hesau
jeenanesehethauna,

11 Daudause nauthejahathaugu nananena hadedanaunenau,
heejahadāheagu, neyeseгаunuhudee nananena: hau nananena
hadethauwaenava nuu, henajanede Hejavaneauthau hayāedasāna.

12 Hau hadāedauwunathava, hadjavaānanethauauyauau hena hesee heee
Sodom, javaānee heee hena hedan.

13 Naunauthauau hadnauauchaudauna, Chorazin; naunauthauau
hadnauauchaudauna, Bethsaida; hanau havathenayauthau heheenesedau-
deneagu jedauwuu Tyre nau Sidon, nuu hesehana nananena, dajechauau
neaunaunevethajauduuhewauchudaudenenau, needanaugudaunee
neachuwaudenee naujuwau nau jaetha.

14 Hau hadjavaānanethauauyauau heee Tyre nau Sidon
hāenaudedaunadedaunee, javaānee nananena.

15 Nau nananena, Capernaum, hanejanana yesee hejavaa, hadjae-
janauhane yesee hadauveeyauau.

16 Daun hajaathehādaunenau nananena hadjaathehānau; nau daun
hauwauchānavādaunenau nananena haudwauchānavānau; nau daun
nauwauchanavāde hadwauchanauwaude najejenanādaune.

17 Nau nesaudausauau haejaenuusanaauau nauguu neetha-
jaude, hanaāedauwunauthee, Vahadāhene, daudause haujaunauau
hanechauwauaunaunauau heee nananene haneseede.

18 Nau hanaāedauwunāthee, Nenauhauwauau Haujau waude jahagude
hasejanesaa hehethee hejavaa.

19 Naune, Nananenau vanenathana nananena naudahede hadnauguhu-
daunauna seseyānauau nau hauwauhaudathee, nau nanadee vahee henau-
dahede haujau: nau hegau hadneaseneva.

20 Hau vahee nuu jevaneethajaudauwuu, haujaunauau dauchauwauau-
nauna; hau henaunauthauneethajauau hanau nananena haneseedaunenau
dauwauthaunauhau hejavaa.

21 Hena hāauchauau Hejavaneauthausau haeneethajaune hevadathuwu,
nau hanaāenehede, Nananenau vaveenethedaunathane Nananene,
Hau Nāchau, Vahadāhene hejavaa nau vedauwuu, hanau Nananene
dauyadaunaude nuu hayauhuhau hehethee nadaunahehehauau
nau hathauwunanenauau, nau hadnauhauthehauva dāeyaunauauau:
hethauwuu, Nāsaunau; waude hethadee nananena hasesānenau.

22 Vahee hayauhuhau vanenānau Nāsaunau: nau hegau henane haenauna
hanaadāne Heāhene, vavade Vāsaunau; nau hanaadāne Vāsaunau, vavade Vā,
nau nananede hanaadāne Heāwaune hadnenauhauthehāde.

23 Nau hanaāejaedaugauhauwaude hethauguhādaunau, nau
hanaāanadethaude hevenanee, Haunauwuthajaunauha hasesānenau

dauhunauhaudauwuna hayauhuhau hānauhauthaunenau:

²⁴ Hanau nananenau hāedauwunathana, waunauthathee haeyāhehauau nau nenauchuwuthee nevadaunauhauduu hena hayauhuhau hānauhauthaunenau, hau hehauwuthauunauhaudauwu; nau devadaunedaudauuu hena hayauhuhau hānedauwauthaunenau, hau hehauwunedauwaudauwu.

²⁵ Nau, naune, jasaa nanavaavehe haetheaugu, nau haenaudayādauna, Hechauhauthethāhe, nauddusedane jethaujenee henaedede? hathauhuk,

²⁶ Hanaāēdauwunāde, Hayew wauthaunesaa nanavaavedaunaa? Hādusasauhaude nananene?

²⁷ Nau hanaāēdauwunaude, Nananene hadvechauthau Vahadāde nananene Hejavaneauthau nauuu vahee nananene hadahaa, nau nauuu vahee nananene hadathuvaa, nau nauuu vahee nananene hadāahedaunaa, nau nauuu vahee nananene haugaugauthajaudenaa; nau nananene hanedaudewau waude nehayau nananene.

²⁸ Nau hanaāēdauwunaude, Nananene hethauvāne: nanehasedaune, nau nananene hadnenaedene.

²⁹ Hau nananede, vanadauchuvanadede, hanaāenehethaude Hejavaneauthusaun, Nau hanaa nanedaudewau? hathauhuk,

³⁰ Nau Hejavaneauthusau hanaāauchuanaēdauwunaude, Jasaa henane haethāu hehethēe Dādaunedan hese Jericho, nau haesedanaa havedehau, haethauwujedaunaa hedāchaunau, nau haenesenehaa, nau haethāaunenau, haenauthaa dauhayānjaa.

³¹ Nau haethedasaa jachau vevethahevahew hehethēe: nau hānauhauvāde, haejavechauthaa gauchuhunee.

³² Nau vavade Levite, hāedadauu hadaunith, haeeda sa* nau haenāauhauva, nau haejavechautha gauchuhunee.

³³ Nau jasaa Samaritan, daujādade, haedasa hadaunith: nau hānauhauwaude haeauwunauna,

³⁴ Nau haeyehau, nau haedugudauna hadaunenesenith, haedau-nauwuna javēda nau vasevenaje, nau haedasana nehayau hedauneau, nau haenauchauha vethehedaunauauwuu, nau haeaunauneha.

³⁵ Nau daunauganenee hāejathāaude, haedane hanesanenee hevāejethāu, nau haevēna hadāhevahew, nau hadaunaunehau, hathauhuk; nau daun hasegaujauauthedanānaune jee, hājeaunaušanaune nananenau hadaunaudaunathane nananene.

³⁶ Hayewnau nuu hanasāe, hadeanathaunau, henedaudevādaune henee neesedanāde havedehau?

³⁷ Nau hanaāēdauwunaude henee heauwunaunādaune. Hanaāenehethaude Hejavaneauthusau, nau jenaenesadaune nananene.

³⁸ Wauhā hethauwuu, daunaujavesathee, haenauusanauau jasaa hajaseehauuwudan: nau jasaa hesā haseagu Martha haejedana hedauauwunin.

³⁹ Nau haenahavāe Mare haseyugaune, jea haejanaugude Hejavaneauthusaun haethene, nau haenedauwaude hedanedaunene.

⁴⁰ Hau Martha haedauwauchune dauwauthanee hasedaude, nau haeeedasa, nau hanaāenehethaude, Vahadāhene, gauhajegaudauvanade daujēnauthānau nahavaa daunesenesethānau? hāedauwunene hadenedahēvānau.

* **10:32** Two words across a page (“haeda” and “sa”) perhaps should have been hyphenated, giving “haeedasa” which, together with “haeedasaa”, occurs eleven times elsewhere in the text. There are no other occurrences of “sa” standing alone.

41 Nau Hejavaneauthusau hanaāauchuhanehethaude, Martha, Martha, nananene haunaunāhene nau dejanethajaudauwu waunauthāe hayauhuhau:

42 Hau hanesadee hayewhu chaunauguauau: nau Mare hayāchauhauau henee hethadenee hadāde, hehauwuneejathechauhau nauthee.

11

1 Nau hethauwu, henee, daunauvevethahede haedaunanenee, hāejenedaude, hanesāhenith hethauguhādaune hathāhuk, Vahadāhene, jeechauhauthehāa hadnesevethahee, waude Jaun jea neesechauhauthehaude hethauguhādaunau.

2 Nau hanaāēdauwunaude, hāene nananena vanevethahenā jeenanesenehena, Hāsaunaunene Nananedē hanedaude hejavaa, Vadanauha Nananene hanesee. Nananene hanajanede hanājaunauau. Nananene hathanavāane hadnaasedaunee hasauau hejavaa, nau jee nuu vedauauwu.

3 Hejevenāa hadauchusenee hayauwusenee vethewau.

4 Nau jejaegudanauwunāa hewauchudaudenedaunau hanau nechau nejaegudanauwunade haunauude hanesāde nethāesayānedanauwunāade. Nau jevaechauhāa nedauvasehadee; hau haugaunayauhāa hehethee hadau wausauau.

5 Nau hanaāēdauwunaude, hanaa nananena hadnenedaehahede, nau hadneyehaude thaudajaa, nau hadethaude, Va, jeehe hanaśāe jauaujaunau;

6 Hanau nādae daunauujādaunānau, nau nananenau haeyauhuunee nauchauwaude?

7 Nau hehethee jedauwu hadnauchuhanehede nau hadnenehede, Jevanethajuhu: dajanau wauwu haugauhude, nau nanesaunauau nanejauwu naudauvaa;* nananenau nāhauwuneethauwauthe nau hajeneevenathane.

8 Nananenau hāedauwunathana, hadnehauwuthauwauthene nau hadvenāde hanau dauhunedae hāwaude, auhanau daunenāhede hadthauwauthenith nau hadvenāde daun hadaachuvathehāthe.

9 Nau nananenau hāedauwunathana, Henedauwauau, nau hadnevenana; henaudethāe, nau hadnevedena; hewaūdāhee (dajanau), nau hadnegaunedanauwunana.

10 Hanau haunauude hanesāde nethāenedauwaude nenaudauwaude; nau henee nenaudethāde nevenauau; nau henee newaudāhaude (dajanaune) hadgaunanauwunade.

11 Hith hāahenau nedauwunānagu jauaujaunau jasaa nananena henesaunaune, gauhadvena hauunaugane? wauāthe nedauwunāhuk nauwu, gauhadvena hauchuhanee gauhadnanene nauwunenith seseyāne?

12 Wauāthe nedauwunāhuk naunau, gauhadvena hauwauhaudanethe?

13 Hith nananena, hauhauganenagu, hadaenava hadnesevenauna hethadenee venadedaunau nananena hadāeyaunevenau: duthāee nananena hejavaa Hāsaunaunenau hadvenāva Vadanauwauthauwu nethāenedauwunauna?

14 Nau neausāguthaude haujaun, nau heehauwanadene. Nau hethauwu hāejathāaude haujau, hanaējaanadede; nau henenanedede haegaugauthajaudene.

15 Hau jasaa hahagu, Nausāguthaude haujaunau heee Beelzehub najane haujaunaa.

* 11:7 Mid-verse punctuation could be either a colon or semicolon as the lower part of the punctuation is malformed. It was decided to use the semicolon, in line with the KJV, as the punctuation of the two texts often coincides.

16 Nau hauthauau, haenaudayādaunaa, haenehethaa hadnauhauthau-denenee hehethee hejavia.

17 Hau haeene hedenethajaudenene, haeāedauwuna, Hadauchaa najanede nanayāsenauaugu nehayau hadneyauhuu; nau hauauwuu hasānavadenaugu hauauwuu hadjanasaa.

18 Hiith, Haujau jea hasānavadagu, haudusetheaugune henajanede? hanau nananena denehena nananenau deausāguthaugaunee haujaunauau hehethee Beelzebub.

19 Nau hiith nananenau hausāguthaugaunee hehethee Beelzebub haujau-nauau, hanaa hāahenau hadnausāguthaude? hadedauchuwuwuna.

20 Hau hiith nananenau hejadenethedaunau Hejavaneauthau hausāguthaugaunee haujaunauau, hethauwuu henajanede Hejavaneauthau hedašana.

21 Henane danāahethe hedauchuaunau haunaunedehuk hedauauwuu, hevathayaunau nedādauyaunee:

22 Hau hāejavaādāāhenethe javaāhehuk hedašahuk, nau veavehāhagu, hadnedanauwunāde vahee hedauchuaunau heanadauwardenau, nau hadjaanenee hesehaudenau.

23 Daun najenethaunāde hasānavānau: nau daun najenethauāyāvāde naneāsauauwaude.

24 Hāenauthauthe wauchāde haujau henanene, nehedesade hadaujenajenee, denauredede dauyānusenade; nau janevedethe, naneenehede, nananenau hadjaesanau naudauauwuu needajenauahenau.

25 Nau jaenausathe, nevedede nesewaudeauhunee nau neyau dau-thaunenee.

26 Naeneejathāde, nau naneedanauwaude hanesaudaachunethe hau-thauau haujaunau javaānauhauganethe javaāhede; nau naneejedāthee, nau nanejanaugethee: nau waunee henee henane naeneejavaānauhauganede nedauaunejeethāde.

27 Nau hethauwuu, hajeseanadede nuu hayauhuhau, jasaa hesā hehethee henanedaa haevasanade, nau hathauhuk, Hauwunaunade henesaunehe hājanasauthāde Nananene, nau hethanau nedaunenane.

28 Hau hahagu, Haa, nausunee, nauwunaunathee nethāejaathededuu hadanadedeunene Hejavaneauthu, nau naunaunatethee.

29 Nau henanedanede hāeneenanauthenanedauhuu, hanaāejesesenehede, Nuu nanaa wausauau henaedede: nevadaunauhauthāthee; nau hegau nauhau-thaude hadvenaunauau, hau vavade nauhauthau nananede Jonas haeyāhe.

30 Hanau Jonas neesenauhauthehaude Ninevites, nechau jea Heau henane hadnaathāde nuu henaedede.

31 Nenauchuwusā janauhuu hadjaegauhāde naudedanadenesee nauguu henanenau nuu henaedede, nau hadnauthauwuvāna: hanau dejewaune-jatthehaude hehethee hāauauvadenee naunaudāhenith Solomon; nau naune, hejavaāhedaune Solomon hanedaunith.

32 Henanenauau hehethee Nineveh hadjaegauhāthee naudedanadene-see nauguu nuu henaedede, nau hadnauthauwuvāna: hanau dauaugau-thethajauduu hedauthedaunene Jonas; nau, naune, hejavaāhedaune Jonas hanedaunith.

33 Hegau henane, hāesedeachauuu nauauuthayau, hehauwujenane yauthee, daudause hehauwugaudauyauvasenaunaa, hau dasee nauauuthayauneetheaugunee, nethāejedāthee hadnenauhauduu naunausādane.

34 Hanesenee vadanayannaa nanaa nevasesānee: nanaa hāenesadee hasesānenau nananena, nananene hadnaunauudauyauau hadanayau jea hanechauchanaa hese; hau hāene nananene hasesā wausuu, hadanayau jea hadnechauchaunaudene vaneeyauau.

35 Haunauyauhaudauwauau hanau henee hesee hathāsadaude nananene jeva veeyauha.

36 Hith nananene haunauudauyaugu hadanayau hanau hadnechauchau-
naudene hesee, hadnehauwugauuveeyau haunauude hadnechauchanaa hesee, waude naunauasādāe nauauuthayau nevenāna hesee.

37 Nau hajesanade, jachau Nesethajauhu haeadethaa hadnethevethe-
hewaude: nau haewaunejedā, nau haejanaugu dauvethede.

38 Nau hāene Nesethajauhu nauhaudauau, haegaudauvanava daujahe-
seuhunith nedauau hajesejevethenith.

39 Nau Vahadāhenith hathāhuk, Hewaunehaa nananena Nesetha-
jauhuhauau neyauthahenauwuna jathee vāenaunau nau saenaunau; hau nananena hethauvaa hanechauchaunaudena vahedayaude nau hauhauganede.

40 Nananena janethauvahena, gaujenane Hejavaneauthau nenesedede
jathee gaujee henesede jedauwuu?

41 Hau hevāe hauwuyau daun hanetheyaunenau; nau, naune, vahee
hayauhuhau hadnesewaudeanauwunana?

42 Hau naunauthauau hadnedasāna nananena Nesethajauhuhauau,
hanau nananena hadvāna vadadauchu wauhaunauau nau naneujaudeve-
jchau nau vahee hathāejajāesuu vejchau, nau hadjavechaudauwuna
vavesauchuwude nau devechauthade Hejavaneauthau; nuu
hāvachunaasedauna, nau hānanejenaudauwuna hauthauau nejesehēe.

43 Naunauthauau hadnedasāna nananena Nesethajauhuhauau,
hanau nananena devechaudauwuna najatheaugudaunau jedauwuu
vevethahenauauwuu, nau dejachauthana nedauaudaunauvadee.

44 Naunauthauau hadnedasāna nananena, wauthaunauhāhehauau nau
Nesethajauhuhauau, nanadaunahena, hanau nananena waude nedaugau-
dauyauhudaunee dejenauhauwuu, nau henanenauau nedasejavesathee
hehauwaenaunā.

45 Hanaāauchuhananadede hanesāde nanavaavehe, nau hathauhuk,
Hechauhauthethāhe, nuu dauhanadene nananene naunaunauthevāana
jea.

46 Nau hathāhuk naunauthauau hadnedasāna nananena jea, nananena
nanavaavehehauau, hanau nananena henenauchuna henanenauau nau-
guu henenauchude hehayaudee javechauhunee, nau nananena nehayau
jevavasanauwuu henenauchudaunau hee hanesadee nananena hajadene-
nau.

47 Naunauthauau hadnedasāna nananena, hanau nananena deneseda-
nauna gaujauaudahenauauwu haeyāhehauau, nau hāsaunaunenau denauau-
thee.

48 Hethauwuu nananena haeyāna henee nananena wauhaunee
nanāsedauthee hāsaunaunenau: hanau denauauthee, nau nananena
nenesedena hegaujauaudahenauauwunenau,

49 Naasauau jea hahagu hedaeyaude Hejavaneauthau, Hadjenanu
haeyāhehauau nau vadauhanaauau, nau hauthauau hadnenaathee nau
hadnenaunaunauchauthathee:

50 Henee hevaevenau vahee haeyāhehauau, hanedaunee hehethee
davadeesehee vedauauwuu, hadneenaudedauwuhuu nuu henaedede;

⁵¹ Hehethee hevaevaa Abel nauu hevaevaa Zacharias henee nenajaa nethāe jaanaa nau vadannauauwu: hethauwu nananenau nehethathana nananena, hadneenedauwuhuu nuu heee henaedede.

⁵² Naunauthauu hadnedasāna nananena nanavaavehehauu, hanau nananena dauhudanauwuna gaunaudauuha haeyau: nananena hadnehauwujedāva nehayau, nau henee hathāejedāthee nananena najauauna.

⁵³ Nau daunehedauu nuu hayauhuhau yese, wauthaunauhāhehau nau Nesethajauhuhauu hanaējaseseneenanaudedauñāde, nau haenenadaunauu hadnauthedaudauwunith hauwuhuu hayauhuhau;

⁵⁴ Haeaudenauthaa, nau hadnesedanauwunethe hayewhu hehethee hedenene, hadnāedauwauthathee.

12

¹ Gaunauwu, hāene hena hauāchadenee hauānee haejedaguu hadaucha henanedane, dauwauthaa haeanauguhudaunadenauu, hanaējasesāedauwunaude hethauguhādaunau nedauu vahee, Haunauyauhadauwauu nananena gauhauju Nesethajauhuhauu, nenadaunahethee.

² Hanau hehauwuyauthesa, hathāeyauthesaa, daudause hehauwuyauthesa, nethāejaane.

³ Hanau daun nananena hasanadenā veeyagu hadnedauwuhuu hesene; nau henee nananena hasenehenā waunadaunuu jedauwu hadnauchunana dasee hauauwu.

⁴ Nau nananena hāedauwunathana Nādaehauhauu, Jevaesaa henee nenadethee henanedayāhau, nau hee hehauwuthesedaunauu.

⁵ Hau nananena hāedauwunathana daun nananena hāchaunenau: Hesaa Naa, hee hesenaānagu naunaudāde hadgauusevāna hadaugauhauchanee; haa, Nananenau hāedauwunathana nananena, Hesaa.

⁶ Hayauthaunethee hajaseaheauu gujeaunaune hee hanesāenee nevaāhenee, nau hanesāde hehauwunaunethe daunā Hejavaneauthu?

⁷ Hau daudause hadauchāe hāthaanenau haudauguhanenau vahenayāee. Jevanāthajauu henaheee: nananena javaānauwauhuana hadauchtethee hajaseaheauu.

⁸ Jea Nananenau hāedauwunathana, Daun naujaudauthehāde hese henanedaa, nananede Heāhene henanene jea hadnehauwaudauthesaa hese hauthaunau Hejavaneauthu.

⁹ Hau henee nauyauhāde hese henanedaa hadneyauhade hathaāhenethe hauthaunau Hejavaneauthu.

¹⁰ Nau daun hayādaunaude Heāhene henanene, hadjaegudanauwunade: hau nananede henee hauhauganedauu Vadanauwauthauwu hadnehauwujaegudanauwunau.

¹¹ Nau hāejedanānā vevethahenauauwu, nau hauchuwunanenauu, nau najanauu,jevagaugauanadauwuu wauāthe daunhayewhu nananena hadnesauchuhanehena, wauāthe daun nananena hadnesenehena:

¹² Hanau Vadanauwauthauwu hadnāedauwunāna nauauchaugu daun nananena hadnesenehena.

¹³ Nau hanesāde hehethee hananedaa hathauhuk, Hehauthethāhe, hanadesene nasaa, hadegaugauanauwauu vathayaunau.

¹⁴ Nau hathāhuk, Henane, hanaa nanesehāde hadnauchuwuhathane nau hadjaanauwunathane nananene?

15 Nau hasenehethauhuk, Haunauyauhaudauwauau, nau naseduhuu jevavathehāe: hanau henane hedenaedede hehauwuneduhevaa wau-thayāgaune hevathayaunau henetheyaunau.

16 Nau haenadetha haejegausudenanadetha, Vedauauwuu jasaa nethauyāsenane haenautheahā:

17 Nau hasethajauhuk nehayau, hewauau hauaudnesedaunaune, hanau hajanethenauwau jedauwuu hadnedauthānauwau navethenau, hahagu?

18 Nau hanaāenehede, nuu hadnaasedaunau: hadthauwunauwau nathāyānauauwuu, nau hadnesedenau hadjavaāvasauau; nau hadnaadauthānauwau vahee navethenau nau navathayaunau.

19 Nau hadnaāenehethauau navadathuwu, Vadathau, nananene nanethenauwuu waunauthāe hanetheyaunau janenanee hadwauthāe jajene; hedanau nanethauaunenaedede, hevethehe, hevaveyā, nau haunauwunaede.

20 Hau Hejavaneauthu hathāhuk, Nananene Hauhauga, nuu dauveeyauau nananene havadathuwu hadnedauwunane: heee hanaa hadnethenauau hajanayaunau?

21 Nananede haenathauau heveaunauaudenau, nau hehauwuveau-nauau hesee Hejavaneauthu.

22 Nau hathauhuk hethauguhādaunau, Naa nehethathana, Jevaegaugau-nadauwuu hadenaededaunenau, daun hadnevethedaunenau; daudause heee hadanayaunenau, daun hadnāsaunenau.

23 Henaedede javaāsa vethevaa, nau vadanayau javaāsa hāchaunaa.

24 Gauguanavaa huunauau: hanau dejejenayāthee nau dejegausauhāthee; hehauwunethenauwuu thāyānauauwuu nau vethewau nedauthāsanene; nau Hejavaneauthu nachauwaude: gauhjavaāneenaedevea neahenaa?

25 Nau hanaa nananena vanadaunanāde heee neejahehee?

26 Hith nananena wauhā jeneenesedaunagu henee haugajuhuu, nauu hajanethajaudauwuna hauthauau?

27 Gauguanadauwuu nenaugaānuu nejajesaānuu neseveseeu: hehauwunesethānauau, hehauwunethadayānauau; nau nausunee nāedauwunathana, henee Solomon vahee hevasāthade heehauwunaasenu hasaunee nuu.

28 Hith wauhā Hejavaneauthu heneenudehuk wauchuunau, nuu dese-nee nauau, nau naugaagu hadneewaudeaunaunee; hāduthājavaāvenāva hāchaunau, Hau nananena vanehaa hethauwuthajaua?

29 Nau jevanaudeee nananena daun nananena hadnevethedaunenau, wauāthe daun hadnevaveyādaunenau, jevaauwaugaugauuthajauau.

30 Hanau vahee nuu neauthudan hathāauauvaa nenaudethāthee; nau nana-nena Hāsaunaunenau haenauau henee nananena hāvathehādaunenau nuu hayauhuhau.

31 Hau henaudedee nananena henajanede Hejavaneauthu; nau vahee nuu hayauhuhau hadnethedaunanauwunana nananena.

32 Jevanāthajauau, hāhauwuwauthaheva; hanau nananena Hāsaunaunenau hayethanadauwunādaunenau hadvenāna henajanede.

33 Heaunaunaa henee hanetheyaunenau, nau hauwunaunaa hadavenuhuhauau; jasedauau nesevāejethāwaunau henee nejethau-uthauaachusāe, haenathaude haneduu hejaua henee nejethauuyuhuu, nedaujavedadene, hehauwujuudenauau nuvanauauau.

34 Hanau haduu hadaenathauunenau, hena hadahenau jea hadnaaduuu.

35 Duujehee, nau haunauauuthayaunenau gauhauchanauha;

36 Nau nanehathahena henanenauau henee nedauyauhauwauthee hanau Hadahethedaunādaunenau, hāejejaesathe hehethee gauwuhau; henee hāejenausathe nau hadwaudāhau, hadgaunanauwunade nauhauhaunee.

37 Hauwunaunaa henee nesethāhehauau nananenethe, Vahadāde hāejenausathe hadveenaude hadnaunauyauhauthānehe: het-hauwāedaunathana, hadduujede nehayau, nau hadjanauguhaude hadvethenenethe, nau hadjeedauchaude nau hadnaunauchauwaude.

38 Nau hith jenausahek naneseauwaude haunauyauhauthāhe, wauāthe jenausahek naneseauwaude haunauyauhauthāhe, nau hadveenaude had-neseaunethe, hauwunaunaa henee nesethāhehauau.

39 Nau nuu hāenauwu, henee hith henane hedauauwu haenauaugu daun hāauchaunee havedehew neenausanith, haunaunauyauhauwaude, nau hanājechuwauthedaunenauhunee hedauauwu.

40 Nananena hadnaaesaaunaa jea, hanau Heau henane hadnausade daun hāauchaunee hāejenauanauwaunā.

41 Peda hanaāanadethau, Vahadāhene, gauhanadethāa Nananene nuu hee jegausude wauāthe vahee?

42 Nau Vahadāde hahagu, Hanaa henee chuhagu nau hesenaedehuk hadāhevāhe, nananede hadāhewaunādaune, hadnevenaude gauuu vethewau nauauchaunee?

43 Hauwunaunaa henee nesethāhe, nananenith hadāhewaunādaune hāedasathe hadveehāde hadnaasehāde.

44 Hethauvaa hathāedaunathana, henee hadnesehāde hadāhewaude va-hee hethāenetheyauau.

45 Hau nau hith henee nesethāhe hesethajauhuk, Nadāhewaunāde jeguthenausahek; nau henenese gauhahek henanenau nesethāhehau nau hesānu, nau hevethehagaunee nau hevaveyāhaugaunee, nau henaunaunesevagaunee;

46 Hadāhevāhe henee nesethāhe hadnausanith hajesesenenee hāejejauwuhauthe, nau, neejaenauau, nau hadgudanāde nau hadjenanaude jethauwaudahehau.

47 Nau henee nesethāhe haenauaugu hadāhewaunādaune hathanavāde, nau jesaunuhuk, daudaus dejesedaude hathanavāthe hadnenenesegauhude dejauaunee.

48 Hau henee jaenauaugu, nau hesedauhuk nesenenesegehedaunee hanājauwaunenesegauhude, hanau daun hauwauhuvenāde nananede hadnauwaunedauwunade; nau nananede henane hauwauhauthade, nananede hadnauwaunedauwunade.

49 Hadjejenanauwau heseda dasee vedauauwu; nau hayew navathehāde wauwu gauhauchagu?

50 Hau nanethenauwau dusaahede hadneedusaahedaunee; nau hana-hauwaudauaunānu haunaude hesedaudeyāgu.

51 Haneējaude hadjenanauau dādaunee vedauauwu hāathanaveva? hadāedaunathava, Hegau; hau wauāthe hanāgauanauwau:

52 Hanau hehethee hee yauthaunenanaedauneagu hanesadee hauauwu hadgaunee, hadnasaunauthee hanesenethe, nau hadnesaunauthee hanāenethe.

53 Henesaunaun hadgauanathee hadnasānuwaude heau, nau heau hadnasānavāde; hesā hadnasānuwaude hedaunau, nau hedaunau hadnasānavāde, hesā hesave hadnasānuwaude, nau hesave hadnasānavāde.

54 Nau hanaāanadedauau jea henanedanede, hāenauhauwunā henau-naude jevechauchaugu hehethee nesenaesade, chauchaunu nananena,

Hadnauchuhajauwausauu; nau naenesauu.

⁵⁵ Nau häneuhaudauwunā jenauhuu hanehedasāe, nananena, hadnasedaa; nau naenesauu.

⁵⁶ Nananena nanadaunahena, nananena naenauwuna hedauchaveau haunauu nau vedauuwuu; hau dusaudee haejaenauwuna nuu hewaunehaa?

⁵⁷ Haa, nau nau du daudause nananena haejaenauwuna hasethadee?

⁵⁸ Häeyehauthānā hasānavādaunenau hauchuwunanenau, nausu-javesanagu, nayātheneneevaa hadeenayauhāna; havaehauthāva najanauchuwunane, nau najanauchuwunane havavena duguthāhew, nau duguthāhe havathānāva duguthānauuwuu.

⁵⁹ Häedauwunathana havajeneenauthauva, haunaude vathaunaudauhu-nagu havāejethāvenau.

13

¹ Hena hethaa heee jachau haeauthedaunaa Gananeans, hevaewu Pinade haeuauhaunauwuaunenau nedauausāyāthee.

² Nau Hejavaneauthusaun haeauchuhananadethā, Nauchāe nananena henee nuu Gananeans heauhaugayaugaunee javaānee vahee Gananeans, hanau daujeneethajauduu hayauhuhau?

³ Nananenau nēdauwunathana, Hegau: hau, vavade nananena jaugauthethajauunagu, nananena hadnavahethahena gaujauaudahede.

⁴ Wauāthe hena nasaudauchunee, dasee hayauuwuu jedauwuu Siloam dethauwunauauau, nau haenanaā, gauguanadauwuu henee gauhujavaānauhauganenauau vahee henanedanede henee theaugude jedawuu Dādaunedan?

⁵ Nananenau nēdauwunathana, Hegau, hau vavade nananena jeneethajauhade, nananena hadnavahethahena gaujauaudahede.

⁶ Haeheanade jea nuu dajenehede; Jasaa henane haenethena hauyauuchunauhaudene haejenana jedauwuu dadajevenevese nethauchayau-naa; nau haejenauusa nau haenaunaudede vevenaundenau hanāvenee, hau haejeveede.

⁷ Hanaāenehethaude nesethāhew hedadajevenevese nethauchayaunaa, Naune, nuu hanasāa jajene nananenau hanejaunau daujenaudedenu vevenaundenau nuu hauyauuchunauhaudee, hau haejevedenu: dauwauhune; hadevachunauthauyauu vedauuwuu?

⁸ Nau hanaāauchuhanadethāde, Vahadāhene, hauwaa nanehasene nuu heee jaje jea, nadeesenenesede, nau vehethe hadjenanauwau.

⁹ Nau hith hāvāgaune vevenaundenau nee: nauhith jene, hadnaēdauwuhade.

¹⁰ Nau haeechauhauthethā jasaa vevethahenauuwuu vadanese.

¹¹ Nau, naune hena hesā haujaunehaeheaugauwu nasaudauchunee jajene, nau haevajanā hauānee, nau haejeneechuwuwauthe nehayau.

¹² Nau häene Hajavaneauthusaun nauhaunauwau, Haeadetha, nau hanaāēdauwunaude, Hesā, nananene haunaugunane hehethee hadaugauwudaunaa.

¹³ Nau hanaāevasanaude: nau chauchaunu hanaāechuvāde, nau hae-vaevenethedauna Hejavaneauthu.

¹⁴ Nau hauchuwunane vevethahenauuwuu haeauchuhananade nauguu hasenaunaude, hanau henee Hejavaneauthusaun denayauthānith vadānee, nau haeautheda henenedaa, Hena nanedaudauchāe hese henane hee-

nesethādaunau hanānaneējauna nau hanānaneenayauhana, hau hegau vadane-see.

15 Vahadāde hanaāauchuhananadethaude, nau hathauhuk, Nananene nanadaunāhene, gauhājene dajee hanesahena vadanesee haugunauva hauwaugajevenau wauāthe naugauchaudaheauau hehethee hewauchuhauchauwauuwuu, nau gāyethāājethauva devanauhauna?

16 Nau gaujenaasaunee naa hesā, hedaunau Ābraham,* henee Haujau heduguthaune, naune, nuu nasaudauchunee jajene, hāaugunade hehethee nuu deduguhude vadanesee?

17 Nau hāenehedauau nuu hayauhuhau, vahee hejauthauwau haeaudādāhenenau: nau vahee henanedanede haeneethaujudene heee vahee havathee hayauhuhau henee hesethaunau.

18 Hanaāenehede, dusaune henajanede Hejavaneauthau? nau hayew naudnenehethau?

19 Waude nejenanenee mausdaude, henane nedanauau, nau neneāgudede hejenayaunaa; nau neveseaudede, nau hāhe haeavadauhadene; nau neahehauau hejavaa negauese hedānaa.

20 Nau jea hanaāenehede, Hayew naudneedajenehethau henajanede Hejavaneauthau?

21 Waude nesaunauchaa henee hesā nedanauau nau nejenanauau nasau dejenauhunee thauauhanau haunau devahenesaunadāe.

22 Nau haeehedesa hauwauhauwudane nau hajasedan, dechauhau-thethāde, nau haejāda hese Dādaunedan.

23 Hanaāanadethāde hanesāhenith, Vahadāhene, gaujewauthanauau henee henayauhatee? Nau hanaāēdauwunaude,

24 Neaunedauwauau hadejedāna hadaugaugunesāde dajanau: newauthana, Nananenau dāedauwunathana, hadnenaudedena hadnedaujedāna, hau hadnehauwuneeadauva.

25 Hāene hechauhauthethāhe hauuwuu thauwauthehuk, nau haugauhahagu dajanaune, nau nananena hanānaētheauguna jathee, nau hanānaēwaudāhauna dajanau, hanānaēnehethauna, Vahadāhene, Vahadāhene, jegaunauwunāa, nau hanānaēauchuhanehethāna nau hanānaasenehethāna, Hāhauwaenaunathe daun hadesane:

26 Hanānaēnehethauna, Nevethehenauau nau nevaveyānauau hathaāhene, hau nananene dauthedaunānehadaugauchadee.

27 Hau hadnaasenehede, Hāedauwunathane, Hāhauwaenaunathe daun hade-sane; nayāsave vahee nananena nesethāhehauau wauwauchudaude.

28 Hena hadnewewauhudaunee nau hadnegaugauchaugudasenana, hāenauhauwaunā Abraham, nau Isaac, nau Jacob, nau vahee haeyāhehauau, Jedauwu henajanede Hejavaneauthau, hau nananena nehayau nenuguthadana.

29 Nau hadjenauchaudenee hehethee nejeethevesesanith, nau hehethee nesenaesanith, nau hehethe nanavee, nau hehethee janauhuu, nau hadjanauguduu henajanedanene Hejavaneauthu.

30 Nau, naune, hena hedauaude hadnedauvade, nau hena nanedauvade hadnedauchude.

31 Hajesesenee hena haejenausa jasia Nesethajauhuhauau, hasenehethāhuk, Nauahe, nau jathāau, hanau Herod hadnaāne.

* 13:16 "Abraham" is spelt thus once in this verse and spelt "Abraham" thirteen times elsewhere in the text. It is not known whether the spelling differences have any grammatical significance.

³² Nau hanaāēdauwunāthee, Najesaa, nau hadāedauwunauva hena vachuhuu, Naune, nenuguthu haujanauau, nau nenayauthānau nuu desenee nau naugaagu, nau nanaseauwauau hese hadnaāesedaunau.

³³ Hau hadnensesanau nuu desenee, nau naugaagu, nau jea hathavenau-gaagu: hanau hehauwunaasau henee haeyāhe denaade Dādaunedan.

³⁴ Hau Dādaunedan, Dādaunedan, nanathee nenauauthee haeyāhehau, nau nenauchauwahathee hauunaugāe henee hejejenauwunaudenanau; dauhudauchu naudnauāchauhauunauau nananena hadāeyaunewauau hauānee waude neauthuneahēe dauānaude henesaunau hethauvaa hethaenaa, hau hāhauwuvathehāva.

³⁵ Naune haudauuwunenau, naunaudauwunana hadnadauyewu: nau hethauwuu nāedauwunathana, Nananena hadnehauwunauhauwuva hau-naude nauauchaugu hadneenehena, Hauwunaunaa henee jaunau hēe henesedaunene Vahadāhenith.

14

¹ Nau hethauwuu, daujedāde hedauuwunene hanesāhenith najane Ne-sethajauhuhau hadvethee jauaujau vadanesee, henee haeauuayauhau-vaa.

² Nau, naune, hena jasaa henane hathaāhede haenenesaunenauau.

³ Nau Hejavaneauthusau haeauchuhananadetha nanavaavehehau nau Nesethajauhuhau, gaujenanavanau henayauthaude vadanese? hāthauhuk.

⁴ Nau haedādaunaugunauau. Nau hanaāēdanaunith nau haenayauha, nau haejenana;

⁵ Nau haeauchuhananadetha, Hanaa hedauneau naugauchaudahehau wauāth waugaje janesenayaugaune hadaunaudenee, nau gauchauchauu gauhadnauuguthauva vadanese? hathauhuk.

⁶ Nau haeyauhuune nesenehethathee jea nuu hayauhuhau.

⁷ Nau haedadajenehetha henee hathāadethavathee, hāenauhauwaude hasayāchauhauwunethe najatheaugudaunau; hanaāēdauwunaude,

⁸ Hāene nananena hadethaunā henanenauau gauwuhaudeneagu, jeva-janaugu najatheaugudaunaa; havajavaānethā henane havajavaāheva he-nee hadethade;

⁹ Nau henee hadethāde nau nananede hadjaude nau hadnethāne, Venene naa henane hadehedagu; nau nananene haddayāhene janaugunenagu hesaudavaa.

¹⁰ Hau hāene nananene hadethanenagu, haddeyehau nau hadjanaugu hesaudavaa henee hāene hadethāde hadjaude, hadethāne, Va javesa; had-naāene nananene vechauthānaune henee hanethevethehevādaunauau.

¹¹ Hanau daun nanajathajade nehayau hadnausādauaude; nau henee nausādauuadede nehayau hadnajanede.

¹² Hanaāenehethaude jea henee hadethādaune, Hāene nananene gauuse-vanenagu wauāthe hethunevethehevanenagu, jevaadesene hādaehauhauau, wauāthe hāthesaunauau, daudause hādaunānaunau, wauāthe nethauyādahagu hanedaudewau; havaadethaa jea, nau havaaunaudaunā.

¹³ Hau hāene nananene vethehevanenagu, hadadethaunauau hadavenuhuhauau, henesenehehauau, jeneejavesahehauau, nanenauguhuhauau;

¹⁴ Nau nananene hadnauwunaunane; hanau daujeneaunaudaunānaune: hanau nananene hadnaunaudaunane jaegauhadenagu hathāethadee.

¹⁵ Hāene hanesāde henee henethevethehevādaune daunedauwaudauwunith nuu hayauhuhau, Hauwunaunade henee hadvethee jauaujau hena-janedaunene Hejavaneauthu, hathāhuk.

16 Hanaāēdauwunaude, jasaa henane haeavathethunevetheheva, nau haeauwauhadethānana;

17 Nau haejenana hewauwaune dauethunevethehedaunee hadnāēdauwunaunith henee hadethavathe, Jenajesaa; vahee hayauhuhau wawuu hanesejenanee.

18 Nau vahee haenesadene hathaichuwuhadethee hadnudanathee. Nandedauwauade hasenehethauhuk, Neaudaunaudauwau vedauauwuu, nau hadneyehaunau nau hadnauhaudauwau: Nehethathane hadnudanene.

19 Nau jasaa ahagu, Neaudaunauthu yauthauyauna hedauhuwaujaje, nau hadneyehaunau hadnayāduuhuu: nenehethathane hadnudanene.

20 Nau jasaa hahagu, hedauwunenenu, nau naajeneejaunau.

21 Hanaāējenausade henee wauwau, nau hanaāēnauhauthehaude hadāhewauādaune nuu hayauhuhau. Wauhā hechauhauthethāhe hauauwuu hanaāasenaunade hanaāēdauwunaude hewauwaune, Yegahu nauhauhaunee hadaugauchaudāe nau hadaugauchauchanee hedane, nau hadjāthaunauau hede hathāadavenuhunethee, nau henesenehehauau, nau jeneejavesahehauau, nau nanenauguhuhauau.

22 Nau wauwau hasenehethauhuk, Vahadāhene, naasedaunau hasenehesene nau nausunauthauyaunau, hathāhuk.

23 Nau Vahadāhede haeēdauwuna wauwaune, Yehau hathenavaunaa nau nethauchayaunaa nau hadjādasauaunauau hadejejedāthee, henee nau-dauauwuu hadechauchanaa.

24 Hanau nāēdauwunathane, henee hegau hena henanenau neadethathee hadnehauwuwajadawu nadethunevethehewau.

25 Nau hena haenethaunau havathenedanede: nau hanaāējaagude, nau hanaāēdauwunaude,

26 Hith daun henane hedaānau, hau jasānauwauhuk henesaunaune, nau henaune, nau henene, nau dāeyaunauau, nau henethesaunau, nau hedaāwau, haa nau nehayau hedenadede jea, nāhauwuneethauguhaa.

27 Nau daun janeneva henaugachu, nau thaughānau, nāhauwuneethauguhaa.

28 Hanaa nananana vanadaunasedede hayauauwun gauhadjejanaugu nedauau hadnayādede hadaichuunee, wauau hanaadauchanenee hesehenee?

29 Havaene hesejenanauhuk hauunauganau, nau hanājeneesedede, vahee henee hathāēnauhaudauau hadneevavavayaudenenee.

30 Naa henane nenasedede, hau hajeneesedede, hanāthāde.

31 Wauāthe daun naja, vadauvauthauhuk jachau najane, hanājanaugude nedauau, nau hanāgaugauanadauau wauau haneene nauuu vadadauchu vasevadadausauau hadnenuchaunade henee hejevenahedaunau nauuu nesauau vasevadadausauau?

32 Wauāthe, hajesenausujechaunethe, hanāyethautheavede, nau hanānayāthenedauāwauaude.

33 Nau naasauau, daun nananana henee janenaunaudauau vahee henethayaunau, nāhauwuneethauguhaa.

34 Nejauauwuu hethadee: hau hith nejauauwuu jevanujadāgu, hayew hadneejauauwujauau?

35 Daudause hehauwuthade vedauauwuu, wauāthe hee vehethe; hau henanenauau hanāēnāgudede. Daun henaunaudunede heenedauvahek jaathedeha.

15

¹ Hanaēauchaunāde vahee hauāyāhehau nau wauwauchudauhuhau hee hadjaathehāde.

² Nau Nesethajauhuhau nau Wauthaunauhāhehau haeneneedenenau, Naa henane hanesedanaude wauwauchudauhuhau, nau nanethevethehe-
waude, hathāhuk.

³ Nau haeauthaunanadetha, hasenehethauhuk,

⁴ Hanaa henane nananena hedauneede vadadausauau jauaunawaudā, hith hanauhuhuk hanesahenith, gauhadnautha theaudausauau nau theaudauchunee nauaunee, nau gauhadnaudeha henee naunethauaunith gauhaunaude hadveeha?

⁵ Nau hāeveehauthe hadthāegauhaude hejaanaunaa, hadneneethajaude.

⁶ Nau hāenauajegauhuthe, hadnadethaude hauānee henedaehauhau nau henedaudevādaunau, netheneethajaudauwunee hanau daujaveehauau nau-
daūve nenaunethauaude, hathauhuk.

⁷ Nananenau hēdauwunathana, nuu hadnaasauau neethajaude hayāene hāene hanesāde wauwauchuduhu haunaunevethajauhuk javaānee theau-
dausauau nau theaudauchunee hathauwunane janenethenauau haun-
evethajaude.

⁸ Daudause daun hesā nethenauaugu vadadauchu gauneevāejethā, hith hanadehuk hanesadenee gaunee, gauhadjedauchauau nauauuthayau, nau gauhadwaudeau hauauwuu, nau gauhadvavesenaudene haunaude gauhadveede.

⁹ Nau daun hāveenuu hanadethaude henedaehauhau, nau henedaudevādaunau hauānee netheneethajauwuu, hanau dau-
jaeveenauwau hanesadee nāanathau, hanāthaude.

¹⁰ Naasauau, Nananenau nādauwunathana, haneduu neethajaude hathāhethēe hautheaunauau Hejavaneauthuu hanesāde wauwauchuduhu haunaunevethajauhuk.

¹¹ Nau hasenehuhuk, jasia henane neseyaugaune heauhau:

¹² Nau hajauchaugade haenehetha henesaunaune, Nāchau jevene gauuu vatheyaunau henee nāudnedadahedaunau. Nau hanaāgauuvenaude hethāenethayaunau.

¹³ Nau haunauauhaejewauthanenau hese hajauchaugade hāesauānauau vahee hauānee, nauhanaāejathāaude hese vavāaune vedauauwuu, nau hena hanaāevadauthedede hethāenethayaunau hee hauhaugānenaedede.

¹⁴ Nau hāevathedede vahee, hena haanaāenauauchauau naunauthauau hase-
naude hena vedauauwuu; nau hanaāadavenuhunedede.

¹⁵ Nau hanaāeyehaude nau hanaāewauhaunesade nehayau hauwauhauauwunanenau henee vedauauwuu; nau haejenanaa hethauauwuu hadnauchauwaude neauthuwauchu.

¹⁶ Nau hanāneanadauau hanāchauchaunaudede henaude hee jeyauwaunau henee neauthuwauchu hevethedaunenenu: hau hegau henanene heve-
naa.

¹⁷ Nau hāenaudede hanaāenehede, Waunauthanethe hedautheaunau nāsaunau nenethenauau jauaujaunau naenedauchanenee nau nejeesesanenee, hau hadnenadaugauyānau?

¹⁸ Hadgauhānau nau hadeyehaunau nāsaunau, nau hadnaasenehethauau, Nāchau, nananenau nanethenauwau wauchudaude hese hayāene, nau yese nananene,

¹⁹ Nau nananenau hegau hee hāhauwautheāve: jeneshe waude hau-
dautheaunau.

²⁰ Nau hanaāegauhāde, nau hanaāedauchaude henesaunaune. Hau haje-sejedauchaude, henesaunaune haenauhauvaa, nau haeauwunaunaa, nau haeyesenegau, nau haenaethesaunaunagutha, nau haenedana.

²¹ Nau heau hathāhuk, Nāchau, nananenau nanethenauwau wauchudaude yese hayāene, nau nananene, nau nananenau hegau hāhauwautheneēave.

²² Hau henesaunaune hathauyugaune hedautheanene, jādee chaunau-guuthadee hu, nau hauyauunaa; nau thānauwunaa nechaunathathau hejade-naa, nau jedauaunenaa:

²³ Nau hadjāthauva hede daun gauchujāde wauuu, nau hadnauauva; nau hadvethenauau, nau hadeaunauwuthajaunauau:

²⁴ Hanau naa nā nenajaa, nau jaenaedede; nenaunethauaude, nau jaeveenade; nau hanaāejasesaunauwuthajauthee:

²⁵ Wauhā vanachauganith heau haenedaune nauau: nau daunau-su-jaude nau hāyānauusade hedauauwunenau, haenedauwaude haenevau-denene nau haevadaudenene.

²⁶ Nau haedetha hanesānith haunauaheau, nau haenaudedana dusedaudene hathauhuk.

²⁷ Nau haeāedauwunaa, Nananene hahavaa nauusade; nau nananene hāsaunau naunauaude gauchujānith wauuau, hanau daujaesedanaude nanethauaunee.

²⁸ Nau haesenauna, nau haejejedā: hanaāejenuahenith henesaunaune, nau haedadadasevaa.

²⁹ Nau haeauchuhananadetha henesaunaune, Naune, nuu hawauthāe jajenee hānesedaunathadenau, daudause hāhauwujethauwaudaunathe hanāene hanathachuwwuhunaune: hau haunauau nananene hāhauwuthauuvene haudāsau, henee hanānesedenau haunauwuthajaude nauuu nādaehauhauu:

³⁰ Hau chauchauu hasenauusade naa hāa, hāgaujauauthedaunādaunau hāheenaededaunau heee henesahehau hesānau, nananene hanadaunaude gauchujānith wauuau.

³¹ Nau hanaāēdauwunaude, nā, nananene nanethenaedevene, nau vahee henee nāthāenethayaunau nanehanāhene.

³² Dauudasadee henee haneenesehēe haunauwuthajaude, nau had-neethajaunee: heee naa hahavaa denajaa, nau jaenaedede; nau de-naunethauaude, nau jaeveenade.

16

¹ Nau hanaāēdauwunaude jea hethauguhādaunau, hena jasia haenethauyādā henane, haenethena hadāhevahew; nau haenanene haeauthauwuvaa henee daunethauyādauchudede hevathayaunau.

² Nau haedetha, nau hanaāenaudedanaude, Duthanee henee daunedau-nathane nananene? nayāde hādāhevadenau hanau nananene hadne-hauwuguthadāheva.

³ Hadāhevāhe, Hewauau hauaudnesedaunaune? hasethaujauhuk, hanau navahadāhewaunāde haedanauwunānau nadadāhewau: hajeneenauchauhānau; thaununedauwuhunenau.

⁴ Haenauwau hadnesedaunau, henee hāenudanānaune hadāhewaude had-jedanthee hedauauwunenau.

⁵ Hanaāadethaude haunauaude hadāhewaunādaune hethāesayānedanauwunādaunene, nau hanaāēdauwunaude nanedauwauaunith, Dauhudauchanau hasayānedanauwunaudenau nananene nadāhewaunāde?

6 Nau hāheyaugaune vadadausauau dejenauhuu javeda. Nau hanaāēdauwunaude Hedanau hauwauthaunauha, nau janaugu nauhauhaunee, nau hadwauthaunau yauthauyauau.

7 Hanaāēdauwunaude jachau, nau dauhudauchanau hasayānedayaunau nananene? Nau hanaāēdauwunāde, Vadadausauau dejenauhenee thauauhaneuachuunau. Nau hanaāēdauwunaude, Hedanau hauwauthaunauha, nau hadwauthaunau nasaudausauau.

8 Nau vahadāde haevaveenethedauna janechuvāhenith hadāhevahew, hanau dauhaenauau hasedaude: hanau dāeyaunauauau nuu hathāauuvaa henedaededauenau hāenuu javaānee hesenedāeyaunauauau.

9 Nau nananenu hāedauwunathana nesedee nehayau henedahāvade heee nethauyādahede hehauwuthade; henee hāejenenaedenā hadeesedanāna nedaujethauujenenaededaunenee.

10 Henane henee chaunuvāde heee haugajuhuyāgu haneechuvāde jea vasee: nau henane henee janechuvāde vanehaa hehauwuuchuvā jea vanaunee.

11 Hith naaheene nananena jechuvahena hāhauwuuthaheva nethauyādahede hanaa hadvenāde nananene hadanethaude hethauwu veunauauade?

12 Nau hith nananena hejechuvahenagu heee henehanahede jasaa henane hanaa hadvenāde nananena henee hanehanahede.

13 Hegau nesethāhe hehauwuneeenedauna hanesenethe hechauhau-thethāhehau: jachau hanāasānauwaude hanesāhenith, nau hanāvechauthaude jachau; wauāthe hanādudevede hanesānith, nau hanāthauchaunauhauwaude jachau. Nananena hāhauwuneeenedaunauva Hejavaneauthau nau nethauyādahעהhauau.

14 Nau Nesethajauhuhauau jea, haeevenauwu vāejethā, haenedauwau-dauwu vahee nuu hayauhuhau: nau haeauchaudanavanauau.

15 Nau hanaāēdauwunaude nananena nethadee hasehadenā hathaāhethee henanenauau; hau Hejavaneauthau naenauau hadahenau: hanau henee nechauguanavadethee henanedaa newauchanavathee hathaāhenethe Hejavaneauthu.

16 Nanavaavedaunau nau haeyāhehauau haunau nauuu Jaun: heee hena henajanede Hejavaneauthau deheauthedaunee, nau haunauude henane-nauau neheeneethenadethee.

17 Nau hehauwunauthau hejavaa nau vedauuwuu heyauhuāgaune javaānee hanesadee haugajuhuu nanavaavede hadneeyauhuu.

18 Daun hausānaude henene, nau heneyaugu gauchuhunee, wauchu-daudehaugauthenenede: nau daun hausāyaune nanewaude wauchudaude.

19 Hena jasaa nethauyāsenane, haeneenu haevejayaunenau nau haegaugunesaunenau, nau haeneechauna hadaachuseneene:

20 Nau hena jasaa nedauwuhu Lazarus haseagu, haesaese hedajanaunaa haevahaseva,

21 Haevadaugaudaude heee jeyauwaunau nejanesanenee hehethee nethauyāsenanene hevethedeaunene: jea hathave haedasaa nau haenene-saudauwu hedasewaunau.

22 Nau hethauwu, henee nedauwuhu haenaja, nau haenauaunechauhaa hautheunau yesee Abraham haenedauguva: nethauyāsenane jea haenaje, nau haejenanau;

23 Nau hadauveeyaunee haeejenāauguau, haeaudauwuthajau, nau haenauhauva Abraham vavāaune, nau Lazarus haenedauguvane.

²⁴ Nau haeneduva nau hathauhuk, Nāchau Abraham, jeauwunaune, nau jeautheavene Lazarus, henee hadejegunauhade naunauchuu hejadena n-nee, nau hadedauyauvanauau nāthaune; hanau nananenau hanavachuunau nuu hesedaa.

²⁵ Hau Abraham hahagu, Nā, hāenau henee nananene deenaedene neesedanauwu neethadee hayauhuhau, nau neesaunee Lazarus neewausaunee hayauhuhau, hau hewaunehaa hauwauthenaedede, hau nananene naunauchauthenaedene.

²⁶ Nau jea vahee nuu, nahethāe nananee nau nananene haneduu vanasauau vanethaunauau janenanee: hadnejenehedechaudenee hehethee hede hesee nananene hehauwuneau; daudause hehauwunee-jeachusanaauu hadaunee, henee nevadaujauthee hehethee hethaa.

²⁷ Hanaāenehethaude, Vanevethedaunathane hena heee, Nāchau, henee nananene hadejejenanaude nāsaunau hedauauwu:

²⁸ Hanau yaunauthaunethee nauhauwauauau henee hadeāedauwunaude, jea havajaunenau nuu haduu naunauchauthauau.

²⁹ Abraham hanaāēdauwunaude nanethenauthee Mosaseau nau haeyāhehau; jaathehaunauha.

³⁰ Nau, hegau, nāchau Abraham: hau hith hanesāde jaeyehauhuk hehethee degaujauaudāde, haunaunaunevethajauthee, hathāhuk.

³¹ Nau hanaāēdauwunāde, Hith jenedaunauhaugaunee Mosaseau nau haeyāhehau, daudause hāhauwunee nadauwauauau, daudause hanesāhenethe jaegauhāyaugaune hehethee degaujauaudāhenith.

17

¹ Hanaāēdauwunaude hethauguhādaunau, Hāhauwuneene hau henee dau-sunenadenau hadnauaichuu: hau naunauthauau hadnauauchaudaude daunjaunaude.

² Hanāneene henee thauayānaunaugane henauānauyaugu, nau seāguthadagu hadaje, hauhanāheejegaudavāhenethe henee haneedauusenanelthe jachau nuu hajasedāeyaunauau.

³ Haunauyauhau dauwauau nehayau nananena: Hith hahavaenau havawauchuhāva, hadanadethauva; nau hith haunaunevethajauhuk, hadjaegudanauwunauva.

⁴ Nau hith wauwauchuhānagu nesaudauchu hajeseseneene, nau nesaudauchu hajeseseneene naujaeyethaagudaunānagu, haunaunaunevetha-jaunau, hethānagu: nananena hadjaegudanauwunauva.

⁵ Nau vaduhanauau, Vahadāhene, hethedaunauwunāa hedethauwau-daudenede, hathauhaugaunee.

⁶ Nau Vahadāhenith hathāhaugaunee, Hith nananena hethauwaudauwu-nagu hethāee hethāuu mausdaude jenayaunau, nananena hanāna nuu segaumau hunauhauedene, Hanāgauchauhana hethājee, nau hanājenanauna hadajee; nau hanāthauwaudaunāna.

⁷ Hau hanaa nananena, hanāwauwauwavede hanāthauauauwujethānith wauāthe hananajauānith, hanāthauna waunee hāenauusathe hehethee nauau, Najese nau hadjanaugu nau hadvethe?

⁸ Hau hanājenaasenehethauna, Hesetheva nayaudenee hadnevethenau, nau duujehe nehayau, nau hadjeenechaudaune haunaude hesevethenau nau hesaveyānaugu; nau heauhauwune jenaevethehene nau hade-vaveyā?

⁹ Gauhadvaveene henee wauwau hanau dauhunaasedaude henee hanasenehethāthe? Haunauchāe hegau.

10 Naathahena, hāene nananena vahesedaunagu hena hayauhuhau hathaachuwhana, Hāhauwuneejavaājasethānau wauwaunauau; vavade nanesedaunauau hadnesedaunuu, hadeva.

11 Nau hethauwuu, daunausuyehaude Dādaunedan, haeehedesa nahethāe Samaria nau Gananee.

12 Nau hāewaudasade jasaa hauauwudan, haenuchaunaa vadadauchu henanenau haenaujaune hedaugauwudaunenau, haetheaugunenau vavāaune:

13 Nau haeneduvanauau, nau hanaāenehethauthee, Hejavaneauthusau, Hecauhauthethāhe,* jeauwunauāa.

14 Nau hāenauhauwaude hanaāēdauwunaude, Waunenauhauthehaa hadanayaunenau vevethahevahehauau. Nau hethauwuu, henee daunausuyehauthee, haejegaudauvāhenauau.

15 Nau hanesāde, hāenauhaudauau henee daunayauhade, haejaaagu, nau haevasenhe dauvaveenethedaunaude Hejavaneauthu,

16 Nau haeuāneseve heauthene, haevaveenethedauna: nau haenaadāde Samaritan.

17 Nau Hejavaneauthusau haeauchuhananadethā, gaujenayauhau-nauau vadadauchu? hau daude theaudachu?

18 Hajenauhauvathee hajejaeyehauthee hadvaveenethedaunauthee Hejavaneauthu, vavade naa henewauuhu.

19 Nau haeēdauwuna, Gauhā, najesa: nananene hadethauwaudaude henayauhāne.

20 Nau hāenaudedaunde Nesethajauhuhau, daun henajanedauene Hejavaneauthu hadneenauauchaunee, Haeēdauwuna, Henajaned Hejavaneauthu hadnehauwunauauchaune nausujauwuwuhadagu:

21 Daudause hehedauneagu, Nauhaudauwuu hede, wauāthe, nauhaudauwuu hena, hanau, naune, henajaned Hejavaneauthu thanāsadena,

22 Nau hanaāēdauwunaude hethauguhādaunau, Hese hadnauauchuu, hāene nananena vadaunauhaudauwnā jasae hese Heau henane, nau hadnehauwunauhaudava.

23 Nau hadnanethāna, Nauhaudau hede; wauāthe nauhaudau hena; jeyauhauau, wauāthe jevathaughaa,

24 Waude hasauau jahagude, henee naunauasānauuu hehethee naugauthanee naugauauwuu hejavaa neenauasādaa jasaa naugauthanee naugauauwuu hejavaa; hadnaasauau jea Heau henane hadnaasaunee hede-seve.

25 Hau nedauau hadnanasenedauau wauthanee, nau hadnausāguthade nuu henaedede.

26 Nau waudeneesaunee deenaedede Noe, hadnaasaunee jea hedesewe Heau henane.

27 Neauwauthevethededaune, neauwauthevaveyadenee, neauwautthenenedaunee, neenenehathee, haunaude nauuu henee Noe dejedāde havathee thewaunaa, nau haenaāenanadauwuauau, nau haenauauhā vahee.

28 Waudenaasauau jea deenaedede Lot; neauwauthevethededaunee, neauwauthevaveyadenee, neauwauthaudaunaudenee, neheaudaunaudenee hayauhuhau, neauwauthejenayadenee, neauauvadenee;

29 Hau hajesesenee henee Lot haenaude Sodom haeesedanausau nau haegauhauchanauauhauunauganauau hehethee hejavaa, nau haenauauhā vahee.

30 Hadnaasauau hese hāene Heau henane hāenauhauthethāthe.

* 17:13 Missing "h" in "Hec(h)auhauthethāhe" ("Master").

³¹ Henee hesee, hāanedauthe dasee hauauwuu, nau hevatheyaunau jedauwuu hauauwuu, nanehajejeauwusade hadejedanauau: nau henee hanadaude nauau, nanehajejejaude.

³² Dauyuuwuu Lot henene.

³³ Daun vanadaunayaude hedenaedede hadnanadede; nau daun hadnanadede hedenaedede hadnenayaude.

³⁴ Nananenau nāedauwunathana, henee veeyaugu hadnesethee henanauau hanesadenee hauau; hanesāde hadnedanade, nau jasia hadnathauaude,

³⁵ Hanesethee hesānauau hadthauayāthee wauhaunee; hanesāde hadnedanade, nau jasia hadnathauaude.

³⁶ Hanesethee henanenauau hadnanedauthee nauau; hanesāde hadnedanade nau jasia hadnathauaude.

³⁷ Nau haeauchuhananadethanauau, Daude, Vahadāhene? Nau haeāedauwnā haduu vadanayau, hanaadauhauāneauhuthee neahehauau hauānee.

18

¹ Nau haeanadetha hauthaunauhānee nuu heee, hena henane hāvachudajauaunevevetha, nau hājethaujesevenauau;

² Hahagu haenedau hedan hauchuwunane, haejesa Hejavaneauthu, daudause hathauwunanenau:

³ Nau haenedau henevesā hena hedan; nau haejeedasa, Jeaugauyawewhu naujauthavaa, hathauhuk.

⁴ Nau haejevadaunaasedau: hau waunee hasethajauhuk, hewauāthe ne-jchauau Hejavaneauthau, nau hathauwunanenau;

⁵ Hau nausunee hanau naa henevesā hajanauchuhānau, hadenayauhauau havaedajauaunejau navanadauchuhaa.

⁶ Nau Vahadāde hasenehehuk, Jaathehaa hasenehede janechuvāhede hauchuwunane.

⁷ Nau gauhujavaneauthau gauhadnenayauha nehayau hanayāsanaunau, hauwauaudaunādaunau hesee nau dajāee, hau negudauchuhaude?

⁸ Nananenau nananena nāedauwunathana henee hadnauchuhane-nayauhaude, Hau hāejauthe Heau henane, gauhadveede hethauwaudaude nuu hathāuauvaa.

⁹ Nau haeauthaunanadetha jachau nethauwaudaunadenethe nehayau henee dauchuvahethee, nau newauchānauwauthee hauthauau:

¹⁰ Hanesethee henanenauau haeyehaunauau vevethahenauauwuu had-vevethahethee; hanesāde Nesethajuhu, nau jasia hauāyāhe.

¹¹ Nesethajuhu haetheaugu nau haevevetha waude heee nehayau, Hejavaneauthau, nananenau vaveenethedaunathane, henee nāhauwunaathā hauthauau henanenauau hathahethee, hedanauwuyāhehauau, janechuvahethee, jatheaudauwuyāhehauau, daudause naa hathāde hauāyāhe.

¹² Nananenau nenaugayānau nese hanesadee hauchauvadede, Nevānau vadadauchu vahee henee nāthāenetheyaunau.

¹³ Nau hauāyāhe haetheaugu vavāaune, daudause haejejenāauguau hejavaa, hau haeanadesejāhede, Hejavaneauthau jeauwunaune wauchudau-nau, hathauhuk.

¹⁴ Nananenau nāedauwunathana, naa henane haejaeyehau hedauauwuu haeauwunaunau haejavaāhe jachau: hanau dathājee hanesāde henee nevadaujavāānajanethee nehayau hadnauwujenanade; nau henee nenehanethaunadede hadnejanade.

15 Nau haejādaunauau jea hajasedāeyaunauau, hadnevasanaude; hau hāenauhaudauwunethe hethauguhādaunau, haeneneuvanauau.

16 Hau Hejavaneauthusau haeadetha, nau hahagu, Nanehajuthee hasedāeyaunauau, nau jevadauduvaa: naathāhenethe henehanahedaunau henanedede Hejavaneauthau.

17 Hethauwuu nāedauwunathana, Daun hadjesedanauau henajanedauene Hejavaneauthu hasenaedenethe hajasedāeyaunauau hadnehauwuneejedā.

18 Nau jachau hauchuwunanene haenaudeadaunaa, Hethāhene Hechauhauthethāhe, nauddusedau hadnedanauwau jethauujenenedede? hathauhuk.

19 Nau Hejavaneauthsaun* haeāedauwunaa, Nau du hethāde haesene? henaneda hehauwuthā, vavade hanesāde, nananede, Hejavaneauthau.

20 Nananene haenauwu nanavaavedaunau, Jevawauchudauau hee haugauthenenede, Jevanaa, Jevaaveda, Jevajayaudauwāedauwauthadee, Vechauchune nananene hāsaunau nau hānau.

21 Nau hanaāenehede, Vahee nuu haunaunedenau hee daujeeseaunau.

22 Wauhā Hejavaneauthusau hāenedauwaudauau nuu, Hanaāedauwunau, Hanesadee hāhauwusenethene: Vaheadauna henee hāthāenetheyaunau, nau hadjaanauwunauau hadavenuhuhauau, nau nananene hadnethenauwu haenathau hejavaa, nau hadejau hadjethaugu.

23 Nau hāenedauwaudauau nuu, haeaudauwuthajau: hanau deethauwunethauyā dāde.

24 Nau Hejavaneauthsaun hāenauhaudauwunith henee dauaudauwuthajau, Duthāenanauthaune henee nanethenuu veaunauade hadnesejedāthee henajanedauene Hejavaneauthu, hathauhuk.

25 Hanau hehauwujajathaune hee camel hehedesahagaunee hajasevāhau nedaudaunaudenee, javaāneenauthaunee nethauyāsenane hadnesejedāde henajanedauene Hejavaneauthu.

26 Nau hathāenedauwauduu, Hanaa hadnenanedanede? hahagaunee.

27 Nau hanaāenehenith, hayauhuhau hejethauuneethaunenau henane-nauau nenedede Hejavaneauthau.

28 Hanaāenehede Peda, Naune, naunaudauwunauau vahee, nau thaunau-guhane.

29 Nau haeāedauwuna, Hethauwuu nāedauwunathana, hena haunauude henane henee hehauwunau hedaauwuu, wauāthe henehā, wauāthe henauhauwauau, wauāthe henene wauāthe henesaunau, hee henajanedauene Hejavaneauthu henedaededaunene,

30 Nananede hadjavaānesedanauau nuu hewaunehaa, nau hathāauuvaa hadnausanauau henaedede hadnejethauuvadauauau.

31 Hanaāedanaude nesenee, nau hanaāedauwunau, Naune, hadneye-haunauau Dādaunedan, nau vahee hayauhuhau hathāewauthaunauhuu haeyāhehauau hee Heau henane hethauwunauauchauau.

32 Hanau hadvenavathe Neauthu, nau hadvavavanauchuhāde, nau had-naunaunauchaudauchuhāde, nau hadneguthahavayuthāde.

33 Nau hadnensesegauhude, nau hadnaāde: nau nasese hadnaāejaegauhāde.

34 Nau haejaenauwu nuu: nau nuu hauthedau haeyaudaunaunauau, daudause haejaenauwu hathauthedaunāthee.

35 Nau hethauwuu, hāyāedadauau Jericho, jasaa haenanenaugu henane haetheaugu nedechaudenenee dauhunedauwaude:

* **18:19** Missing letter "u" in "Hejavaneauth(u)saun", which often appears (as does "Hejavaneauthusau") where we would find the name "Jesus" in the KJV.

36 Nau haenedauwaude henanedanede dadavechaudenenee, haenaudeauva haesedaundenenee.

37 Nau haeāēdauwunau, henee Jesus Nazareth hanehedesade.

38 Nau hanaāēvasanadede, Hejavaneauthusau, nananene Heau David, jeauwunaune, hathauhuk.

39 Nau henee nanedauvathee haeneneuvanauau haddādaunaugunith: hau haevasanade haugauthe, Nananene Heau David, jeauwunaune.

40 Nau Hejavaneauthusau haedauusa, nau haeautheave hadjādaunade: nau hāayājenauusanith, haenaudeauna,

41 Hauddusehathe henee hadenaasehathane? hathauhuk. Nau hanaāēdauwunaude, Vahadāhene, nanaa hadeesedanauwau nauhaudauwaude.

42 Nau Hejavaneauthusau haenehetha, hanesedanauwu nananene nauhaudauwaude: hadethauwaudaude henayauhāne.

43 Nau chauchaunu haeesedane henuhaudauwaude, nau haethauguha, haevaveenethedauna Hejavaneauthu: nau vahee henanedanede, hāenuhauduu, haevaveenethedaunanauau Hejavaneauthu.

19

1 Nau Hejavaneauthusau haewaudasa nau haechaugusa Jericho.

2 Nau, naune, haenedau henane Zacchaeus haseagu, haenajawauna hauāyāhehau, nau haevaunauau.

3 Nau haeneenavadaunauhauva Hejavaneauthusaun haedāhenethe; nau haejeneene daunauthethenadedeunenee, heee daujaahede.

4 Nau haesayāgau, nau haenauuhu sycomore hunauhaudee hadnauhauwaude: hanau hadnehedesanith.

5 Nau Hejavaneauthusau hāejeedadauau, haejeāne, nau haenauhauva, nau hathauhuk, Zacchaeus, nauhauuhu, nau jeauwusa, hanau nuu desenee hadnatedaunau haudauwuu.

6 Nau haenauhauhu, nau haejeauwusa, nau haedasa nauguu neethaude.

7 Nau hāenuhauvāhede, vahee haeneānaune, Henee hadneejādavenethe henanene henee wauwauchudauhu, hathāhuk.

8 Nau Zacchaeus haetheaugu, nau haeāēdauwuna Vahadāhenith; Naune, Vahadāhene, vayaugauuu naudaununaunau vanenu hadavenuhuhanau; nau hith hedanavanaugu hayewhu hehethēe daun henane hanājayaudauvāēdauwauthauau, hanājavaāvenauau yāyaunanee.

9 Nau Hejavaneauthusaun haeēdauwunaa, Nuu desenee henayauthāhe hedadauu nuu hauauwuu, hanau nechau haneāvāde Abrahamvene.

10 Hanau Heau henane nauusade hadnaudethāde nau hadnenayauhaude daun naunethauaunith.

11 Nau hajesenedauwauduu nuu hayauhuhau, haethedaunane nau haeauthaunauhānanadetha, hanau dauhuauchauau wauwu Dādaunedan, nau hanau daunuanaduu henee henajanedaunene Hejavaneauthu chauchaunu wauauhaadenauhauwu.

12 Hanaāēnehede henaheee, Jasaa naja haeehau vavāaune vedauauwuu hadnesedanauau hee nehayau najanede, nau hadjaejaude.

13 Nau haedetha vadadauchu hewauwaunauwau, nau haējaanauwuna vadadausauna vāejethā, nau haeāēdauwuna, Hadeadaunauva haunaude jae-nausanaugu.

14 Hau hauauwunanenau haesānavaa, nau haeyethautheavedaunene thauguu, Nāhauwuvadaunethenauva naa henane nāhauwuvadaunajawaunāva, hathāhuk.

15 Nau hethauwu, henee hāejaenausade, haeesedane najanede, hanaāachuwuhaude nuu wauwaunau hadnadethaude, hevenaunau vāejethā, henee hadnaenauau haedauchu dathājee henane haedauchu-javaājasedethe hee hedaunaunau.

16 Hanaāejenausade nanedauvade, Vahadāhene, havāejethāwau javaājasedede vadadausauna vāejethā, hathāhuk.

17 Nau hanaāēdauwunaude, Hethadee, nananene hethāhene wauwau; hanau nananene nethauwaudauwu hee naugajuhuhuu hadnajawaudauwu vadadausauna hedan.

18 Nau naneseauwaude haejenauusa, Vahadāhene, havāejethāwau javaājasedethee yauthauyauna vāejethā, hathāhuk.

19 Nau vavade hanaasenehethaude, Hadnehanāhene yauthauyauna hedan jea.

20 Nau jasaa haejenauusa, Vahadāhene, Naune, heyewnau havāejethāwau, neaunaunedenau nejenanauwau hāheāhauna, hathāhuk:

21 Hee dauhusathane, hanau nananene daugaunaunauwunanenene: nananene hedanau henee hājejenayaunau, nau hadegauuchu henee hājejenayaunau.

22 Nau haeāedauwuna, hehethee nehayau hadenaa hadauchuwhathane, nananene hauhauganene wauwau. Haenauwu henee daugaunaunauwunanenenu, hedanauwau henee nājejenayaunau, nau hadgauuchauwau henee nājejenayaunau:

23 Naudu gauhājevā navāejethāwau nedauhaenaevāejethā, henee hāejaenausanaune hadeesedanauwau nehayau javaānee?

24 Nau haeāedauwuna henee daunauthetheaugunethe, Hedanauwunaa vāejethā, nau hadevenau henee vadadauchuvāejethāvade.

25 (Nau hathāhuk, Vahadāhene, nanethenauau vadadauchuvāejethā.)

26 Hanau hāedauwunathane, Henee dathājee hanesāde nanethenauau hadnevenade; nau henee janejasedede, daudause henee henetheyaunau hadnedanauwunade.

27 Hau hena naujauthauwauau, henee najevadaunajawaunaunauau, hadjāthauva hede, nau hadnaunauauva hathāājenau.

28 Nau hāesanāsenehede nuu, haenedauva, haenauauhuyehaunauau Dādaunedan.

29 Nau hethauwu, hāyānauusade Bethphage nau Bethany, hua Olives haseāgu, Haesayānautheava hanesenethe hethauguhādaunau.

30 Najesaa nananena hesee hajasee hauauwudan hathāāsana, hathauhuk; nanaa waudasanagu hadveehauna dātheveehauchavesau hadduguhude, hehauwuthaune henane dachaugu: hadaunauva, nau hadjāchaudauneva hede, hathauhuk.

31 Nau hith daun henane naudedanānagu, Naudu hauaugaunauna hethānagu? hesau jenaasenehethauna, hanau Vahadāde haddaununaude.

32 Nau henee hautheavathēe hanaāejethāuthee, nau haeveehanauau neesenehethaude.

33 Nau daunausunaugunauthee dātheveehauchavesaune, hedaunenith, Naudu haaugaunauna dātheveehauchavesau? hathāhaugaunee,

34 Nau hanaāēdauwunauthee, Vahadāde haddaununaude.

35 Nau haenauuchaudaunanauau Hejavaneauthusaun: nau haedadasanauwunanauau hedāchaunenau dasee dātheveehauchavesaun, nau haeaugaugunaunanauau Hejavaneauthusaun dasee.

36 Nau daunausuyehaude, haesasaanauwu hedāchaunenau vaunaa.

37 Nau hāyānauusade, wauwu haeauwusa hauanee Olives, haunauude hadauchude hethauguhādaunau hanaāaunauwuthajauthee nau haevaveenethedaunanauau Hejavaneauthu nauguu haevasānadedaune heee vahee hathāenauthaunee henesethaunene henee henauhauthaunenau;

38 Haunauwuthajauau Naja henee jaunaude hanenesee Vahadāhenith: danādauyauau hejavaa, nau vaveenethedauwu javaājauudaa, hāheagu.

39 Nau hauthauau Nesethajauhau hehethee henenedaa, Hechauhauthethāhe, neuwune hāthauguhādaunauau, hathāhuk.

40 Nau haeauchuhanāedauwuna nau hasenehethauhuk, Nananenau nāedauwunathana henee, hith nuu dādaunaugagaunee, hauunauganauau chauchaunu hadneduhuthee.

41 Hau hāyānauusade, hāenauhau dauau hedan, nau haevewau,

42 Hanaāenehede, hith heaenauwunagu, ha nananene, ha nuu hadeseve, hayauhuhau naathuu hadādaunahedaunaa, hau hewaunehaa yaunaudaunane hasesāe.

43 Hanau hese hadnedasāna henee haujauthauwauau hadnesedethee havathegauuha heee nananene, nau hadnechauchuaunāna nauanee, nau hadnaunaunehāna daudauna hehethee,

44 Nau hadnanaunauvaenāna, nau hadāeyaunewauau hanedauchaunawau-nauau; nau hadnehauwunaudanauwunā hanesāhenith hauunaugane hanathaugunethe; hanau nananene daujaenauwu hāenauujādaunathana.

45 Nau hanaāeyehaude vadanedaunauwuu, nau hanaāenudanaude henee neaudaunanethe jedauwu, nau henee naudaunanethe;

46 Hanaāāedauwunaude, Wauthaunauhuu, Naudauauwuu haneauauwunee hadnevevethahedaunee: hau nananena haesedena nedaunaudee heyāenau havedehehauu.

47 Nau haeautheda hayauwusenene vadanedaunauwuu. Hau najanauau vevethahevahehauau nau wauthaunauhāhehauau nau najavahehauau henanedanede haeneenanaudehaa hadnaāde,

48 Nau haeyauhuune nesenehāde hanau vahee henanedanede haenāedevenenau dauhujaathehāde.

20

1 Nau hethauwu, henee jasaa hena hese, denausunauthedade henanedanede vadanedaunauwuu, nau haeauthedaude waunauyaunee hethadenee, najanauau vevethahevahehauau nau wauthaunauhāhehauau haedasaa nauguu vachaugananenau,

2 Nau hanaāanadethauthee, Jeauthedaunā, hayew hāenaudahede hāenesedaude nuu hayauhuhau? wauāthe hanaa henee havenāde nuu hāenaudahede?

3 Nau hanaāaachuhananāedauwunaude, Nechau hadnaudedauunathana hanesadee hayewhu; nau hadjeāedauwuneva:

4 Heedusaayāde Jaun, gauhuhuthaune hejavaa, wauāthe hehethee henenedaa? hathauhuk.

5 Nau haeeegaugaugaudenauau, hith hesauhesenehethaunauaugu, hehethee hejavaa; hahagaunee, Naudu haejethauwaudaunauna? hanāthānauau.

6 Hau hethaunauaugu, hehethee henanedaa; Vahee henanedanede hanædaudauuånauau hauunaugæ, hanau hethauwaenaunauthee henee Jauneau dauhaeyänith.

7 Nau haeædauwunanauau, daujeneauthedaunauthee daunathaunee.

8 Nau Hejavaneauthsau hanaãædauwunaude, Daudause gauhaidnauthedaunathava daun nænaudahede næenesedaude nuu hayauhuhau.

9 Hanaãejasesanadedauau henanedanede heee dajenehede; Jasaa henane haejenane dadajenevesenethauchayau, nau haeethathauauuujethähéhau, nau haejathãau hesee vavãaune vedauuuwuu haegudaunã.

10 Hænauauchaunee haeyethautheava wauwaune hesee thauauuujethähéhau, henee hadjevenãde vevenaudenau hehethee dadajenevesenethauchayaunaa: hau haeneneseguhuu, nau haejathethajenãhee jessaa.

11 Nau jea haeyethautheava jachau wauwaune; nau haeneneseguhunau jea, haedayãnauchuhanauau, nau haejathethajenãhee jessaa.

12 Nau jea haeyethautheave nanaseauwaunee: nau haenasenehanauau jea, nau haenuguthanauau.

13 Hanaãenehede hadãhevãhe dadajenevesesaa, Hewauaujeesedaunaune? Hadautheawauau navechauthau nãa: Nauchãe hadenehauthee hænauhauwaunauthe.

14 Hau thauauuujethähéhauau hænauhauwauthee, haegaugaugauudenauau, Naa nananede hadvanehanãde: nahãjauau hadenauaune, henee headevanahanahedaunau hadenahanahanauau.

15 Hanaãenuguthauthee dadajenevesenethauchayaunaa, nau haenaanaau. Haudneduseha hadãhevãhe dadajenevesenethauchayaunaa?

16 Hadejade nau hadnauauhaude nuu thauauuujethähéhau, nau hadgauchuhuvãde dadajenevesenethauchayau, hathauhuk, Nau hænedauwauduu, hadnehauwunaasau, hahagaunee.

17 Nau haenãauhauva, nau hanaãædauwunaude, Dusau nuu henee wauthau-nauhuu, Hauaunganau hauauvãhehauau hausãguthaunenau, hanãnanenith hãhe hanadãde nedautheauue?

18 Daun janesee dasee nuu hauunaugane hadthausee, hau dasejane-seagu hanãnauchauwuthauathãaunaude.

19 Nau najanauau vevethahehehauau nau wauthaunauhãhehauau chauchaunu haegaugauanavanauau hadnesedanauthee; nau haedaunu henanedanede heee dauhãenuu henee dauhuanadede nuu dajenehede heee.

20 Nau haeauuauyauhauvanauau, nau haeautheavanauau haunauyauhauthähéhau, hadnanadaunethãnethe hadchuvãhevathe henanenau, henee hadnesedanauwunethe hedanadedanaunau, henee hadenauuchaudaunauthee hejadenenau nau naunaudãhenethe haichuwunanene.

21 Nau haenaunaudedananaunau, Hechauhauthethãhe, haenaunee henee hasenehenaune nau nethauwuchauhauthethãne, daudause hãhauuujãvedaugauhauwaunauau henanedanauau hegau, hau hanechauhauthethãne hesee Hejavaneauthuu hethauwuu:

22 Gaunaasauau heee nananee hadnevenade hauãyaunau Caesar, gauwauãthe hegau?

23 Hau haeænauwu henadaunedaunenau, nau hanaãædauwunaude, Naudu haevadauvasehena?

24 Jenauhauthehee vãejethãe. Hanaa hewauthaunenauaudene, nau hanaa hewauthaunauhanede? Haeauchuhanãdauwunanauau, Caesar.

²⁵ Nau hanaāēdauwunaude, Jauaunaudaunaa hee Caesar hayauhuhau henetheyaunau Caesar, nau Hejavaneauthau hayauhuhau henetheyaunau Hejavaneauthau.

²⁶ Nau haejeenesedanauwu hedanadedauene hathaājedaunene henanedane: nau haegaugauanadauwu hedauchuhanehedaunene, nau hanaāēdādaunauguthee.

²⁷ Hanaājeedauchauthee jasae Sadducees, hayāthajauhuhau henee hadjejae-gauhadenene: nau haenaudedaunanauau,

²⁸ Hechauhauthethāhe, Moses hathauthaunauwunānauau, Hith daun henane henauhauwauau gaujauaudāheyaugaune, heneneyaugaune, nau gaujauaudāheyaugaune jedāeyauneveyaugaune, henee henauhauwauau hanādanaude henenene, nau hanānesaunede hee henauhauwauau, hathauhaugaunee.

²⁹ Hena hee haenesaudauchunauau henahavaevadehehauau: nau jasaa nedauau haenene, nau haenaja haejedāeyauneve.

³⁰ Nau naneseauwaude haeneva, nau haenaja haejedāeyauneve.

³¹ Nau nanaseuwaude haeneva; nau vavade hanaasene nanesaudauchuauwaude jea, nau haejenauthanauau dāeyaunauau, nau haegaujauaudāhenauau.

³² Waunee vahee hesā haegaujauaudā jea.

³³ Henahee jaegauhadeneyāgu hanaane hadnevādaune? hee hane-saudauchunethe daunevāde.

³⁴ Nau Hejavaneathusau haeauchuhanāedauwuna, dāeyaunauauau nuu hathāauauvaa nenevadedauene, nau nenenehadenee:

³⁵ Hau daun naunauuathee hadnenaededuu hena henaedede, nau jaegauhadeneyāgu hehethēe gaujauaudahede, hadnehauwunevadedauene, hegau hadnenenehadadaune:

³⁶ Daudause hadnehauwauthenajadene: hadnaathahedaunee hautheau-nauau; nau hadnenaunevāthee Hejavaneauthu, naathedāeyaunenedaunee jaegauhade.

³⁷ Wauhā henee gaujauaudahehehauau hadjaegauhāthee, Moses de-nauhauthehade jauauadee, deadethāde Vahadāhenith Hejavaneauthu Abraham, nau Hejavaneauthu Isaac, nau Hejavaneauthu Jacob.

³⁸ Hehauwuujavaneauthune heyauhadade, hau henaedede: hanau va-hee haneenaededaunene.

³⁹ Hanaāene jasaa wauthaunauhāhe haeauchuhananadetha, Hechauhauthethāhe. Nananene hethade hasenehene.

⁴⁰ Nau hee haejauthenaudedaunanauau.

⁴¹ Nau hanaāēdauwunaude, Naudu haena hane Chris Dāvid* dauhuāwaude?

⁴² Nau Dāvid nehayau hasenehede wauthaunauhanaa Psalms,† Vahadāde hasenehethaude Navahadāhewaunādaune, Hadjejanaugudaune hejavesa-nee,

⁴³ Haunaude nadeesehaunauau haujauthauwauau hadnedaugāaugunene.

⁴⁴ Dāvid henahee haehenesea Vahadāhenith, dusee heau?

⁴⁵ Nau vahee henanedane haenedaunau hanaāēdauwunaude hethau-guhādaunau,

* **20:41** "Dāvid" is spelt thus here and in two other places nearby, 20:42 and 20:44. The name is spelt "David" in its other ten appearances in the text. (See note for 13:16.) † **20:42** "Psalms" is capitalized here but not in 24:44, but both are almost certainly deliberate. As per the KJV, "Psalms" in 20:42 is the name of a book in the Bible, but in 24:44 the common noun "psalms" is meant.

46 Waudauau wauthaunauhāhehauau, neneanaduu javesanee sauaunusāchaude, nau vechaudeau jachauthadede nedauaudaunau-vadedeunenee, nau najatheaugudaunau vevethahenauauwuu, nau najedanau nedaugunethe vanetheedaunenee;

47 Naudauvāe henevesānuu hedauauwunene, nau hanau denauhau-thethāthee deguthevevethahethee: hadnathee hanesedanuu vanasaunee gudanadede.

21

1 Nau haeejaāne, nau haenauhauvā nethauyāsenanene haejenanauwu hevaudenenu haenathaunaa.

2 Nau haenauhauva jea jachau hadavenuhu henevesāne haethāgudene hanesāene nevaāhenee vāejethāau.

3 Nau hanaāenehede, hethauwuu nananenau nāedauwunathana henee naa hadavenuhunedede henevesā javaājenanauau vahee;

4 Hanau vahee nuu nanethauyādahethee dejenanuu dejenanauwunauthee Hejavaneathu: hau hadavenuhunedede hajenanauau vahee heenaededau-nau hathāenethenauau.

5 Nau haehegaugaugaudenauau vadannauauwuu, haseneehenee nau-guu hethāhenethe hauunauganau nau hausāyauunau, hanaāenehede,

6 Nuu hayauhuhau hānauhauthaunenau, hese hadnauaachuu, hadne-hauwunathauau hanesāde hauunauga hanathaugude hadvajanesee.

7 Nau hanaāenedaunauthee, Hechauhauthethāhe, hau hadduunaasau nuu? nau hayew hadnauhauwuu hadnesauau hāene nuu hayauhuhau hadneenauaachuu? hathauhaugaunee.

8 Nau hanaāenehede, haunauyauhaudauwauau henee nananena hade-jenanedaunehana: hanau hadnewauthathee hadjauthee Naneseedaunaa, Hanejavaneauthusaunenenu, hadnethee; nau hayānauauchauau: jevathau-guhaa.

9 Hau hāenedauwaudauwunā vauthadede nau jajayauthadede, jeva nathajauau, hanau nuu hayauhuhau hadnedauunauaachuu; hau hadneevadauauau hadguthauau.

10 Hanaāenedauwunauade, jajaesenanedanedede hadneevauthadee jajaese-naneda, nau najanede hadnevaudauau najanede:

11 Nau hadnavathethauthauwunauauau vedauauwuu, nau hasenaude, nau havathaugawude, nau naunaunauchaudauhauthade nau hadvasauau nau nauauwuu hadnauaachauau hehethē hejauau.

12 Hau hadnejesejenauaachuu vahee nuu, hadnedanāna, nau hadnaunau-nauchauthehāna, nau hadnevaudenee nananena hauāchaude, nau duguhu-nauauwuu, nau hadnenauaauhana hathaājethee nenauchuwuthee nau hauchuwunanenuau hanau Naneseede hee.

13 Nau hadnaasejenanauwunana hee haenathau.

14 Hāenauwuu heehēna nananena hadahenauau, jevagaugauuthajauau nedauau daun hadnesenehena:

15 Hanau hadvenathana vade nau haeyaude, vahee hasānavādaunenau hadnehauwuneyādaunāva hegau hayethaagudaunādaunenau.

16 Nau nananena hadnavethevāthee nesauuu hanehānenau, nau hāthesaunenau, nau hādaunānenau, nau hādaehahenau; nau jasae nanaena hadneenaana.

17 Nau hadneevahasānavāhēna vahee henaneda hanau naneseede hee.

18 Hau hegau hāthāanenau haudauguhanenuau haudnehauwugau-jauaudāhēnaunau.

19 Hanāedevedaunenau hadnaunaunehaudde havadathuwunau.

20 Nau hāenauhaudauwunā Dādaunedan hadnechauchuaunāna vanenane-nauau, nanehāenauwuna henee nauauhadede wauwu hadneaudaa,

21 Nanehadagauhuthee hese hanean hathānedauthee Judea; nau henee hathānedauthee nahethāe nanehanauhathēe; nau jevajejedānauha henee hathānedauthee gauchuhunee vedauauwuu.

22 Hanau nuu hese hadneauthedaunee henee vahee hayauhuhau hathāewauthaunauhuu hadnethauwunaasauau.

23 Hau naunauthaunee hadnethauauvāhethee hathāenesaunethee, nau hathāeneauhuthēe hena hese, hanau hena hadnavathasenaunee vedauauwuu, nau hasenaunaudaunāhenauau nuu henanedanede.

24 Nau hadneaunathāhethee gaugauthau, nau hadnejathechauhāthee had-wauwaunenethee vahee jajaesenanedanede; nau Dādaunedan hadnau-guhethee Neauthu, haunade Neauthu nauauchaudauhaugane.

25 Nau hadnauhauthaunee hesese, nau vegusesee, nau hauthuu; nau nanadee hathāauauvaa hadnaunauādaugauhudaunee jajaesenanedanede, hadnehauwaenauwu; hadaje nau hadnaunaudānaunee;

26 Henanenauau hedahenau hadnadenāthajaunee, nau hanau naunauyauhaudu hena hayauhuhau hadnauauchaunee dasee hathāauauvaa, hanau hathāenauthauau hejavaa hadnauauwunauauau.

27 Nau hadnaēenauhauwauna Heau henane hadnenausade henaunauade nauguu naunauthaunee nau hadnavathenausāauau.

28 Nau hāene nuu hayauhuhau hāenauauchu, nauhadnaēenaunauānena; nau hadnejenāauguana hee hadneejaenauthana hadnaēeaudaa.

29 Nau hanaēedajenehethaude; Nauhauvaa hauuyauchunauhaude, nau vahee hahaudenauau;

30 Hāeguugauāhenauthe, hadnauhauwauna nau hadnaenauwuna nehayau henee veja dauhauadaa.

31 Hadnaasauau nananena hāenauhaudauwunā nuu hayauhuhau hadnethauwunaasauau, hāenauwuu henee henajanede Hejavaneauthau haneaudanee.

32 Hethauwuu nāedauwunathana, nuu henaedede hadnehauwuvadauau, haunade vahee hadnethauvāe.

33 Hejavaa nau vedauauwuu hadneyauhuu; hau Nadanadedauau had-nehauwuthauuyauhuunau.

34 Nau haunauyauhaudauwauau nehayau, naseduhuu daunāene hadahenau havaehayaundenau hee hadauhauganedaunenau, nau havanadenenau, nau haunaunethaunenau nuu henaedede, nau henee hese hadgaudaunāna hau hadnehauwaenava.

35 Hanau waude nauyandenau hadnauauchaunee vahee hathāetheaugude dasee hathāauauvaa.

36 Haunauyauhaudauwauau henaheee, nau hevevethahee dajauaunee, henee nananena hadeheenaugana hadegauchuhauwuna vahee nuu hayauhuhau henee hadnauauchu, nau haddetheauguna hathāhede Heau henane.

37 Nau hesenee haechauhauthethā vadanauauwuu; nau hāeveeyaunee haenauā, nau haeādāne hanean henee neseeyāgu hanean Olives.

38 Nau vahee henanedanede haejevanauuchaudene naugusāje daunau-ganenee hadaude vadannauauwuu, hee dauhujaatthēde.

22

1 Wauhā hadneevasevenee janenesaunauchauanauhuu jauaujaunau haeayānauauchaunee, Hadavechaude neseāgu.

² Nau najanau vevethahevahehau nau wauthaunauhāhehauau haegau-gauanadauwunenau hadnesenaāde; hau haedauwu henanedanede.

³ Hanaāejedāde Haujau Judas hejaveede Iscariot, haenethanedau vadadauchunesenee.

⁴ Nau hanaāejathāaude, nau haeanaadetha najanau vevethahevahehau nau haunauyauhauthāhehau, hadneseavedaundaunauwaude.

⁵ Nau haeneethajaunauau, nau dechauchuwuhadethee hadvenāde vāejethā.

⁶ Nau haesayānehetha, nau haeanauyauhaudauwu hadneeneavedaudau-nauwaude henanedanede.

⁷ Hanaāenauauchauau hesee janenesaunauchauanauhuu jauaujaunau nanaa hadavechauthau hadnāede.

⁸ Nau hanaāauthēawaude Pedaheau nau Jauneau, Najesaa hadesaanudeva hadavechauthadede, hadevethenauau, hathāhaugaunee.

⁹ Nau hanaāēdauwunauthēe, Daudu hadaavathēhāne hadnedauusaunuu?

¹⁰ Nau hanaāēdauwunaude, Naune, hāejedānā hedan, hena henane had-nuchaunāna, hadnewaunauau hauānau hadjaāsanenee naje; hadethau-guhauva hauauwu hadnedaujedāde.

¹¹ Nau hadethauva henane hedauauwunede, Hechauhauthethāhe ne-jeethāne, daudu jādanauawuu hadnedauvethenauau hadavechauthadede nauguu nāthauguhādaunauau?

¹² Nau hadnauhauthehāna vanasaunee dachauauwu hadnesewaudea-nee: hadnesaanuhuu.

¹³ Nau hanaāeyehauthēe, nau haeveedenauau neethāedauwunaude: nau hanaāesaanudethee hadavechauthadede.

¹⁴ Nau hāenauauchauunee, hanaāejanaugude nauguu vadadauchunesenee hevadauhanau.

¹⁵ Nau hanaāēdauwunaude, hethauwuvadavethenau nuu hadavechauthadede naugu nananena hajesejasauwauwuthānau:

¹⁶ Hanau nāedauwunathana, Naudnehauwauthethe nuu, haunaude had-nauauchauau henajanede Hejavaneauthau.

¹⁷ Nau hanaāedanauau vāenau, nau hanaāevāde vaveenede, nau hanaāenehede, Hedanauwu nuu, nau hadjaanauwauva nehayau:

¹⁸ Hanau nāedauwunathana, Naudnehauwuvanethede dadajevenenaje, hanaude henajanede Hejavaneauthau nauauchauyēgu.

¹⁹ Nau hanaāedanauau jauaujau, nau hanaāevade vaveenede, nau hae-jeane, nau haevēna, Nuu nanaa nadanayau havenadenenau: nuu hadnee-jenauneethedaunena, hathauhuk.

²⁰ Naasauau jea vāenau hāesethunevethedeaunee, Nuu vāenau waunauyauau hesānaavede Navaevaa, hanedaunauwunana, hathauhuk.

²¹ Hau nauhavua, hejadenaa henee haneavedaundaunade nananauau nanedauguvānauau vethedeaunaa.

²² Nau hethauwu Heau henane hadjathāaude, neesedaunauwunade: hau naunauthaunee henee henane haneavedaundaunaudenenee.

²³ Nau hanaāenaunadedauwadethee nehayau, hanaadee hadnesedaude nuu.

²⁴ Nau hena jea haeneenayaundenauau, hanaadee hadjavaāvasāthaa.

²⁵ Nau hanaāēdauwunaude, Nenauchuwuthee Neauthuu haevahada-hethedauwu; nau henee nanethenuu naudahede nanadee hesenaedehe-hauau neseadagaunee.

²⁶ Hau jevanaathāhee: hau henee havasāthawaunādaunenau, hadenahavae-wauva; nau henee naja waude henee henechauthāhehau.

27 Hanaa vanasāthaa, henee vanethede, wauāthe henee henechauthāhe? gaujenane henee vanethede? hau hanedaudaunathana waude henee henechauthāhe.

28 Nananena daudajauaunenethaunena denaunaunauchauthehanau.

29 Nau janenanauwunathana najanede, waude Nāsaunau nejeeseje-nanauwunānau;

30 Hadevethena nau hadevaveyāna navethehedaunaa Nanajanedau-naa, nau hadetheaugudaunana najatheaugudaunau hadnauchuwuhauna vadadauchunesenee jajaesenanedane de Israel.

31 Nau Vahadāde hanaānehede, Simon, Simon, nauhauwune, Haujau nevadaunethenāne, hadvachuuguthāne waude thauuhanewauchuunau:

32 Hau nevevethasathane, henee hadethauwuthajaude hadejenadegaude-nauau: nau hāejauaugauthethajaunaune hadedāewaunauau hahauwauauau.

33 Nau haenehetha, Vahadāhene, Nananenau hanesaanunau hadnenenethaunathane, nesauna duguhunauauwuu, nau gaujauauda-hedaunaa.

34 Nau haeāedauwuna, hāedauwunathane, Peda, neauthuneāhe hadne-hauwunedu nuu desenene, hajesejenehenaune nasau hadnethedauwaune henee nananene daujaunenene.

35 Nau hanaāedēdauwunaude, Deathavejenanathana hāehauwunewauunava nesevāejethāwau, nau newaugusajaānauchu, nau wauaunau, gauhājevathēhāva hayewhu? Hegau, hathauhaugaunee.

36 Hanaāedēdauwunaude, hau hewaunehaa henee nanethenauau nesevāejethāwau nanehaedanaunau, nau jea heneaugusajaānauchu; nau henee janenethenauau gaugauchu, nanehaeaudaunade heddu, nau jeaudaunau gaugauchu.

37 Hanau nāedauwunathana, henee nuu wauthaunauhuu hethauwu-naauthaunauhunau, Nau haewauhaunau wauwauchudauhuhau: hanau nethauthedauthanau hethauvaa.

38 Nau hathauhaugaunee, Vahadāhene, nauhaudau, heyewnau hanesāe gaugauthau. Nau haeāedauwuna, Naadauchāe.

39 Nau haejenaua, nau haejathāu, nesedaude, hana nee Olives; nau hethauguhādaunau jea haethauguhāa.

40 Nau hāanausade, haeāedauwuna hevevethahee henee hadejejedāna vase-hadede.

41 Nau haejāvesa hehejese nejechauthaunenene, nau haechagujanaugu, nau haevevetha,

42 Nāchau, hith Nananene vadausedaunenagu, jegudanauwune nuu vāenau hehethēe Nananenau: hau nāhauwuvathehaa, hau Nananene, had-naasauau, hathauhuk.

43 Nau haenauhauva hautheaune hehethēe hejavaa, haedadāevaa.

44 Nau haenenajeneethajau haenenavevetha: nau heguwauaude waude davathejajaneauthēe vaewauau dejanese vedauauwuu.

45 Nau hāegauhāde hehethēe devevethahede, nau haejeedasa hethau-guhādaunau, Haaveena haesenaugauhunenau heee haudauwuthajaude,

46 Nau haeāedauwuna, Naudu haenaugauhuna? gauhāe nau vevethahee, hadejejedāna vasehadede.

47 Nau hajesanadede, haenauhauwau havathenanedane, nau henee Judas neseade, jasa vadadauchunesenee, haenedava, nau haeayāedasa Hejavaneauthusaun hadnedanaude.

48 Hau Hejavaneauthusaun hathāhuk, Judas, gauhāavedaudauna Heau henane gauhadneenedanau?

49 Hāene henethauguvādaunau daunauhaudauwunethe hadnesehade, Vahadāhene, gauhadjedauauwaunauau hee gaugauchu? hathauhaugaunee.

50 Nau hanesāde haedauauva hewauwaunavene vasnajane vevethahevahew, nau haegauadathāhe hejavese.

51 Nau Hejavaneauthusau haeauchuhananadetha, Hauwaa nanesedau nuu. Nau haevasane henaudaununene, nau haenayauha.

52 Hejavaneauthusau hanaāenehethaude najavevethahevahehau, nau haunauyauhauthāhehau vadannauauwuu, nau vachaugananenau, hejewaunedasādaunau, Gauhāejauva, waude hee havedehe, nauguu gaugauthau nau vachau?

53 Denethenaedevathana hayauwusene vadannauauwuu, nananena hāehauwudaneva: hau nuu nauauchaudauna, nau naunauthauau vaneeyauau.

54 Hanaāedanauthēe, nau haejathechauhanaauau, nau haejedananauau Vasenajane vevethahevahew hedauauwunene. Nau Peda haejesedauchu.

55 Nau hāesewaudeadanthee nahethāe hadauvasenejesauau, nau haeauājanaugunauau, Peda haejanaugudauna.

56 Hau jasae hesāhedēyaune haenauhauvaa daujanaugudaunaude hejava hesedaa, nau haenaunauchaudauhauvaa, nau hathāhuk, Naa henane jea nanethenaedewaude.

57 Nau haeethedauwautha, Hesā, nahauwaenaunau, hathauhuk.

58 Nau naunade jachau haenauhauvaa, nau hathāhuk, Nananene jea hanehedāhene. Nau Peda hahagu, Henane, nananenu hegau.

59 Nau hee jasaye denauachauau waunee jachau haeethauwunehene, hathāhuk, hethauwuu naa jea nanethenaedewaude; hanau nananede Gananaean.

60 Nau Peda hahagu, Henane, Nāhauwaene daun nesenehene. Nau chauchaunu, daunausunanadede, neauthuneāhe haenedu.

61 Nau Vahadāde haejaaagu, nau haenāauhauva Pedaheau. Nau Peda haethauchuthajaude hedanadedauunene Vahadāhenith, neesenehethāde, Hajesejeneduhude neauthuneāhe, nananene hadnethedauwauchune nasauna.

62 Nau Peda haenaua, nau haeneenavewau.

63 Nau henanenauau henee daununauthēe Hejavaneauthusaun haevavanauchuhanauau, nau haedaudauauvaa.

64 Nau hāesajeājethauthēe, haenadeāhenauau, nau haenaunaudedau-nanauau, Haeyāhe, hanaa henee haudaauvāde? nethāhuk,

65 Nau wauthanee haeewauwauchuvaa nanāsanadethāde.

66 Nau chauchaunu hasenaugusājenee, vachaugananenauau henanedanede nau najanauau vevethahehehauau nau wauthaunauhāhehauau haeauāchaudaunanauau, nau haejedananauau hadaunanadethee,

67 Gauhanane Chris? jeāedauwunāa, hathauhaugaunee. Nau haeēedauwuna, Hith Nananenau hāedauwunathanagu, nananena hanājethauwauდანena:

68 Nau hith nananenau jea naudedaunathanagu, nananena hanājauchuhananadesena, wauāthe hanājejenanena.

69 Hewaunehaa hee Heau henane hadtheaugude hejavese naunaudāhenith Hejavaneauthu.

70 Hanaāenehethēe vahee, Gauhanane Heau Hejavaneauthau? Nau haeēedauwuna, Hasenehena Nananenau.

71 Nau hahagaunee, Hehauwauthevathehānauau naudedauyaunauau? hanau nehayau nanaunaunauau Nehayau hedenaa.

23

1 Nau haunauude henanedanede haegauhādene, nau haeyehaudaunauau Pinade.

2 Nau hanaāevavasevāde, Vaneenaunauau naa gauchuhuchaudede jajeenanedanede, nau nedauduwaude hadjevenauthēe hauāyaunau Caesar, daunahagu Chris Nenauchuwude, nethadede, hathauhaugaunee.

3 Nau Pinade haenaudedaua, Gauhanane Dauhunauchuwuhunene Jews? hathauhuk, Nau haeauchuhanāedauwunaa, Hethauvāne.

4 Hanaāedauwunaude Pinade najanau vevethahehehau nau henanedanede, Nāhauwuveedenaune wausaunee naa Henane.

5 Nau haenaunauchauthedauhādene, wauwauyauchudede henanedanede, hanechauhauthethāde hehethee vahee Jewsevedauuwuu, jejasee hehethee Gananane nauuu nuu vedauuwuu, hathauhaugaunee.

6 Hāene Pinade nedauwauthaude Ganane, haenaudedauva wauau haganenanenene.

7 Nau chauchaunu hāesaenauau henee daunaadāde Herod hadaunajavanethe, haeathavenane Herod, jea haeanedau Dādaunedan hena hesee.

8 Nau hāene Herod nauhauwaude Hejavaneauthusaun haevaseneethajau: hee devadaunauhauwaude dajauaunee hanau dauhuwauthanedauwauthaude; nau haevadaunauhauwauwau jasaa venauneguthau hadnesedau-nith.

9 Haenaunaudedaua hauwauhuu hanadedauau; hau haejauchuhananadethaa.

10 Nau najanau vevethahehehau nau wauthaunauhāhehau haetheaugunau nau haenaunaunauchauthēvaa.

11 Nau Herod nauguu vauānanenau haejenananaugaugaunyaune, nau haevavavanauchuhanauau, nau haeneenuhanauau neaudahenenee hu, nau haevenanauu jea Pinade.

12 Nau hajesenenee Pinade nau Herod haenedaehāvadenaunau nesauuu: hanau nedauwuu haeasānavadenauau nehayau.

13 Nau Pinade, hāesauānadethaude najanau vevethahehehau nau hauchuwunanenau nau henanedanede,

14 Haeāedauwuna, Nananena nauuchaudaunena naa Henane, nanahagu henee gauchuhuchaudede henanedanede: nau, naune, nananenau, hanauchuwuhauau hathaāhena, nāhauwuveedenaune wausaunee naa henane hee henee hayauhuhau nanāsevasewauna:

15 Hegau, hehauwune Herod: hanau neathavejenanauwunathane; nau naune, hehauwunenauau hehauwugaudauwudau.

16 Hadnenesegauhaa, nau hadjenanauu.

17 (Hanau hadnaugauhuseensaadaude hadjenanaude hanesāhenethe vavethehedauneagu.)

18 Nau haunauude haevasānadenaunau jasānee, Hausāguthaa naa, nau jejenanauwunāaa Barabbas, hahagaune:

19 (Nanandede hanau jasaa nejaevauāde hedan, nau hanau nenaade, nethānade duguhunauuwuu.)

20 Pinade henaheee, haevadaujenana Hejavaneauthusaun, haeanaadetha jea.

21 Hau haeneānaune, Saethechuhuu, Saethechuhuu, hahagaunee.

22 Nau haeēdauwuna nanaseauwaunee, Dusee, dusewauchudau? Nāhauwuveedenaune hadneegaujauauthehaude: Hadnaasedaunau hadnensesgauhaa, nau hadnaāejenanauau.

23 Nau haeneenavasānadenauau, haeneenavadausaethechuhunauau. Nau haeneānadenauau nau najanau vevethahehehauau haechauwauauwau-nauau.

24 Nau Pinade haechuwardā henee hadnaasaunee hasevathehāthee.

25 Nau haejenanauwuna nananede henee hanau nejaevauāde nau ne-naade haethānau duguhunauauwuu; nananede heenedauwaudenenau; hau haevā Hejavaneauthusaun hathanauwauthee.

26 Nau hāejathechauhauthee, haedananaauau hanesāhenith Simoneau, hehethee Cyrenene, hananeedesade vedauauwuu, nau hananene haenhanauwunanaauau naugauchu, henee hadnanewauunauwunith thauguu Hejavaneauthusaun.

27 Nau hena haethauguhaa havathenedanede, nau hesānau, haeau-dauwuthajauha nau haevewauhunauau heee.

28 Hau Hejavaneauthusau haejaaāne haeēdauwuna, Dādaunedan hedau-nauhau, jevahevewauhuu heee Nananenau, hau heevewauhuu nehayau, nau heee hadāeyaunevenau.

29 Hanau, naune, hese janādauuu, hadneenedaunee, Haunauwutha-jauau jenesaunehahauau, nau henaudaunenau henee nejethauujanesāthee, nau hethanenau hehauwunethuaunenau.

30 Heee hadnaāejeseseneduu hauane, Gauduaunānauau; naa jauaudane, gaudauyauhunauau.

31 Hanau hith heenedauhaugaunee nuu hayauhuhau janadanegaua-heyaugaune hauhadene, haudneedusedaune wautheyaugu?

32 Nau hena haenesenauau gauchuhunee jea, wauwauchudauhuhau, haenethaunaa hadnaugunaade.

33 Nau hāene hāedadauu, Calvary hanaaseenee, hena haesaethechuhu-nauau, nau wauwauchudauhuhau, hanesāhenith hejavese, nau jachau nauwauthe.

34 Haenaāenehede Hejavaneauthusau, Nāchau jaegudanauwunene; hanau daujāenuu hasedauthee. Nau haejaanauwaunenau, hedāchaunene, nau hae-heedaudauusadaunenau.

35 Nau henanedanede haetheaugudaune dauhasauhauvade. Nau hauchuwunanenau jea nauuu haeauchaudanavaa, haseneheyaugaune, Nenayauhaude hauthauau; Nanehanenayauhadede hethauwuu Chrisdeyaugu, Neayāsanaāde Hejavaneauthu.

36 Nau vanenanenau jea haenaunaugauthedaunaa, haedasaa, nau haevenaa naneujaudenee dadajevenenaje,

37 Nau hathāhuk, Hethauwunajawaunaudagaunee Jews, henayauhade nehayau.

38 Nau haewauthaunau jea haewauthaunauhune hejavaa hedanadedauunene Greek, nau Latin, nau Hebrew, Naa Nanajawaunaude Jews.

39 Nau jachau wauwauchudahu chaunaunauunith haewauwauchuvaa, Hethauwuu Chrisdenagu, henayauhade Nehayau nau nananee, hathāhuk.

40 Hau jachau haeauchuhananadene haedauduva, Gauhajeadaunau Heja-vaneauthau, hanau nananene nanesadee hathauchuwuhane? hathauhuk,

41 Nau neehanauau; hanau hanesedanauwunauau nanāsedauunauau: hau Naa hehauwuwauchudau.

42 Nau hanaāenehethaude Hejaneauthusaun,* Vahadāhene, dauyewuwuthedaune hānauusanaune Hanajanede.

43 Nau Hejavaneauthusaun hathāhuk. Hethauwuu hāedauwunathane, Nuu desenee hadnethenaedeuvene Paradise.

44 Nau hāethauthaunesade, nau hanaāeveeyauau nanadee vahee hathāuauvaa haunaude nanasuusee hānauauchauau.

45 Nau hesese haevenenauau, nau hauguthau Vadannauauwuu haethauwunauau nahethāe.

46 Nau Hejavaneauthusaun hāevasānadede, Nāchau, hajadēnaa hadaunaunehau Navadathuwu, hahagu: nau hāesenehede nuu, haevadauwauthauwu.

47 Wauhā vanenenaja hāenauhaudauau hasedaudenenee, Haeauwauau-dauna Hejavaneauthu, Hethauwuu naa chaunuvāde Henane, hahagu.

48 Nau vahee henanedanede henee hathāejeauānuusathee hadnauhauwau-thee, haenauhaudauwu hanasedaudenenee, haenadesejāhedenaau, nau haejaajegauhudaune.

49 Nau vahee henedaehauhau, nau hesānau hethāethauguhādaunau hehethēe Gananee, haetheaugunenau vavāaune, haenauhaudauwu nuu.

50 Nau, naune, henane Joseph haeseee, najananadehe; nau haethā, nau haechuvā:

51 (Naa haejochuwardā hasenehedaunenee nau hasedaunethe;) hae-naadāde Arimathaea, hedan Jews: nananede jea nehayau haejauwuwude henajanedauene Hejavaneauthu.

52 Naa haeyehau Pinade, nau haenedauwaude hedanayaunene Hejavaneauthusaun.

53 Nau haejanana, nau haeauyauuna naunaujānaunee, nau haejenana nedauthānavathe gaujauaudahehēhau hauunaugāe, haunauau henane haethauujenanau.

54 Nau hena hesee haeesaanudaune, nau vadanesee dayānauauchauau.

55 Nau hesānau jea, hejenauunethaunādaunau hehethēe Gananee, haethauguhā, nau haenauhaudauwu hadausaesēanethe, nau hedanayaunene hathaudanee.

56 Nau haejaenauthau, nau haeesaanudenauau hathāeneevaudenee nau chauayaunau; nau haedauyānusenauau vadanesee hasauau nanavaavede.

24

1 Wauhā nandedauwadaa hese hauchauvadede, hajesejevesesanith hae-jeedadauwu hadausaesēanith, haenauuchaudenaau hathāeneevaudenee heesaanuthaunenau, nau jasae hauthauau nauguu.

2 Nau haenauhauvanauau hauunaugane haeausānene hehethēe hadausaese.

3 Nau haejedānauau, nau haejevedenaau hedanayaunene Vahadāhenith Hejavaneauthusaun.

4 Nau hethauwuu daugaudauwuthajauthee heee, naune, hanesenethe henanenau haetheaugudaunā haenauasāaunenau hedāchaunene:

5 Nau daunāthajauthee, nau haenauauagunauau vedauauwuu, haeēdauwunā, Naudu nananena haenaudehauna hanenaededaunaude neethe gaujauaudahehēhau?

6 Hehauwanedau hede, hau jaegauhāde: dauyewuwuu neethāedauwunāna denausunanedaude Gananee,

7 Neesenehede, Heau henane hadvenavathe hejadenene wauwauchudau-nanenau, nau hadsaethechauhude, nau nasese hadjaegauhāde.

* 23:42 "Hejaneauthusaun" possibly should be "Hejavaneauthusaun". (See note for 18:19.)

8 Nau haedaueyewuwunauau hedanadedauene,

9 Nau haenaudauwu hehethēe needausaesenanith, nau haeauthedau-
nanauau vahee nuu hayauhuhau jasānee, nau vahee hauthauau.

10 Haenane Mare Magdalene, nau Joanna, nau Mare henaune James, nau
hauthauauu hesānauu henee henethaunādaunenau, neauthedaunauthēe
nuu hayauhuhau vadauhanau.

11 Nau hedanadedauenau hathanadauwuyaugaune gaugauyaune, nau
haejethauwaudaunaunauu.

12 Hanaāegauhāde Peda, nau haeyeseneegau hadausaesenanith, nau haee-
waugauu, haenauhaude naunaujānaunee haeānaudanenu jessaa, nau hae-
naude, haegauguanade hasaunee.

13 Nau, naune, hanesenethe haeyehaunenau henee hajesesenee hajasee
hauauwudan Emmaus haseagu, hehethēe Dādaunedan wauau nesaudauchu
nau gauuu daugauha.

14 Nau haenanadenauu wauhaunee vahee nuu hayauhuhau hasaunee.

15 Nau hethauwu, henee, dauanadethee wauhaunee nau haena-
nadedadenenu, Hejavaneauthusau Nehayau haeeachauna, nau
haenethauna.

16 Hau hesesānenau haedunenenu henee hadjaenaunauthēe.

17 Nau haeāedauwuna, Hayewnau hadanadedauenau nuu henee nana-
na hānegudaunenenu, daujājāwauaunadenu, nau daudaneāauna?

18 Nau jasaa hanaaseede Cleopas, haeauchuhananadethaa, Gauhanane
vavade dauhadavesane nuu Dādaunedan, nau gauhajaene hayauhuhau
hasedaunee hena nuu heseē?

19 Nau haeāedauwuna, Hayewnau? Nau haeāedauwunaa, Hee Heja-
vaneauthusau Nazareth, nananede Haeyāhe naunaudāde hanasedaude nau
hedanadede hathaāhenith Hejavaneauthu nau vahee henanedanede:

20 Nau najanauu vevethahevahehauu nau hadauchuwananevene nee-
sevānethēe gaujauaudahede hadneauchuwuhade, nau nesathēechauhude.

21 Hau nejauwuwuhauanauu Nananede hadnenaudenee Israel: nau
nauguu vahee nuu, desenee nanasāe heseē hāsesenedaunee.

22 Haa, nau jasae hesānauu jea hadahenuu nenāvānauu, naugusāge
neanedauthēe hadausaesenanith;

23 Nau dejevēdethee hedanayaunene, nejenuusathee, neauthedathee,
henee jea haenauhauvanauu hauthaunau neethāhaugaunee henee daujae-
naedyaugaune.

24 Nau hauthauauu hānethaunādaunene deyehaunauu hadausaasee, nau
haeveedenauu vavade hesānauu neesenehenethe: hau haejenuhau-
vanauu.

25 Hanaāedauwunaude, Hau hāhauwaenava nau gaunuanuu hadahenu
hethauwaudanee vahee henee haeyāhehauu nethauthedathee:

26 Naasauu Chris hadnasenede nuu, nau hadjedāde hadnedauvasāthaa.

27 Nau jeejasesee Mosese nau vahee haeyāhehauu, nee-
vavesāedauwunaude hee vahee hanathauthaunauhunee hayauhuhau
hadnesenaedee Nehayau.

28 Nau haeeachauwu hajasee hauauwudan hasesathee: nau nehayau
haenanedauneha hadjavesade.

29 Hau haenenadaunanauu, hathauhaugaunee, Hanedaunaunā:
hayānaesade, nau heseē hayāenauwusanauu. Nau haejedā hadnanedau-
daunaude.

30 Nau hethauwu, daujanaugude haenethevetheheva, Haedane jauu-
jau, nau haevaveene, nau haejane, nau haevana.

31 Nau hesesānenau haegaunanenenau, nau hanaāaenaunauthee; nau haeyauhaudenauau.

32 Nau hadāhene gauhauchāe hethauvaa, hanathadagaunee jae, deanadethānauau jāthee, nau hāegaunanauwunānauau wauthaunauhanau?

33 Nau haegauhānauau chauchaunu nau haejaeyehaunauau Dādaunedan, nau haeevehanauau jasānee haeau nau udaunāhenenau, nau hauthauau henee hanedaudaunādaunenau,

34 Vahadāde gauhāde hethauwuu, nau haenauhautheha Simon, hathahauganee.*

35 Nau haeauthedanauau hayauhuhau hanasedaunith hadesathee, nau hasaenaunāde daujeanaauau jauaujau.

36 Nau daunausunanadethee, Hejavaneauthusau Nehayau haetheaugu nahethāe hadauthee, nau hathāhaugaanee, Danādayauau vanenathana.

37 Hau haenānauaunauau nau haenāthajaunauau, nau hasethajauhaugaanee henee haenauhauvanauau vadathu.

38 Nau hathauhuk, Naudu nananena haenāthajauna, nau nau du haegau-gauuthajauna gauhānauha hadahenau?

39 Nauhaudauwuu Najadenau nau Nauaudau, henee Nananenau nehayau: Vasanee, nau nauhauwuu; hanau vadathau hehauwudausānune nau hehauwudechaunave, hathauhauwuna.

40 Nau dauhanade, haenauhautheha hejadenau nau heaudau.

41 Nau haejethauwuthajaunauau heee haunauwuthajaude, nau haegau-gauuthajaunauau, Haeāedauwuna, Gauhajeveheneva hede?

42 Nau haevenanauau hanesāhenith nauwu haeaujaunene, nau gauhauau-gunaugaue.

43 Nau haedane, nau haevethe hathaājenethe.

44 Nau haeāedauwuna, Nuu nanāe hanadedau nau hāauthedaunathadenenau, denausunethenaedevathana, henee vahee hayauhuhau hadnethauwunauauchuu, hanathauthaunauhuu henanavaavede Mosese, nau haeyāhehauau, nau psalms hee Nananenau.

45 Hanaāegaunanauwunaude hadnaenauwunethe, henee hadnae-nauwunethe wauthaunauhanau,

46 Nau haeāedauwuna, Hathauthaunauhuu, nau naasauau Chris hadnasede, nau hadjaegauhāde hehethee gaujauaudahede nasese:

47 Nau henee haugauthegaugauuthajaude nau hadjaegudanee wauchaudanenau hadnautheduhunee heee Heneseede nanadee jajaesenanedanede, hehethee Dādaunedan.

48 Nau nananena haenauwuna nuu hayauhuhau.

49 Nau, naune, Nananenau vanenathana sayānee Nāsaunau hau theaugu hedan Dādaunedan, haunaude nananena hāchauwunagu nauguu naudahede hehethee hejavaa.

50 Nau haejasesenedauwauna hajechaudanee Bethany, nau haeegauha, nau haeevethasa.

51 Nau hethauwuu, daunausuvevethauchaude, Haenautha, nau haee-jehauhau jethee hejavaa.

52 Nau haeevethedaunauau, nau haejaeyehaunauau Dādaunedan nau-guu vaseneethajaude:

53 Nau dajauaunee haenedaunauau jedauwuu Vadannauauwuu, hauwaunede nau haeevethedaunauau Hejavaneauthu. Hethauvaa.

* 24:34 The last word of the verse is unclear and could be "hathahaugaanee" or "hathahaugauee". The former was chosen as being closer to what is used in other instances of direct speech.